

Inatsisissatut siunnersuummut nassuiaatit

Nassuiaatit nalinginnaasut

1. AALLAQQAASIUT

Kalaallit Nunaanni aningaasaliisarnerup siuarsarneqarnissaa Naalakkersuisut kissaatigaat, kisianni nunanit allanit aningaasaliinerit pisut ilaanni Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanerat tamatuma peqatigisaanik nalunagu.

Tamatuma saniatigut nunat tamalaat akornanni atassuteqaatit, isumannaatsuunissarlu ataqatigiilluinnarlutik nunat tamalaat akornanni politikkimut ataqatigiittumut Kalaallit Nunaat akuummat Naalakkersuisut ilisimaaraat. Ilgisatta suleqatigineqarnerat Kalaallit Nunaata annertuumik pingaartippaa, Kalaallit Nunaatalu isumannaatsuunissaa aamma ilgisatta isumannaatsuunissaat illugiimmik imminnut pinngitsoorsinnaannginnerat aamma nunap immikkoortortaanut, nunarsuarmilu allanngujitsuutitsinissamut aalajangiisuunera miserratiginagu.

Tamanna pillugu Kalaallit Nunaata isumannaatsuunissaanut imaluunniit tamat toqqissisimatinneqarnissaannut nunanit allanit aningaasaliinerit navianartorsiortitsisinnaanerisa pitsaaliorneqarnissaat, tassuunakkullu uagut nunap immikkoortortatsinni, ilgisattalu isumannaatsuunissaannut tapersiinissaq siunnersuutip matuma siunertaraa. Misissuinnermik aaqqissuussinerup, aningaasaliinernut Kalaallit Nunaata isumannaatsuunissaanut imaluunniit tamat toqqissisimatinneqarnissaannut tunngatillugu suliassa qarfinni malussarinnerpaatut nalilerneqartuni, suliassa qarfiit assigiinngitsut akornanni nammineq kajungissutsimik nalunaaruteqartarnermik ataqatigiissitsisumik ilusilerlugu, suliassa qarfimmik tunngaveqartumik akuersissuteqartarnermik aaqqissuussinerup eqqunneqarnissaa, siunnersuutikkut siunnersuutigineqarpoq. Aningaasaliinerit immikkut ittumik piumasaqaatitalit akuerineqarnissaat, imaluunniit aningaasaliinerit Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaasutut nalilerneqartut, inerteqqutigineqarluinnarnissaat, misissuisarnermik aaqqissuussinerup periarfississavaa.

Kalaallit Nunaanni inuiaqatigiit ineriartornerat aamma aningaasaqarnerup allanngorartinneqarnissaanik politikkikkut annertunerusumik ukkatarinninneq ilutigalugu, taamatuttaaq nunarsuarmi tamarmi niueqatiginninnermik annertunerusumik pisariaqartitsineq

saqqummerpoq. Tamatuma peqatigisaanik nunarsuarmiunngorsaanerup annertusiartortup unammilligassanik isumagineqartariaqartunik nutaanik unammilligassaqalenera kinguneraa, aamma taamaalilluni tamanna periaatsini aaqqiissutissanik amerlanerusunik peqarnissamik piumasaaqateqalersitsivoq. Nunanit allanit sullissisunit Kalaallit Nunaanni aningaasaliinissamut pigisaqalernissamullu suli soqutiginnittoqarnissaa naatsorsuutigineqarmat, Kalaallit Nunaanni suliffeqarfinni immikkoortortanilu allani aamma suliniutini, pisut ilaanni nunanit allanit aningaasaliinerit Kalaallit Nunaata isumannaatsuunissaanut imaluunnit tamat toqqissisimatinneqarnissaanut navianartorsiortitsisinnaasut, Naalakkersuisut nalilerpaat.

Nunani amerlasuuni misissuineq ullumikkut atorneqartarpoq aamma nunanit allanit aningaasaliinernut pissarsinernullu, assersuutigalugu Kalaallit Nunaata isumannaatsuunissaanut imaluunniit tamat toqqissisimatinneqarnissaanut navianartorsiortitsisinnaasutut nalilernerqartunut akuliunnissamut, sakkutut annertusiartortumik ajorneqartarluni. Tamatuma peqatigisaanik nunarsuarmi niueqatigiinneq suleqatigiinnerlu annertunerusoq Kalaallit Nunaanni suli kissaatigineqarpoq. Misissuisarnermik aaqqissuussinerup atortuulersinneqarneratigut, iliuutsit akuliuffiusut aamma aningaasaliinermi avatangiisit peqqissut akornanni oqimaaqatigiinnerup eqqortup nassaarinissaa taamaalilluni pingaaruteqarpoq.

Nunanit allanit aningaasaliinerit aamma pissarsinerit il.il. pillugit misissuinissamik aaqqissuussineq pillugu nalunaarusiap ilaatigut siunnersuutip malitseqartitsissutigaa (Naalakkersuisoqarfiit assigiinngitsut akornanni suleqatigiissitanit naliliinerit innersuussinerillu). Nunanit allanit aningaasaliinerit ilaasa misissorneqarnissaat pillugu suliassat allassimaffiat Naalakkersuisunit akuersissutigineqarnera aamma Kalaallit Nunaanni misissuinissamik aaqqissuussinerup pilersinneqarnissaa siunertaralugu, naalakkersuisoqarfiit assigiinngitsut akornanni suleqatigiissitat pilersinneqarnerat, nalunaarusiami tunngavigineqarpoq.

2. Siunnersuummi immikkoortut pingaarnerit

2.1 Siunertaq, atuuffissaa aamma nassuiaatit

Kalaallit Nunaata isumannaatsuunissaata aamma tamat toqqissisimatinneqarnissaasa eqqarsaatigineqarnerat aallaavigalugit aamma pisariaqartinneqarpat akuliussinnaaneq pillugit, Kalaallit Nunaanni nunanit allanit aningaasaliinerit misissorneqarnissaanut periarfissiisumik, ullumikkut inatsisitigut tunngavimmik nalinginnaasumik peqanngilaq. Suliassa qarfimmu immikkut ittumik inatsisiliornermik, eqqarsaatigisassat assingi aallaavigalugit nunanit allanit aningaasaliinernik misissuinissamut periarfissiisunik, aammattaaq pigineqanngilaq.

Nunanit allanit aningaasaliinernut, Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaasutut nalilerneqartunut, Naalakkersuisut akuliunniissaannut inatsisitigut tunngavissaq pilersissallugu siunnersuutip siunertaraa. Tamanna ilaatigut suliassa qarfimmu immikkut ittumik misissuinissamut aaqqissuussinertut ilusilerlugu, § 4-itut siunnersuutigineqartoq malillugu aningaasaliinerit immikkut ittumik malussajasutut nalilerneqartut pillugit, aamma aningaasaliinernut allanut tunngassuteqartumik § 5-itut siunnersuutigineqartoq malillugu suliassa qarfiit assigiinngitsut akornanni misissuinissamik aaqqissuussinikkut, tamanna atortuulersinneqassaaq. Suliassa qarfiit, Kalaallit Nunaanni Namminersorlutik Oqartussanit tiguneqarsimasuniinnerat imaluunniit tiguneqarsimannginnerat apeqqutaatinnagu, nunamit allamit aningaasaliinernut tamanut, inatsisip piumasaqaataanik naammassinnittunut, Inatsisartut inatsisaat atuutissaaq.

Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsinerusinnaasut qulaajarniarlugit, misissuinermit nunamit allamit aningaasaliineq Naalakkersuisut erseqqinnerusumik misissuiffigissavaat.

§ 2-tut siunnersuutigineqartoq siunnersuutip atuuffissaata malippaa, nunanit allanit aningaasaliinernut naammassineqartussatut eqqarsaatigineqartunut tamanut imaluunniit aningaasaliisartunit nunanit allaneersunit naammassineqartunut, siunnersuutip atuunnissaa siunnersuutigineqarluni.

Inatsisartut inatsisaata atuuffissaanut nassuiaatit killilleeqataammata, inatsisartut inatsisaata paasinissaanut nassuiaatinik pisariaqartunik § 3-ssatut siunnersuutigineqartoq nassuiaatitaqarpoq.

Siunnersuut atituumik atuuffissaqartoq, § 3-tut siunnersuutigineqartup malitsigaa.

“Aningaasaliisartoq nunanit allaneersoq” ima paasineqassaaq, inuk, qallunaatut naalagaaffimmi innuttaasutut pisinnaatitaanngitsoq, imaluunniit qallunaatut naalagaaffimmi innuttaasooq, kisianni manna ukiut 5 sioqqullugit aalajangersimasumik Kalaallit Nunaanni najugaqarsimanngitsoq, aamma Kalaallit Nunaanni tamakkiisumik akileraartussaasimanngitsoq aamma manna sioqqullugu ukiut ilivitsut 5 Kalaallit Nunaanni tamakkiisumik akileraartussaataasimasooq, imaluunniit inatsisitigut pisinnaatitaasooq pisussaataasorlu, Kalaallit Nunaanni najugaqanngitsoq, kiisalu nunani oqartussaasut naalagaaffimmilu sullissiviit nunanit allaneersut.

“Nunamit allamit aningaasaliineq”-rup nassuiarneqarnera assigisaanik atituujuvoq, aamma immikkoortorta qarfimmi Kalaallit Nunaanni angerlarsimaffeqartumi piginnittutut piginneqataassutinit imaluunniit taasisinnaatitaanernik minnerpaamik 25 pct.-iusunik toqqaannartumik imaluunniit toqqaannanngitsumik pigisaqarnermik imaluunniit

pissaaneqarfeqarnermik angusineq, immikkoortortaqaqarfimmi Kalaallit Nunaanni najugaqartumi piginnittutut piginneqataassutsip annertussusaanik qaffaaneq imaluunniit taasisinnaatitaanermik toqqaannartumik imaluunniit toqqaannanngitsumik minnerpaamik pingajorarterutinut, 50 pct.-inut, pingajorarterutinut marlunnut imaluunniit 100 pct.-imut qaffaaneq, imaluunniit immikkoortortami Kalaallit Nunaanni angerlarsimaffeqartumi imaluunniit immikkoortortap Kalaallit Nunaanni angerlarsimaffeqartup suliassaqaqarfiini ingerlatsinermut pingaaruteqartuni allakkut toqqaannartumik imaluunniit toqqaannanngitsumik aqutsinermut tunngassuteqartunut, aningaasaqarnermut tunngassuteqartunut, ineriartortitsinermut tunngassuteqartunut imaluunniit ingerlatsinermut tunngassuteqartunut, aalajangiisumik pissaaneqarneq ilaatinneqarput. Aammattaaq Kalaallit Nunaanni suliniutit allat, Kalaallit Nunaata isumannaatsuunissaanut imaluunniit tamat toqqissisimatinneqarnissaanut navianartorsiortitsisinnaasut tiguneqarnerat imaluunniit aallartinneqarnerat ilaatinneqarpoq. Inatsisartut inatsisaat malillugu akuliussinnaanermut periarfissat taamaallaat suliffeqaqarfimmi aningaasaliinernut piviusunut eqquinnnginnissaasa qulakkeerneqarnissaat siunertaavoq, tassami allaanerusunik suliniutitigut amerlasuutigut, Kalaallit Nunaanni suliffeqaqarfimmi piginnittutut piginneqataassutinik pissarsineq apeqqutaatinnagu, Kalaallit Nunaata isumannaatsuunissaanut imaluunniit tamat toqqissisimatinneqarnissaanut navianartorsiortitsineq pisinnaammat.

Nalinginnaasumik nunanit allanit niueqateqarneq imaluunniit nalinginnaasumik nunanit allamiut Kalaallit Nunaanni pigisanik tigussaasunik pissarsisinnaanerat, kisianni siunnersuummi ilaatinneqanngillat.

2.2 Suliassaqaqarfimmi aamma suliassaqaqarfiit assigiinngitsut akornanni misissuinissamik aaqqissuussineq

Suliassaqaqarfimmi immikkut ittumi aamma suliassaqaqarfiit assigiinngitsut akornanni misissuinissamik aaqqissuussineq ataqatigissoq siunnersuutip eqquppaa.

Suliassaqaqarfimmi immikkut ittumi misissuinissamik aaqqissuussineq inatsisissatut siunnersuummi § 4-p malitsigaa. Aningaasaliisoq nunamit allameersoq, suliassaqaqarfiit suliniutillu immikkut ittumik malissarissut iluanni, imm. 2-mi ilaatinneqartuni, nunamit allamit aningaasaliinissamik siunertaqartoq, tamanna sioqqullugu aningaasaliinissamut akuersissuteqarnissaq pillugu Naalakkersuisunut qinnuteqassasoq, tassani takuneqarsinnaavoq. Taamaalilluni aningaasaliisup nunami allameersup siuningaani akuersissuteqarnissaq pillugu qinnuteqarnissamik pisussaaffeqarnera aamma angusinissaa, aalajangersakkap kinguneraa.

Suliassaqarfiit suliniutillu immikkut ittumik malissarissut § 4, imm. 2-mi aalajangersarneqarnissaat siunnersuutigineqarpoq, aamma suliffeqarfiit illersornissamik suliassaqarfimmi, suliffeqarfiit it-kkut isumannaatsuunissamut atuuffeqartut imaluunniit paasissutissat isertuussat sularineqarnerannut suliffeqarfiusut, suliffeqarfiit marloqiusamik atorneqarsinnaasunik nioqqutissiortut (dual-use) aamma suliffeqarfiit teknikkikkut atortorissarutit pingaaruteqartut allat pillugit suliffeqarfiusut ilaatinneqassasut siunnersuutigineqarpoq. Tamatuma saniatigut attaveqaasersuutit pingaaruteqartut, matumani imermik nukissiorfiit, aatsitassanut suliassaqarfik aamma ingerlatseqatigiiffiit Namminersorlutik Oqartussanit pigineqartut ilaatinneqarput.

Suliassaqarfiit suliniutillu killilersorneqarnissaat pillugit Naalakkersuisut malittarisassanik erseqqinnerusunik aalajangersaasinnaapput.

Suliassaqarfiit assigiinngitsut akornanni misissuinissamik aaqqissuussineq siunnersuummi § 5-ip malitsigaa. Aningaasaliisoq nunami allamioq aningaasaliineq, suliassaqarfimmi suliniummilu immikkut ittumik malissarissusilittut § 4-itut siunnersuutigineqartumi allattorneqartuni ilaatinneqanngitsoq, eqqarsaatigineqartoq imaluunniit naammassineqartoq pillugu Naalakkersuisunut nalunaaruteqarsinnaanera, taassuma malitsigaa.

Suliassaqarfiit assigiinngitsut akornanni misissuinissamik aaqqissuussinermut killiliussat aalajangersagassatut siunnersuutigineqartup aalajangersarpai, tamatumalu kingorna aningaasaliisartoq nunami allamioq, Naalakkersuisunit akuersissuteqarnissaq siunertaralugu, nunamit allamit aningaasaliineq pillugu nammineq kajumissutsini malillugu nalunaarutiginnissinnaavoq.

Nalunaaruteqarnissap sularineqarnera nammineq kajumissuseq malillugu sularineqassaaq, aamma nalunaaruteqarneq nunamit allamit aningaasaliinermut eqqarsaatigineqartumut aamma nunamit allamit aningaasaliinernut naammassineqareersunut tunngassuteqarsinnaavoq.

Nalunaaruteqarnikkut aningaasaliisoq – aamma nunanit allanit aningaasaliinerni naammassineqareersuni – oqartussaasut aningaasaliinermik akuersissuteqarsinnaanerannut aamma taamaalilluni tulliusumik Kalaallit Nunaata isumannaatsuunissaanut imaluunniit tamat toqqissisimatinneqarnissaanut eqqarsaatigisassat aallaavigalugit aningaasaliinermut akuliutinnginnissaannik pisariaqartinneqartumik qularnaveeqqummik angusaqarsinnaassaaq. Taamaalilluni § 6-itut siunnersuutigineqartumut siunnersuut atatillugu isiginiarneqassaaq, tassani nunanit allanit aningaasaliinerit, akuerineqartussatut nalunaarutigineqarsimanngitsut, aningaasaliinerup naammassineqarnerata kingorna ukiut 5 tikillugit misissorneqarnissaannut Naalakkersuisut periarfissaqarnissaat siunnersuutigineqarluni.

Nunanit allanit aningaasaliinerit, § 4-mi ilaatinneqanngitsut, aallaaviatigut Naalakkersuisunut nalunaarutigineqarnissaat § 5-itut siunnersuutigineqartup kingunerinngilaa. Aningaasaliisup nunami allameersup, aningaasaliinerup imaluunniit suliniutip Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanera pillugu nalornissuteqartup, akuersissuteqarnissaq pillugu noqqaassuteqarnikkut erseqqissumik paasisaqarsinnaanera, § 5-itut siunnersuutigineqartumi nammineq kajumissuseq malillugu misissuisoqarnissaanik periarfissap aamma § 6-itut siunnersuutigineqartumi nunanit allanit aningaasaliinerit nammineq kajumissuseq malillugu nalunaarutigineqanngitsut misissornissaannut Naalakkersuisut periarfissaqarnissaat siunertarineqarpoq. Tamatuma peqatigisaanik immikkut ittumik suliassa qarfiit suliniutillu malissarissut avataanni nunanit allanit aningaasaliinernut akuliussinnaanermut periarfissaq § 6-itut siunnersuutigineqartup tunniutissavaa.

2.3 Oqartussat piginnaasaat, suleqatigiinnerillu

Inatsit manna malillugu Naalakkersuisut tassaapput oqartussaasut piginnaassuseqartut. Inatsit malillugu Naalakkersuisut tassaasut aalajangigassanik aalajangiisussaasut, taamaalilluni inatsimmi tamarmi aalajangersarneqarpoq. Taamaalilluni suliassa qarfiit sammisallu immikkut malussarissusillit avataanni nunanit allanit aningaasaliinerit nakkutigineqarnissaasa misissorneqarnissaasalu annertussusissaat, Naalakkersuisut aalajangissavaat. Kalaallit Nunaata isumannaatsuunissaanut imaluunniit tamat toqqissisimatinneqarnissaannut nunamit allamit aningaasaliineq navianartorsiortitsisinnaanersoq, tamanna piumasaqaatitigut qanoq ililluni aaqqinneqarsinnaanersoq, aamma nunamit allamit aningaasaliinerup atorunnaarsitsinneqarnissaa pillugu naalakkiutip unioqqutinneqarnerani qanoq ililluni iliuusereriikkanut kinguneqartitsisoqarsinnaanersoq pillugit, Naalakkersuisut tassaapput aamma naliliisussat. Nunat allat oqartussaasuisa ilanngunneqarnissaat pillugit qaqugukkut naleqquttuussanersoq Naalakkersuisut nalilissavaat, matumani Politiit Immikkut Paasiniaasartui (PET) aamma Illersornissaqarfiup Immikkut Paasiniaasartui (FE) ilanngullugit.

Qaqugukkulluunniit naalakkersuisoqarfik inuussutissarsiornermut akisussaasuusoq oqartussaasutut piginnaasaqartutut atuuffik isumagissagaa naatsorsuutigineqarpoq, soorlu aamma naalakkersuisoqarfiup ataani aqutsisoqarfirmik, Inatsisartut inatsisaat manna malillugu suliassanik isumaginnissinnaasussamik, pilersitsisoqarsinnaanera naatsorsuutigineqartoq.

Nunamit allamit aningaasaliineq Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanngippat, nunamit allamit aningaasaliinerup § 4-mi imaluunniit § 5-mi ilaatinneqartup akuersissutigineqarnissaa imaluunniit akuerineqarnissaa pillugu Naalakkersuisut aalajangiisassut, § 8-mi siunnersuutigineqarpoq.

Tamatuma saniatigut aningaasaliineq Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaappat, aamma § 9 malillugu piumasaqaatitigut tamatuma pakkersimaneqarsinnaanera periarfissaasimanngippat, nunamit allamit aningaasaliinerup §§ 4-miit 5 ilanngullugu ilaatinneqartup naammassineqarnissaanut Naalakkersuisunit itigartitsissuteqarnissaat imaluunniit inerteqquteqarnissaat, tamatuma saniatigut siunnersuutigineqarpoq. Siunnersuummi § 8, imm. 2-miit 3 ilanngullugu aalajangersakkat malillugit Naalakkersuisut aamma utaqqiisaagallartumik aalajangiinernik aalajangiisinnaapput.

Nunanit allanit aningaasaliinerup Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiutaasinnaanerata naliliiffigineqarnerani, pissutsit attuumassuteqartut aamma paasissutissat pissarsiarineqarsinnaasut tamarmik eqqarsaatigineqassapput. Tamanna pillugu § 8 tassungalugu oqaaseqaatit innersuussutigineqarput.

Suliamik suliarinninnerminnut atatillugu, nunanit allanit aningaasaliineq Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanersoq nalilerniarlugu, aningaasaliisumit nunamit allameersumit paasissutissat pisariaqartinneqartut tamaasa Naalakkersuisut piumasaqaatigisinnaavaat, soorlu aamma § 12, imm. 1-itut siunnersuutigineqartoq malillugu paasissutissat eqqortuunerat pillugit kukkunersiuisumit, Kukkunersiuisut aamma kukkunersiuiinermik suliffeqarfii akuerisaasut pillugit inatsimmik Kalaallit Nunaannut atuutilersitsineq pillugu peqqussut malillugu akuerisaasumit, aamma aningaasaliisumit nunamit allameersumit attuumassuteqannginnerminik uppersaasumik, nalunaarummik nalunaarusiaq ilaqartinneqassasoq, Naalakkersuisut piumasaqaatigisinnaagaat.

Misissuinissami tunngavimmut naapertuuttumik nliliinermi paasissutissat allat Naalakkersuisut aamma ilaatissinnaavaat, matumani assersuutigalugu paasissutissat, Naalakkersuisut suliamik suliarinninnerminnut atatillugu Kalaallit Nunaanni oqartussaasunit nunallu allat oqartussaasuinit tigusimasaat, aamma paasissutissat tusarfinnit ammasunit pissarsiarineqartut ilanngullugit.

Nunanit allanit aningaasaliinermut akuersissuteqarnissaq pillugu qinnuteqaammik imaluunniit nunanit allanit aningaasaliinerup akuerineqarnissaanut nalunaarummik misissuinerup kingorna, Naalakkersuisut Kalaallit Nunaata isumannaatsuunissaanut imaluunniit tamat toqqissisimatinneqarnissaanut navianartorsiortitsisinnaasunik nassaarpata, kisianni taakku piumasaqaatit, aningaasaliinerup naammassineqarnissaannut erseqqinnerusunik piumasaqaateqarnikkut pitsaalineqarsinnaanersut nalilerneqassaaq. Aningaasaliisartup nunamit allamiup pisussaaffittut tigussallugit neqeroorutigisai, Naalakkersuisut akuerisinnaaneraat, § 9, imm. 1-imut siunnersuut tunngassuteqarpoq. § 9, imm. 2-tut siunnersuutigineqartoq malillugu nunamit allamit aningaasaliinerup akuersissuteqarfiginissaanut imaluunniit akuerinissaanut

piumasaqaatinik illuinnaasiorlutik aalajangersaasinnaanermut Naalakkersuisut aalajangersaasinnaansaata aamma siunnersuutigineqarpoq.

Ilaatigut aningaasaliisoq nunanit allaneersoq piumasaqaatinik isumaqatigiissutigineqartunik eqqortitsinngippat imaluunniit piumasaqaatit eqqortinneqarnerat pillugu ukiumoortumik nalunaarusiamik nassiussinngippat, nunanit allanit aningaasaliineq pillugu akuersissuteqarneq imaluunniit akuersineq pillugu aalajangiinerup allanngortinneqarnissaanut imaluunniit utertinneqarnissaanut Naalakkersuisut periarfissaqassasut, § 10-mi siunnersuutigineqarpoq. Pisuni, taakkunani aalajangiinerup allanngortinneqarsinnaanera imaluunnit utertinneqarsinnaanera pillugu aalajangersagaq taamaallit assersuutininik imaqarpoq.

Aningaasaliinermut akuersissuteqarneq imaluunniit akuersineq pillugu aalajangiineq utertinneqarsimappat, aamma aningaasaliineq Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaappat, imaluunniit nunamit allamit aningaasaliineq itigartitsinermut imaluunniit inerteqquteqarnermut akerliusumik naammassineqarsimappat, § 11, imm. 1-itut siunnersuutigineqartukkut nunanit allanit aningaasaliinerup atorunnaarsinneqarnissaa pillugu Naalakkersuisut naalakkiuteqarsinnaanermik periarfissaqarput. Aningaasaliisoq nunanit allaneersoq inatsisissatut siunnersuummi § 4-mut akerliusumik akuersissuteqarnissaq pillugu qinnuteqarsimanngippat, aamma aningaasaliineq § 11, imm. 2-tut siunnersuutigineqartoq malillugu Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaappat, taamatuttaaq tamanna atuuppoq. Pisuni, taakkunani § 6-itut siunnersuutigineqartoq malillugu Naalakkersuisut nammineerlutik misissuineramik aallartitsineranni, Naalakkersuisut naalakkiutininik taamaattunik naalakkiuteqarsinnaasut, naggataagut siunnersuutigineqarpoq.

2.4 Allaffissornermut aalajangersakkat

Qinnuteqarnernut aamma nalunaaruteqarnernut, matumani § 7-itut siunnersuutigineqartoq malillugu qinnuteqaatit digitaliusumik nassiunneqarnissaat ilanngullugu, ingerlatseriaatsit pillugit Naalakkersuisut erseqqinnersunik malittarisassanik aalajangersaasinnaasut siunnersuutigineqarpoq. Taamaalilluni suliamik suliarinninnertik nammineerlutik Naalakkersuisut aalajangersassagaat aamma qinnuteqaatit il.il. suliarineqarnissaannut piffissaliussanik piffissaliisinnaasut, tamatuma kinguneraa.

Akuersissuteqarnissaq pillugu qinnuteqaatit, nalunaarutiginninnerit, piumasaqaatit pillugit neriorsuinerit, nalunaarusiat il.il., Naalakkersuisunut nassiunneqartut, kalaallisut, qallunaatut imaluunniit tuluttut oqaasertaliorneqassasut, § 17-itut siunnersuutigineqartup malitsigaa.

Qinnuteqaat il.il. tuluttut imaluunniit qallunaatut nassiunneqarpat, qinnuteqaat il.il. kalaallisuunngorlugu nutserneqassasoq, taamaaliortoqarpallu qinnuteqartup imaluunniit nalunaarutiginnittup aningaasartuutit akilissagai, Naalakkersuisut aamma aalajangersinnaavaat.

2.5 Nakkutilliineq

Kalaallit Nunaata isumannaatsuunissaata aamma tamat toqqissisimatinneqarnissaasa navianartorsiortinneqarnissaasa pitsaaliorneqarnissaannut tunngatillugu, nunanit allanit aningaasaliinerit misissorneqarneri siunertarineqartutut sunniuteqassappata, misissuinerup aningaasaliinerit, siunnersuummi ilaatinneqartut, piumasaqaatit aalajangersarneqartut naapertorlugit naammassineqarnissaannut, sunniuteqarluartumik nakkutiginninnermik malitseqartinneqarnissaat pingaaruteqarluinnarpoq.

Tamanna tunngavigalugu nunanit allanit aningaasaliinerit siunnersuummi ilaatinneqartut Naalakkersuisut nakkutilliivigissagaat aamma tamanna pillugu malittarisassanik erseqqinnerusunik aalajangersaasinnaasut, § 13, imm. 1-imi siunnersuutigineqarpoq. Aalajangersagassatut siunnersuutigineqartoq malillugu assersuutigalugu akuersissuteqarnissamik qinnuteqaammi aamma akuerineqarnissamik noqqaassumi paasissutissat eqqortuunerat, piumasaqaatit isumaqatigiissutigineqartut imaluunniit akuersissutini aalajangersarneqartut eqqortinneqarnerat aamma nalinginnaasumik nunanit allanit aningaasaliinerit pillugit, taakkunani akuersissummik qinnuteqartoqarsimanani imaluunniit akuerineqarnissamik noqqaassuteqartoqarsimanani, Naalakkersuisut nakkutilliisinnaassapput.

Tamanna pisariaqartinneqartutut nalilerneqarpat, Naalakkersuisut aamma oqartussaasut allat sinniisaat nakkutilliinnermut- aamma nakkutiginninnermut atasumik suliaqarnerminnut atugassaminnik, pisariaqartumik qanoq iliorsinnaanermut uppersaateqarlutik aamma eqqartuussivimmit aalajangiinertaqanngitsumik inuussutissarsiornermut tunngasumik ininut aamma assartuutitut isersinnaatitaassasut, aammattaaq § 13, imm. 2-mi siunnersuutigineqarpoq.

Kalaallit Nunaanni immikkoortortat aamma aningaasaliisartut nunanit allaneersut tamatuma saniatigut imm. 2 malillugu nakkutilliinnermut- nakkutiginninnernullu suliaassat sunniuteqarluartumik naammassineqarnissaannut ikiutissapput, matumani paasissutissanik attuumassuteqartunik tunniunnerit, inuussutissarsiornermut tunngasumik ininut aamma assartuutitut isersinnaatitsineq aamma § 13, imm. 3-tut siunnersuutigineqartoq malillugu nakkutilliartornermi ikiuunneq ilanngullugit.

Tamanna naleqquttutut isigineqartillugu, Inatsisartut inatsisaat malillugu nakkutilliinerup aallartinneqarnissaa imaluunniit aallartinneqarsimanera, nakkutilliinermit inerniliussat aamma aalajangiinernut allanut assigisaanik, Naalakkersuisut tamanut saqqummiussinnaasut, § 14-imi siunnersuutigineqarpoq.

2.6 Iliusereriikkanut kinguneqartitsinerit

Inatsisartut inatsisaata sunniuteqarluartumik sunniuteqarnissaa eqqarsaatigalugu iliusereriikkanut kinguneqartitsinerit, nunanit allanit aningaasaliisunut, § 8-tut siunnersuutigineqartumik aamma § 11 malillugu naalakkiuteqarnermik itigartitsissummik imaluunniit inerteqquteqarnermik malinninngitsunut, aalajangersarneqarnissaat siunnersuutigineqarpoq.

Nunanit allanit aningaasaliineq, isumaqatigiisummit tunngaveqartoq, itigartitsinermut, inerteqquteqarnermut imaluunniit naalakkiuteqarnermut akerliusumik isumaqatigiissutigineqartoq imaluunniit attanneqartoq, akuusut akornanni atuutussaassuseqassanngitsaq, tamanna tunngavigalugu § 20, imm. 1-imi siunnersuutigineqarpoq.

Atortussaannngitsumik isumaqatigiisummut inatsisitigut sunniutit atortussaa junnaarsitsinermit sunniutit pillugit malittarisassat nalinginnaasut malippai, matumani akuusut akornanni akilersuutit utertinneqarnerisa pineqarnerat ilanngullugit.

§ 20, imm. 2-tut siunnersuutigineqartoq malillugu, suliniummut, nunamit allamit aningaasaliinermit tunngassuteqartumut, akuersissutip Kalaallit Nunaanni oqartussaasunit atulersinneqartup atorunnaarsinneqarnissaanut Naalakkersuisut periarfissaqarnissaat, aammattaaq siunnersuutigineqarpoq.

§ 11 malillugu nunamit allamit aningaasaliinerup atorunnaarsinneqarnissaa pillugu naalakkiut malinneqanngippat, siunnersuummi § 21 malillugu suliffeqarfimmi Kalaallit Nunaanni najugaqartumi, aamma nunanit allanit aningaasaliisup pineqartup naalakkersugaani, piginnittutut piginneqataassutip taasisinnaatitaanermut attuumassuteqartoq atorunnaarsinniarlugu Naalakkersuisut, Danmarkimi Erhvervsstyrelsimut saaffiginnissuteqarsinnaapput. Kisianni Erhvervsstyrelsimi immikkut ittumik periarfissaliisummik peqartoqarnissaa piumasaqaataavoq, taannalu massakkuugallartoq pilersinneqarsimanngilaq. Periarfissaliisummik piumasaqaataasumik pilersitsinissamut naalagaaffimmi inatsisip akuersissutigineqarnissaa naatsorsuutigineqarpoq. Naalakkersuisut noqqaassuteqarnerisa kingorna Erhvervsstyrelsip taasisinnaatitaanermut atorunnaarsinneqarnissaanut periarfissaq taamaallaat atorsinnaagaa, naatsorsuutigineqarpoq. Taamaalilluni Inatsisartut inatsisaat malillugu Erhvervsstyrelsi nammineerluni pisinnaatitaanngilaq.

3. Pisortanut aningaasaqarnikkut, allaffissornikkullu kingunerisassat

Misissuinissamik aaqqissuussinerup pilersinneqarneranut ingerlanneqarneranullu siunnersuut Naalakkersuisunut annertuumik, massakkut killissarititaasut iluannit akilerneqarsinnaanngitsunik, aningaasartuutaassasoq nalilerneqarpoq.

Sulianik suliarinnittussanut immikkoortortaqaarfiup nutaap sananeqarneranut aamma ingerlaavartumik sulianik suliarinninnermut, inatsisilerinnermut tunngasumik piginnaasaqarnernut, ilitersuinernut nakkutilliinernullu, isumalluutinik pisariaqartitsinnermut pingaarnertut aningaasartuuteqarnissami pineqarput. Sulianik suliarinninnermut atugassanik paasissutissanik katersivinni avataaneersuni namminerisamik pigineqartunut aningaasartuutit ingerlatsinermullu aningaasartuutit tassunga ilaapput. Taakkua saniatigut IT-kkut sulianik suliarinninnermut systemip, annertooujussuarmik atortussanik isertugaataasunik isumaginnissinnaasup, ineriartortinneqarnissaanut ingerlanneqarnissaanut atasunik aningaasartuuteqassaaq.

Aaqqissuussinissatut siunnersuutigineqartumut siunnersuutip Naalakkersuisunut ukiumoortumik 2,0 mio.kr.-it 3,0 mio.kr.-illu eqqanni aningaasartuuteqarnerunermik kinguneqarnissaa, kiisalu IT-kkut systemit, IT-p ineriartortinneqarnerannut, ingerlatseqatigiiffiit paasissutissanik katersiviinut isersinnaanernut aamma aserfallatsaaliuinnerut il.il. ingerlanneqarnerannut ukiumoortumik 1,0 mio.kr.-inik atuinnissamik kinguneqarnissaa missiliorneqarpoq.

Namminneq akisussaaffimminnit ilaatigut aningaasaliinissamut misissuinissat pillugit suliat piviusut pillugit tusarniaanerit akissuteqarfiginerinik suliarinninnernut, oqartussaasut allat aammattaaq ikiutaasussaapput. Suliassat taamaattut suliassanit allanit pilersinneqartut, oqartussasunut attorneqartunut aningaasartuuteqarnerunermik kinguneqarnissaat naatsorsuutigineqarpoq.

Aningaasartuutitut, Inatsisartut inatsisaat aamma malittarisassat taassuminnga atulersinneqartut malillugit manna malillugu oqartussaasut oqartussaasutut suliarinninnerannut atasunut, akiliutip akilerneqarnissaa pillugu Naalakkersuisut malittarisassanik aalajangersaanissamut piginnaatinneqarnissaannik siunnersuut imaqarpoq. Inatsissatut siunnersuutip kingunerisaanik ningaasartuutaanerusut ilaannik akiliusit aningaasalersuisinnaanerit naatsorsuutigineqarpoq.

4. Inuussutissarsiutinut aningaasaqarnikkut, allaffissornikkullu kingunerisassat

Nunanit allanit aningaasaliisoq tassaassasoq nunanit allanit aningaasaliinernut il.il. akuersissummik qinnuteqartussaassasoq imaluunniit nalunaarummik tunniussisussaasoq, siunnersuummi takuneqarsinnaavoq. Kalaallit Nunaanni suliffeqarfinnut siunnersuut toqqaannartumik aningaasatigut imaluunniit allaffissornikkut kinguneqassanngitsoq, taamaammat nalilerneqarpoq.

Taamaattoq Kalaallit Nunaanni aningaasaliiniarnermut siunnersuut pitsaanngitsumik kinguneqarsinnaasoq nalilerneqarpoq. Aaqqissuussinerit assingusut taamaattoq nunani allani aamma annertunerujartortumik siuariartortut ilisimaneqarput, taamaattoqarneralu sunniinerup annikillisinneqarnissaanut naatsorsuutigineqarpoq.

Siunnersuutip aningaasaqarnikkut allaffissornikkullu inuussutissarsiortunut toqqaannanngitsumik ilaatigut kinguneqarsinnaanissaa, taamaattoq nalilerneqarpoq. Suliani piviusuni piumasaqaatinik sukanninnginnerusunik isumaqatigiissuteqarneq imaluunniit aalajangiineq, pissarsiap akiata aalajangersarneqarneranut ajortumik sunniuteqartut ilusilimmik aamma taamaammat Kalaallit Nunaanni suliffeqarfiup aningaasaliinermut iluanaarutaanut toqqaannanngitsumik kinguneqartitsisinnaavoq. Tamatuma saniatigut ingerlatsinissamik isumaqatigiissutit il.il. misissuiffigineqarneri, Kalaallit Nunaanni niuerfimmi nunanit allanit sullissinissamik tuniniaasut sunnerneqarnerisigut, toqqaannanngitsumik kinguneqartitsisinnaapput, taamaattoqarneratalu taamaalilluni unammilleqatigiinneq ajortumik sunnersinnaavaa, aamma taamaammat akit aalajangersarneqartarnerat sunnersinnaallugu.

Ilaatigut akuersissutitut piumasaqaatit eqqortinneqarnerannik nakkutilliinissamut periarfissaq aaqqissuussinikkut aammattaaq eqqunneqassaaq. Nakkutilliineq Kalaallit Nunaanni suliffeqarfinnut allaffissornikkut annikinnerusunik aamma pingaaruteqanngitsunik kinguneqarsinnaanera naatsorsuutigineqarpoq, taakkulu aningaasaliisumit nunami allamiumit paasissutissat uppersarsarniarlugit paasissutissanik piumaffigineqarsinnaassapput, aamma pisuni immikkut ittuni nakkutilliiffiartorneqarsinnaassallutik.

5. Avatangiisinut, pinngortitamut, inuillu peqqissusaannut kingunerisassat

Avatangiisinut, pinngortitamut inuillu peqqissusaannut siunnersuut kinguneqassanngilaq.

6. Innuttaasunut kingunerisassat

Innuttaasunut siunnersuut kinguneqassanngilaq.

7. Kingunerisasst pingaarnert allat

Kingunerisassanik pingaarnernik allanik siunnersuut kinguneqanngilaq.

8. Oqaartussaasut, suliniaqatigiiffiit il.il. tusarniaavigineqarnerat

Siunnersuut piffissami 15. august 2025-imit, 13. oktober 2025-mut Naalakkersuisut tusarniaavianni tamanit takuneqarsinnaasimavoq, soorlu aamma siunnersuut piffissami tassani tulluuttunut tusarniutigineqarsimasoq:

- Naalakkersuisut Siulittaasuata Naalakkersuisoqarfia
- Aningaasaqarnermut Akileraartarnermullu Naalakkersuisoqarfik
- Nunanut Allanut Ilisimatusarnermullu Naalakkersuisoqarfik
- Aalisarnermut, Piniarnermut, Nunalerinermut Imminullu Pilersornermut Naalakkersuisoqarfik
- Ineqarnermut, Attaveqaasersuutitut Isorliunerusunullu Naalakkersuisoqarfik
- Ilinniartitaanermut, Kulturemut, Timersornermut Ilageeqarnermullu Naalakkersuisoqarfik
- Meeqqanut, Inuusuttunut Ilaqutariinnullu Naalakkersuisoqarfik
- Isumaginninnermut, Suliffeqarnermut Nunamullu Namminermut Naalakkersuisoqarfik
- Pinngortitamut Avatangiisinullu Naalakkersuisoqarfik
- Peqqissutsimut Inunnnullu Innarluutilinnut Naalakkersuisoqarfik
- Statsministereqarfimmut
- Finansministereqarfimmut
- Udenrigsministereqarfimmut
- Inatsisit Atuutsinneqarnerannut ministereqarfimmut
- Erhvervsministereqarfimmut
- Erhvervsstyrelsimut
- A-revisionimut
- Advokatfirmaet Malling & Hansen Damm-imut
- Avannaata Kommunianut
- Bankivimmut
- Nuummi BDO Statsautoriseret Revisionsaktieselskabimut
- BK Revision ApS-imut (Qaqortoq)
- Atuisartoqarnermut Unammilleqatigiinnermullu Aqutsisoqarfimmut
- Sulisitsisunut GE-mut (Grønlands Erhverv)
- Grønlands Revision A/S-imut
- Grønlandsbankimut
- Nunatsinni Advokatinut
- Kirk Larsen & Ascanius Greenland-imut
- KNAPK-mut
- Kommune Kujallermut
- Kommune Qeqertalimmut
- Kommuneqarfik Sermersuumut
- Nalik Ventures A/S-imut
- Nuna Law-imut
- Paulsen | Keldsen-imut
- Qeqqata Kommunianut
- Revisoren i Sisimiut-nut
- SIK-mut (Sulinerimik Inuussutissarsiuteqartut Kattuffiannut)
- SISA-mut

- Transparency International Greenland-imut
- Visit Greenland A/S-imut

Tusarniaanermut akissutini tiguneqartuni pingaarnert ilanngussaq 1-imi imaqarnersiorlutillu oqaaseqarfigineqarput.

Siunnersuummi aalajangersakkanut ataasiakkaanut oqaaseqaatit

§ 1-imut

Aningaasaliinernut taamaattunut misissuinikkut aamma taamaattoqassappat akuliunnikkut, nunanit allanit aningaasaliinerit Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortinneqarnissaasa pitsaaliorneqarnissaat, Inatsisartut inatsisaata siunertarissagaa, imm. 1-imi siunnersuutigineqarpoq.

Nunanit allanit aningaasaliinerit, Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaasutut nalilerneqartut, oqartussaasunit akuliuffigineqarsinnaanerannut inatsisitigut tunngavissap pilersinneqarnissaa, siunnersuutikkut siunnersuutigineqarpoq. Ilaatigut suliaasaqarfinnut immikkut ittunut misissuisarnissamik aaqquissuussinertut ilusilimmik, tassani suliaasaqarfinni suliniutinilu nunanit allanit aningaasaliinerit, § 4-tut siunnersuutigineqartoq malillugu immikkut ittumik malissarissusilittut nalilerneqartuni, ilaatigullu § 5-itut siunnersuutigineqartoq malillugu nunanit allanit aningaasaliinernut tunngassuteqartunut suliaasaqarfiit assigiinngitsut akornanni misissuisarnissamik aaqquissuussinertut ilusilimmik, tamanna atugassanngortinneqassaaq.

Nunanit allanit aningaasaliinerit nalilersuiffigineqarnissaannik, misissorneqarnissaannik, akuerineqarnissaannik, piumasaqaateqarfigineqarnissaannik, inerteqquteqarfigineqarnissaannik imaluunniit atorunnaarsitsinissamik naalakkiuteqarfigineqarnissaannik, “misissuineq” ingerlatseriaatsitut paasineqassaaq.

Kalaallit Nunaata isumannaatsuunissaa imaluunniit tamat toqqissisimatinneqarnissaat eqqarsaatigalugit, nunanit allanit aningaasaliinerit taamaallaat akuliuffigineqarsinnaasussaapput. “Kalaallit Nunaata isumannaatsuunissaa” aamma “tamat toqqissisimatinneqarnissaat” pillugit oqaatsit imarisaasa paasineqarnissaat pineqartillugit, siunnersuummi § 3 aamma tassunga oqaaseqaatit innersuussutigineqarput.

Inatsisartut inatsisaat nunanit allanit aningaasaliinernut atuutissasoq siunnersuutigineqarpoq. Taamaalilluni aningaasaliinerit suussusaannut atituunut imaluunniit aalajangikkanut allanut, immikkoortortaqarfimmi Kalaallit Nunaanni angerlarsimaffeqartumi pissaaneqarfeqarnermik imaluunniit sunniuteqarsinnaanermik kinguneqartunut, imaluunniit Kalaallit Nunaanni suliniutitut allanut, Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaasunut, Inatsisartut inatsisaat atuutissaaq. Tamanna pillugu siunnersuummi § 3, nr. 5 aamma tassunga oqaaseqaatit innersuussutigineqarput.

§ 2-mut

Aningaasaliineq aningaasaliisartunit nunanit allaneersunit nunanit allanit aningaasaliinernut eqqarsaatigineqartunut imaluunniit naammassineqartunut, Inatsisartut inatsisaat manna atuutissasoq, § 2-mi siunnersuutigineqarpoq.

Sumi nunami angerlarsimaffeqarnerat imaluunniit najugaqarnerat apeqqutaatinnagu, aalajangersagaq malillugu aningaasaliisartunut nunanit allaneersunut Inatsisartut inatsisaat atuuppoq, matumani aamma aningaasaliisartoq nunanit allaneersoq Kalaallit Nunaanni angerlarsimaffeqarpat imaluunniit aalajangersimasumik ingerlatsiveqarpat. Taamaalilluni pisuni, taakkunani immikkoortortaqarfik Kalaallit Nunani angerlarsimaffeqarani, aamma taakkunani immikkoortortaqarfik Kalaallit Nunaanni angerlarsimaffeqarluni, kisianni suliffeqarfiulluni ingerlatseqatigiiffittut piginnittumit aalajangiisutut sunniuteqarfigineqartoq imaluunniit nunamit allamit suliffeqarfiup immikkoortortaqarfiulluni, imaluunniit, tamanna pillugu inatsisissatut siunnersuummi § 3 tassungalu oqaaseqaatit malillugit, nunamit allamit aningaasaliisoq allakkut Kalaallit Nunaanni immikkoortortami pissaaneqarfeqarpat imaluunniit annertuumik sunniuteqarpat, Inatsisartut inatsisaat aamma atuutissaaq.

§ 3-mut

Inatsisartut inatsisaata paasineqarnissaanut qitiutinneqartussanik, kisianni aamma qaqugukkut misissuinissamik aqqissuussinerup atorneqarnissaanut tunngatillugu, kiisalu Kalaallit Nunaata isumannaatsuunissaa imaluunniit tamat toqqissisimatinneqarnissaa innersuussutigalugu qaqugukkut akuliuttoqarsinnaanersoq pillugit, Inatsisartut inatsisaata atuuffissaanut nassuiaanerit arlallit aalajangersagassatut siunnersuutigineqartup kingunerai.

Nr. 1-imut

Iluseq aqqissuussinermut atorneqartoq apeqqutaatinnagu, suliffeqarfik inuussutissarsiutilik aamma suliffeqarfik inuussutissarsiutiginnagu suliffeqarfiusoq, pisortani oqartussaasut, aningaasaateqarfiit,

peqatigiiffiit, sullissiviit il.il. “immikkoortortaqarfik”-ttut paasineqassasut, § 3, nr. 1-imi siunnersuutigineqarpoq.

Nr. 2-mut

Pissutsit Kalaallit Nunaata nunakkut, immakkut imaluunniit silaannakkut killeqarfiisa innarligassaanninnerannut innuttaasullu ataannarnissaanut tunngassuteqartut, iliuutsit, Kalaallit Nunaata attaveqarfiinut soqutigisaanullu akornusersuinissamik navianartorsiortitsisut imaluunniit navianartorsiortitsisinnaasut, aamma iliuutsit Kalaallit Nunaannut ajoqusiinissamik siunertaqartut, “Kalaallit Nunaata isummaatsuunissaa”-tut paasineqassasut, nr. 2-mi siunnersuutigineqarpoq.

Nr. 3-mut

Pissutsit, matumuuna Kalaallit Nunaata isumannaatsuunissaanut sunniuteqartinnagit, Kalaallit Nunaata, inuinnaat naalakkersueqataanerannut aamma inuiaqatigiit isumannaatsuunissaasa attassinissaanut tunngassuteqartut, “tamat toqqissisimatinneqarnissaat”-ttut paasineqassasut, nr. 3-mi siunnersuutigineqarpoq.

Pinerluttuliornerit ilungersunartut allat, pinerluttulerinermi inatsimmi kapitali 7-imi aamma 8-mi ilaatinneqartunit allaaneruset, kisianni aamma, matumuuna Kalaallit Nunaata isumannaatsuunissaa navianartorsiortinneqanngikkaluartoq, tamat toqqissisimatinneqarnissaannut annertuumik navianartorsiortitsisinnaasut, pineqarsinnaapput.

Tamatuma saniatigut, suliniutinut isumannaatsuunissamut navianartorsiortitsisut pitsaaliorneqarnissaannut, qulaajaavigineqarnissaannut aamma akiorneqarnissaannut piginnaasaqarnermut, aamma inuiaqatigiinni tamanit oqartussaaqataaffiusuni tunngaviumik malittarisassanut naleqartitanullu naapertuuttumik isumannaatsuutitsinissamut suliniutit naammassineqarnissaannut piginnaasaqarneq, tamat toqqissisimatinneqarnissaannik eqqarsaatiginninnermut tunngassuteqarsinnaapput.

Tamat toqqissisimatinneqarnissaannut navianartorsiortitsinerni ilaatigut iliuutsit, nr. 2 malillugu ima suussuseqanngillat Kalaallit Nunaata isumannaatsuunissaanut attuillutik, kisianni inuiaqatigiit nalinginnaasumik ingerlasinnaaneranut sunniisinnaallutik, assersuutigalugu attaveqaasersuutit pingaaruteqartut, inuiaqatigiinni toqqissisimanissap isumannaatsuunissallu attanneqarnissaanut inuiaqatigiinni ingerlasinnaanerannut annertuumik pingaaruteqartut sunnerneqarnerisigut, assersuutigalugu nukissiuutinik- imaluunniit imermik pilersuinerup iluani, imaluunniit tusagassiuutit tusagassioortullu arlaannaannulluunniit attuumassuteqanngitsut sioorasaarneqarnerisigut.

Assersuutit tamakkiisuunngimmata maluginiarneqassaaq, tassami tamat toqqissisimatinneqarnissaannut eqqarsaatiginninneq pissutsit piviusut malillugit, suliaasaqarfinnut, inuiaqatigiinnut tunngasumik aamma isumannaatsuunissamut tunngasumik annertuumik pingaaruteqartunut, aamma tunngassuteqarsinnaapput.

Nr. 4-mut

Nr. 4-tut siunnersuutigineqartumi, “Nunanit allanit aningaasaliineq”ima nassuiarneqarpoq:

- a) Immikkoortortami Kalaallit Nunaanni angerlarsimaffeqartumi, piginnittutut piginneqataassutinik imaluunniit taasisinnaatitaanernik minnerpaamik 25 pct.-iusunik toqqaannartumik imaluunniit toqqaannanngitsumik pigisaqarnermik imaluunniit pissaaneqarfeqarnermik angusineq.
- b) immikkoortortami Kalaallit Nunaanni angerlarsimaffeqartumi, piginnittutut piginneqataassutsip annertussusaanik imaluunniit taasisinnaatitaanernik toqqaannartumik imaluunniit toqqaannanngitsumik minnerpaamik pingajorarterutinut, 50 pct.-inut, pingajorarterutinut marlunnut imaluunniit 100 pct.-imut qaffaaneq imaluunniit pissaaneqarfeqarneq, imaluunniit
- c) immikkoortortami Kalaallit Nunaanni angerlarsimaffeqartumi imaluunniit immikkoortortap Kalaallit Nunaanni angerlarsimaffeqartup suliaasaqarfiini ingerlatsinermut pingaaruteqartuni allakkut toqqaannartumik imaluunniit toqqaannanngitsumik aqutsinermut tunngassuteqartunut, aningaasaqarnermut tunngassuteqartunut, ineriartortitsinermut tunngassuteqartunut imaluunniit ingerlatsinermut tunngassuteqartunut, aalajangiisumik pissaaneqarneq kiisalu
- d) Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisumik Kalaallit Nunaanni suliniummik allamik tigusineq imaluunniit aallartitsineq.

Pissaaneqarfeqarneq toqqaannartuusinnaasoq imaluunniit toqqaannanngitsuusinnaasoq, imaappoq suliffeqarfiit allat aqqutigalugit, taamaattoqassappallu nunani assigiinngitsuni allanit, piginnittutut uiguleriiaartut taaneqartartut aqqutigalugit tamanna pisinnaasoq, naqinneq a-mi nassuiaatissatut siunnersuutigineqartup kinguneraa. Aammattaaq suliffeqarfimmik pilersitsinermi nassuiaat aamma atorneqassaaq.

Pissarsineq qanoq pisimanersoq apeqqutaanngilaq. Taamaalilluni taasisinnaatitaanerit, aningaasaatit, immikkut ittumik pisinnaatitaanerit pissarsiarineqarnerat, kattunnerit, avitsinerit, pisiariortuinerit, matumani tigusinerit, tamakkiisumik imaluunniit ilaannakoortumik niuerfimmik suliaasaqarfiusumik tigusinerit aamma »asset deals-inik (suliffeqarfinnik pisinernik)« taaneqartartut, suliffeqarfiup pingaarnertut pigisaanik nalilinnik imaluunniit ataqatigiisumik ingerlatsinera ilaatinneqarlutik, nassuiaanermi ilaatinneqarput.

Piginnittutut piginneqataassutsip piviusup annertussusaanik imaluunniit taasisinnaatitaanernik agguagarsiat agguagarsianit suli allanit pissarsinikkut minnerpaamik pingajorarterummik, 50 pct.-imik, pingajorarterutunik marlunnik imaluunniit 100 pct.-imik qaffanneqarpata, Inatsisartut inatsisaat atuutissasoq, naqinneq b-mi nassuiaatissatut siunnersuutigineqartup kinguneraa.

Naqinneq c-tut siunnersuutigineqartoq malillugu immikkoortortami Kalaallit Nunaanni angerlarsimaffeqartumi imaluunniit immikkoortortap Kalaallit Nunaanni angerlarsimaffeqartup suliaasaqarfiini ingerlatsinermut pingaaruteqartuni allakkut toqqaannartumik imaluunniit toqqaannanngitsumik aqutsinermut tunngassuteqartunut, aningaasaqarnermut tunngassuteqartunut, ineriartortitsinermut tunngassuteqartunut imaluunniit ingerlatsinermut tunngassuteqartunut, aalajangiisumik pissaaneqarnermik angusineq, Inatsisartut inatsisaata atuuffissaani ilaatinneqarpoq.

»Aallakkut« toqqaannartumik imaluunniit toqqaannanngitsumik aqutsinermut tunngassuteqartunut, aningaasaqarnermut tunngassuteqartunut, ineriartortitsinermut tunngassuteqartunut imaluunniit ingerlatsinermut tunngassuteqartunut, aalajangiisumik pissaaneqarnermik angusineq, atituutut paasineqassaaq, aamma ilaatigut pigisanik nalilinnik pisinerit, taarsigassarsiat sivisuumik akilersugassat imaluunniit taamaatiinnarneqarsinnaanngitsut, attartornissaq pillugu isumaqatigiissutit, ingerlatsinissaq pillugu isumaqatigiissutit, tunniussinissaq pillugu isumaqatigiissutit aamma ilisimatusarneq pillugu suleqatigiinnerit ilaatinneqarsinnaapput.

Naliginnaasumik aqutsisut aalajangigaannut tunngatillugu aalajangiisuusumik pissaaneqarneq taamaallaat nassuiarneqanngilaq, taamaalilluni ingerlatseqatigiiffiit inatsiseqartinneqarneranni pissaaneqarfeqarnerup nassuiarneqarnera ilisimaneqarpoq, kisianni aamma aningaasaqarnermut-, ineriartortitsinermut- imaluunniit ingerlatsinermut immikkoortorta qarfimmi pissutsinut tunngasumik aalajangiisuusumik pissaaneqarnertut ilisimaneqarluni. Aningaasaliisoq nunanit allaneersoq pissutsini taaneqartuni taamaallaat ataasiinnarmi aalajangiisuusutut pissaanermik angusisussatut nalilerneqarpat, nassuiaanertut siunnersuutigineqartoq malillugu aalajangiisuusumik pissaaneqarneq pineqassaaq, aamma naak pissaaneqarneq nalinginnaasumik immikkoortorta qarfiup aqunneqarneranik ilaatitsinngikkaluartoq.

Taamaattoq immikkoortorta qarfiup pissutsinut taaneqartunut aalajangiinera aalajangiisuusumik pissaaneqarnermut tunngatinneqassaaq, aamma taamaalilluni aqutsisunut tunngatillugu pissaaneqarfeqarneq pineqassaaq. Aningaasaliisup nunamit allameersup pissutsinut ilaatinneqartunut immikkoortorta qarfimmi sunniuteqaqataasinnaanermik angusinera naammannaviannngilaq, tassami aalajangiisuusumik pissaaneqarneq pineqartussaavoq, imaappoq immikkoortorta qarfiup pissutsit pineqartut pillugit aqutsinermut tunngatillugu piginnaasaqarneq tunniutissammagu.

Oqaasertaliorneqarnissaanut siunnersuutigineqartoq malillugu aalajangiisuusumik pissaaneqarneq immikkoortortaqarfimmi suliassaqaqfinnut ingerlatsinermut pingaaruteqartunut tunngassuteqarnera naammappoq. Aalajangiisuusumik pissaaneqarneq taamaalilluni immikkoortortaqarfimmut tamarmiusumut imaluunniit immikkoortortaqaqfiup ineriartortitsinermik suliniutaanut tamanut imaluunniit ingerlatsineranut pissutsinut tunngassuteqarnissaa pisariaqanngilaq. Aningaasaliisartoq nunamit allameersoq ineriartortitsinermik suliniummut ataatsimut, immikkoortortaqaqfiup siunissami alliatornissaanut periarfissaanut pingaaruteqartumut, naalakkersuisinnaaneq anguppagu, nassuiaanissatut siunnersuutigineqartoq malillugu aalajangiisuusumik pissaaneqarneq pineqassaaq. Aningaasaliisartoq nunamit allameersoq ingerlatsinermut atuuffimmik, immikkoortortaqaqfiup ataatsimut ingerlatsineranut pingaaruteqartumik aalajangiisuusumik pissaanermik angusippat, tamanna aamma pissaq.

Tamatuma saniatigut aningaasaliisartoq nunamit allameersoq, assersuutigalugu ingerlatsinissamik isumaqatigiissummik assigisaanilluunniit immikkoortortaqarfimmik, pisiortorfimmit allamit ajornakusoortumik taarserneqarsinnaasumik, Kalaallit Nunaanni angerlarsimaffeqartumik isumaqatigiissuteqarsimappat, imaluunniit isumaqatigiissut ukiunut arlalinnut taamaatinneqarsinnaanngitsutut pissuseqartumik aamma taamaammat sivilisumik atavallaarnermik kinguneqartumik, isumaqatigiissuteqarsimappat, aalajangiisuusumik pissaaneqarneq pineqarsinnaavoq. Aamma, aningaasaliisartoq nunamit allameersoq isumaqatigiissutip malitsigisaanik assersuutigalugu Kalaallit Nunaanni immikkoortortaqarfimmi timitalerlugu imaluunniit elektroniskiusumik ingerlatsinerup imaluunniit ingerlatsinermi pingaaruteqartunik ingerlatsinerup ilaanik akornusersuineramik akuliussinnaappat, aamma tamanna Kalaallit Nunaata isumannaatsuunissaanut imaluunniit tamat toqqissisimatinneqarnissaannut pingaaruteqarpat, aalajangiisuusumik pissaaneqarneq pineqarsinnaavoq.

Kalaallit Nunaanni suliniummik allamik, Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaasumik, tigusineq imaluunniit aallartitsineq, naqinneq e-tut siunnersuutigineqartumi ilaatinneqarpoq.

Pisuni, taakkunani Kalaallit Nunaanni suliniummik allamik, Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaasumik, tigusineri imaluunniit aallartitsineri, naqinneq d-tut siunnersuutigineqartoq atuutissaaq, kisianni immikkoortortaqarfimmut Kalaallit Nunaanni angerlarsimaffeqartumut naqinneq a-miit c ilanngullugu ilaatinneqartumut, tamatuma peqatigisaanik piginninneq, naalakkiisinnaaneq imaluunniit aalajangiisuusumik pissaaneqarneq taakkunani anguneqarani.

Taamaalilluni suliniutinut allanut, siunnersuutip allakkut atuuffissaata avataaniittunut, kisianni Kalaallit Nunaata isumannaatsuunissaanut imaluunniit tamat toqqissisimatinneqarnissaannut taamatuttaaq navianartorsiortitsisunut, akuliunnissamut aalajangersagaq atorsinnaatitaavoq.

Aalajangersakkap atuuffissaa atituumik paasineqassaaq aamma aningaasatigut aalajangiinerit suugaluartulluunniit ilaatissinnaavai, matumani ilisimatusarnek- aamma nutaaliorneq pillugit suleqatigiinnerit, sumiiffinni pingaaruteqartuni pigisanut nuunneqarsinnaanngitsut naalakkiisinnaaneq aamma pissaaneqarneq, suliniutit, akuersissutinik pissarsinerit il.il. Assersuutigalugu pisoq tassaasinnaavoq, immikkoortortaqarfimmik Kalaallit Nunaanni angerlarsimaffeqartumik pilersitsisoqarani imaluunniit tigusisoqarani, aamma malittarisassat malillugit akuersissutip atuutilersinneqarsimasup, Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanera eqqarsaatigalugu, tunniunneqarnissaa pitsaaliorneqarsinnaanani.

Nr. 5-imut

“Aningaasaliisarteq nunamit allameersaq” ima paasineqassasoq, inuk, qallunaat naalagaaffianni innuttaasutut pisinnaatitaanngitsaq, imaluunniit qallunaat naalagaaffianni innuttaasutut pisinnaatitaasaq, kisianni ukiut 5 sioqqullugit Kalaallit Nunaanni aalajangersimasumik najugaqarsimanngitsaq, aamma Kalaallit Nunaannut tamakkiisumik akileraartussaataitaanngitsaq aamma ukiut ilivitsut 5 sioqqullugit Kalaallit Nunaannut tamakkiisumik akileraartussaataitaasimasaq, imaluunniit inatsisitigut pisinnaatitaasaq pisussaataitaasorlu, Kalaallit Nunaanni angerlarsimaffeqanngitsaq, kiisalu nunani oqartussaasut aamma nunani allani naalagaaffiup sullissivii, nr. 5-imi siunnersuutigineqarpoq.

Inatsisitigut pisinnaatitaasut pisussaataitaasullu, aningaasaliisarteq nunamit allameersaq nunami sumi angerlarsimaffeqarnerisapeqqutaatinnagu, Kalaallit Nunaanni angerlarsimaffeqanngitsaq kinaagaluartorluunniit nassuiaammi ilaatinneqarpoq, matumani aamma aningaasaliisarteq nunamit allameersaq Kalaallit Nunaanni aalajangersimasumik ingerlatsiveqarpat, tassani ilaatinneqarpoq. Pisuni immikkoortortaqarfinnut, immikkoortortaqarfik Kalaallit Nunaanni angerlarsimaffeqanngitsillugu Inatsisartut inatsisaat aamma taamaalilluni atuutissaaq. Aamma tassani immikkoortortaqarfik Kalaallit Nunaanni angerlarsimaffeqarluni, kisianni nunami allami suliffeqarfimmit suliffeqarfiulluni ingerlatseqatigiiffittut piginnittumit aalajangiisutut sunniuteqarfigineqartutut imaluunniit nunamit allamit suliffeqarfiup immikkoortortaqarfiulluni, Inatsisartut inatsisaat aamma atuutissaaq. Aningaasaliisoeq nunamit allameersaq allakkut Kalaallit Nunaanni immikkoortortami pissaaneqarfeqarpat imaluunniit annertuumik sunniuteqarpat, Inatsisartut inatsisaat aamma atuutissaaq.

Inuup imaluunniit inatsisitigut pisinnaatitaasup pisussaatitaasulluunniit suliffeqarfimmik ingerlatseqatigiiffittut piginnittumit aalajangiisutut sunniteqarfigineqartumik, nunamit allamit suliffeqarfiup immikkoortortaqarfianik, imaluunniit Kalaallit Nunaanni aalajangersimasumik ingerlatsivimmik pilersitsisimanera, sullissisup Kalaallit Nunaanni nunassissimasutut imaluunniit angerlarsimaffeqartutut isigineqarneranik kinguneqanngilaq.

Suliffeqarfiup nunami pineqartumi nalunaarsorneqarsimaneranik imaluunniit aalajangersakkanut naalakkersugaanermut tunngasunut tunngatillugu angerlarsimaffeqarnera “nuna angerlarsimaffik”-ttut paasineqassaaq. Ingerlatseqatigiiffinnut inatsimmi, Kalaallit Nunaannut atuutilersinneqartumi, taaguusersuutitut taassuma assigaa.

§ 4-mut

Imm. 1-imut

Aningaasaliisartoq nunami allaneersoq, suliassa qarfinni aamma suliniutini immikkut ittumik malussarissuseqartuni, nunamit allamit aningaasaliinissap naammassineqarnissaanik siunertaqartoq, tak. imm. 2, aningaasaliinermut akuersissuteqarnissaq pillugu siuningaani Naalakkersuisunut qinnuteqassasoq, imm. 1-imi siunnersuutigineqarpoq.

§ 3, nr. 5-itut siunnersuutigineqartoq, aamma tassunga oqaaseqaatit malillugit, nunamit allamit aningasaliinissap eqqarsaatigineqartup naammassineqarnissaanut akuersissut pillugu qinnuteqarnissamik aningaasaliisartup nunamit allameersup pisussaaffeqarnera, aalajangersagassatut siunnersuutigineqartup kinguneraa.

Aningaasaliisartumut nunamit allamiumut pisussaaffik taamaallaat pisussaaffiuvoq. Aningaasaliisartup nunamit allameersup aningaasaliinerup naammassineqarnissaanut akuersissummik angusisimanerata qulakkeerneqarnissaanut tunngatillugu, Kalaallit Nunaanni immikkoortotami, aningaasaliinerup sularineqarfiani, pisussaaffinnik pisussaatitaasoqanngilaq.

Imm. 2-mut

Imm. 1-imi taaneqartutut, Kalaallit Nunaata isumannaatsuunissaanut imaluunniit tamat toqqississimatinneqarnissannut tunngatillugu, suliassa qarfinni suliniutinillu immikkut ittumik malussarissusilinni tulliuttut ilaatinneqarput:

- 1) Illersornissamut suliassa qarfiup iluani suliffeqarfik.
- 2) It-kkut isumannaatsuunissamut atuuffiit iluanni imaluunniit paasissutissat isertuussat sularineqarnerannut suliffeqarfik.

- 3) Suliffeqarfik nioqqutissianik marloqiusamik atorineqarsinnaasunik nioqqutissiortoq.
- 4) Nr. 1-imiit 3 ilanngullugu taaneqartunit allaanerumik teknikkikkut atortorissarutit pingaarutillit allat pillugit suliffeqarfik.
- 5) Attaveqaasersuutit pingaarutillit.
- 6) Aatsitassanut suliassaqarfik.
- 7) Ingerlatseqatigiiffiit Namminersorlutik Oqartussanit pigineqartut.
- 8) Imermik nukissiorfiit

Imm. 3-mut

Suliassaqarfiit suliniutillu imm. 2-mi ilaatinneqartut killilersorneqarnissaat pillugit Naalakkersuisut malittarisassanik erseqqinnerusunik aalajangersaasinnaasut, *imm. 3-mi* siunnersuutigineqarpoq.

Suliassaqarfinniit suliniutillu immikkut ittumik malussarissusillit imm. 2-mi takuneqarsinnaasut pillugit malittarisassat erseqqinnerusumik nassuiaasut aamma killiliisut aalajangersarneqarnissaannut imm. 3-mi piginnaatitsissutip atorineqarnissaa naatsorsuutigineqarpoq. Taamaalluni suliassaqarfinnik suliniutinillu imm. 2-mi allatorneqartuni, malittarisassat annertusineqarnissaannut piginnaatitsissut atorineqarsinnaassanngilaq.

Imm. 2-mi suliassaqarfiit suliniutillu immikkut ittumik malussarissusillit pillugit malittarisassanik erseqqinnerusunik aalajangersaanikkut tulluuttut pingartinneqarnissaat siunertarineqarpoq:

Illersornissamut suliassaqarfiup iluani suliffeqarfiit pineqartillugit, tamanna suliffeqarfinnut, sakkunik, sorsunnermi atortussanik ineriartortitsisunut imaluunniit tunisassiortunut, imaluunniit sakkutooqarnermut atortussanik teknikkikkut atortorissaruteqarnernik, killilerneqarnissaa siunertarineqarpoq.

Suliffeqarfiit marloqiusamik atorineqartussanik (nioqqutissianik dual-use-iusunik) nioqqutissianik nioqqutissiortut pineqartillugit, immikkoortortaqaqfinnut, nioqqutissianik marloqiusanik atorineqarsinnaasunik, imaappoq nioqqutissianik inunni sakkutuujunngitsuni aamma sakkutooqarnermi atorineqarsinnaasunik nioqqutissiortunut killilerneqarnissaat siunertarineqarpoq. Nioqqutissianut marloqiusamik atorineqartussanut killiliineq, Siunnersuisoqatigiit peqqussutaanni (EF) nr. 428/2009, aamma tassani nioqqutissiat dual-use-iusut peqqussummut ilanngussaq I-imi allanneqarsimallutik, taanna nakkutigisassanut allattuiffittut taaneqartarpoq, kingusinnerusukkullu allannguutai, naapertorlugit nassuiarneqarsinnaassaaq, kisianni nassuiaanermut tassunga Naalakkersuisut pituttugaanngillat.

It-kkut isumannaatsuunissamut atuuffilinnut suliffeqarfinnut nioqputissianik, paasissutissanut isertuussaasunut atorineqartussanik, nioqputissiortut pineqartillugit, suliffeqarfinnut nioqputissianik it-kkut isumannaatsuunissamut atuuffilinnut imaluunniit sullissinernik, paasissutissat isertuussat suliarineqarnissaannut atorineqartunut, ineriartortitsisunut, nioqputissiortunut imaluunniit aserfallatsaalisunut, killilerneqarnissaa siunertarineqarpoq.

Suliffeqarfiit teknikkikkut atortorissaarutinik pingaarutilinnik allanik nioqputissiortut pineqartillugit, teknikkikkut atortorissaarutit pingaaruteqartut, sakkunik avammut tuniniaaneq pillugu malittarisassani imaluunniit dual-use pillugu peqqussummi nakkutigisassat allattorsimaffiani ilaatinneqanngitsut, kisianni assigisaanik pingaaruteqartunngorsinnaasut, pineqassapput. Assersuutigalugu silassorissuusiaqarnerup iluani, robottit pillugit teknikkikkut atortorissaarusiornermi, 3D atorlugu naqitsisarnerni, silaannakkut- aamma avataarsuani angallassinerni aamma nukissiuutit toqqorsivimmiitinneqarnissaasa, kvante- aamma nuklearteknologi-p iluanni teknikkikkut atortorissaarutit nutaatut ineriartortitat, massakkuugallartoq avammut tunisinermi nakkutilliisarnermut malittarisassani ilaatinneqanngitsut, kisianni ilaatinneqartussatut eqqarsaatigineqartut pineqarsinnaapput.

Attaveqaasersuutit pingaarutillit pineqartillugit oqaatsip “attaveqaasersuutit” atituumik paasineqarnissaa naatsorsuutigineqarpoq, taamaalilluni atortorissaarutit, systemit, ingerlatsinerit teknikkikkut atortorissaarusiornerit, pigisat nalillit aamma sullissinerit ilaatinneqassapput. Inuiaqatigiinni atuuffiit pingaarutillit attannissaannut imaluunniit atulerseqqinnissaannut taakku pisariaqartinneqarpata, attaveqaasersuutit “pingaaruteqartut” nalilerneqassapput. Sullissiviit inuiaqatigiinnut pingaaruteqartut iluanni, inuiaqatigiinni atuuffiit pingaarutillit attanneqarnissaannut imaluunniit atulerseqqinneqarnissaannut pingaaruteqartut, attaveqaasersuutini pingaaruteqartuni suliffeqarfiit immikkoortortaqarfiillu ilaatinneqarput. Suliassaqarfiit tulliusut inuiaqatigiinnut pingaaruteqartut pinngitsoorati isigineqassapput: nukissiuutit (gassi, innaallagialu, uulia, imeq), paasissutissiinnermut- aamma attaveqaqatigiinnermut teknikkikkut atortorissaaruteqarneq, angallassineq, upalungaarsimaneq aamma inuit sakkutuujunngitsut illersorneqarnerat, nioqputissiat pingaaruteqartut, imissaq aningaasaqarneq aamma aningaasarsiorneq, ilisimatusarneq, silasiorneq, illersornissaqarfimmut nioqputissiorneq kiisalu naalagaaffiup isertortumik paasiniaanermut- aamma isumannaatsuunissamut sullissisui, nunanut allanut sullissivik, nalinginnaasumik oqartussaasuunermik suliaqarneq kiisalu oqartussaaffeqarfiit assigiinngitsut akornanni ajornartoornermik aqutsineq.

Suliassaqarfinnut suliniutinullu immikkut ittumik malussarissusilinnut (nr. 1-imiit 7 ilanngullugu) attaveqaasersuutini pingaaruteqartuni taamaallaat suliffeqarfiit ilaatinneqanngillat, kisianni attaveqaasersuutitut pingaaruteqartunut atassuteqartumik suliniutit tamarmik ilaatinneqarput.

Assersuutigalugu attaveqaasersuutit Kalaallit Nunaani oqartussaasunit pigineqartut, taakkunani allakkut aningaasaliisartoq nunamit allameersoq, § 3, nr. 4, naqinneq c-tut siunnersuutigineqartoq malillugu pissutsit aqutsinermut, aningaasaqarnermut, ineriartortitsinermut imaluunniit ingerlatsinermut tunngassuteqartut pillugit toqqaannartumik imaluunniit toqqaannangitsumik aalajangiisuusumik pissaanermik angusisoq, taamaalilluni ilaatinneqarpoq.

Aatsitassanut suliassaqarfik pineqartillugu, tassani Aatsitassat pillugit ingerlatallu tamatumunnga pingaarutillit pillugit Inatsisartut inatsisaat (aatsitassanut ikummatissanullu inatsit) 7, 7. december 2009-imeersoq aamma Najukkani aatsitassanut tunngasunik suliaqarnerit pillugit Inatsisartut inatsisaat nr. 34, 4. juni 2024-imeersoq malillugit akuersisummik peqartut imaluunniit piumasagaateqarfigineqartut suliffeqarfiit ilaatinneqarput.

Kalaallit Nunaanni nunap inissisimanerata immikkut ittuq, pisortanit pilersuisussaataaneq kinguneraa, tassani gruppinit imaluunniit suliassaqarfinnut, niuerfimmit killilersugaanngitsumit aamma malittarisassiugaanngitsumit tunngaviusumik sullissinernik ikiuutinillu neqeroorfigineqannginnissaat ilimananngitsorujussuulluni, imaluunniit tunngaviusumik sullissinernut ikiuutinullu ullumikkumut naleqqiullu akiliinerujussuusussaallutik, tunngaviusumik sullissinerit ikiuinerillu neqeroorutaanissaat qulakkeerneqarluni. Pisarnertut tamanna namminersorlutik oqartussat ingerlatsiviinit qulakkeerneqartarpoq.

Ingerlatsiviit suugaluartulluunnit, Namminersorlutik Oqartussat toqqaannartumik imaluunniit toqqaannangitsumik piginnittutut piginneqataassutsit imaluunniit taasisinnaatitaanerit 50 pct.-ii sinnerlugit pigineqarnerattut, “ingerlatseqatigiiffiit namminersorlutik oqartussanit pigineqartut”-tut paasineqassaaq.

§ 5-imut

Aningaasaliinissap eqqarsaatigineqartup imaluunniit aningaasaliinerup naammassineqartup, suliassaqarfinnut suliniutinullu, § 4-tut siunnersuutigineqartumi allattorneqartutut, immikkut ittumik malissarissuseqartuni ilaatinneqanngitsut pillugit akuersisummik aningaasaliisartup nunamit allameersup Naalakkersuisunut noqqaassutigisinnaagaa, § 5-imi siunnersuutigineqarpoq.

Aalajangersakkat siunnersuutigineqartut suliassaqarfiit assigiinngitsut akornanni misissuinissamik aaqqissuussinermut killiussat aalajangersarpaat, tamatumalu kingorna aningaasaliisartoq nunamit allameersoq nammineq kajumissutsini malillugu nunamit allamit aningaasaliineq nalunaarutigisinnaavaa.

Aningaasaliineq Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanera nalornissutigineqarpat, aningaasaliisartup nunamit allameersup taamaallaat nammineq kajumissutsini malillugu nunamit allamit aningaasaliineq nalunaarutigissagaa, aalajangersakkami siunertarineqarpoq. Nunanit allanit aningaasaliinerit, § 4-mi ilaatinneqanngitsut, aallaaviatigut Naalakkersuisunut nalunaarutigineqarnissaat, aalajangersakkap taamaalilluni kingunerinngilaa. Nunamit allanit aningaasaliinerup naammassineqarsinnaannginnera, taamaalilluni nalunaaruteqannginnerup kingunerinngilaa.

Nalunaaruteqarnissap suliarineqarnera nammineq kajumissuseq malillugu suliarineqassaaq, aamma nalunaaruteqarneq nunamit allamit aningaasaliinermut eqqarsaatigineqartumut aamma nunamit allamit aningaasaliinernut naammassineqareersunut tunngassuteqarsinnaavoq.

Nalunaaruteqarnikkut aningaasaliisoq – aamma nunanit allanit aningaasaliinerni naammassineqareersuni – oqartussaasut aningaasaliinermik akuersissuteqarsinnaanerannut aamma taamaalilluni tulliusumik Kalaallit Nunaata isumannaatsuunissaanut imaluunniit tamat toqqissisimatinneqarnissaanut eqqarsaatigisassat aallaavigalugit aningaasaliinermut akuliutinnginnissaannik pisariaqartinneqartumik qularnaveeqqummik angusaqarsinnaassaaq. Taamaalilluni § 6-itut siunnersuutigineqartumut siunnersuut atatillugu isiginiarneqassaaq, tassani nunanit allanit aningaasaliinerit, akuerineqartussatut nalunaarutigineqarsimanngitsut, aningaasaliinerup naammassineqarnerata kingorna ukiut 5 tikillugit misissorneqarnissaannut Naalakkersuisut periarfissaqarnissaat siunnersuutigineqarluni.

Nunanit allanit aningaasaliinerit, § 4-mi ilaatinneqanngitsut, aallaaviatigut Naalakkersuisunut nalunaarutigineqarnissaat § 5-itut siunnersuutigineqartup kingunerinngilaa. Aningaasaliisup nunami allameersup, aningaasaliinerup imaluunniit suliniutip Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanera pillugu nalornissuteqartup, akuersissuteqarnissaq pillugu noqqaassuteqarnikkut erseqqissumik paasisaqarsinnaanera, § 5-itut siunnersuutigineqartumi nammineq kajumissuseq malillugu misissuisoqarnissaanik periarfissap aamma § 6-itut siunnersuutigineqartumi nunanit allanit aningaasaliinerit nammineq kajumissuseq malillugu nalunaarutigineqanngitsut misissornissaannut Naalakkersuisut periarfissaqarnissaat siunertarineqarpoq. Tamatuma peqatigisaanik immikkut ittumik suliaasaqarfiit suliniutillu malissarissut avataanni nunanit allanit aningaasaliinernut akuliussinnaanermut periarfissaq § 6-itut siunnersuutigineqartup tunniutissavaa.

§ 6-imut

Nunanit allanit aningaasaliinerit, § 4-mi ilaatinneqanngitsut, aamma § 5 malillugu nalunaarutigineqanngitsut, naammassineqarnerisa kingorna, aningaasaliinerup Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanera pillugu ukiut 5 tikillugit misissuisoqarnissaa Naalakkersuisut aalajangersinnaagaat, § 6-imi siunnersuutigineqarpoq.

§ 5-itut siunnersuutigineqartoq malillugu nunamit allamit aningaasaliineq nalunaarutigineqarsimanngippat aamma Naalakkersuisunit akuerineqarsimanngippat, Naalakkersuisut namminneerlutik misissuineramik, nunanit allanit aningaasaliinernik naammassineqarsimasunik imaluunniit naammassineqarsimanngitsunik ilaatitsisinnaasumik, aallartitsisinnaanerat, § 6-mut siunnersuutigineqartup kinguneraa. Aalajangersagassatut siunnersuutigineqartoq malillugu nunamit allamit aningaasaliinerup pineqartup Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsinera pillugu piviusumik pasisaassisoqarnera, misissuinermut apeqqutaanngilaq.

Aningaasaliinerup naammassineqarnerata kingorna ukiut 5 tikillugit nunamit allamit aningaasaliinerup nalunaarutigineqarsimanngitsup misissorneqarnissaa pillugu Naalakkersuisut aallartitsisinnaasasut, siunnersuutigineqarpoq. Taassuma ingerlatseqatigiiffinnut inatsimmi, Kalaallit Nunaannut atuutilersinneqartumi, § 23 h-mi malittarisassaq assigaa, tamatumalu kingorna ingerlatseqatigiiffinnut inatsiseqartitsineq malillugu inatsisinut naapertuuttumik taanna suliarineqarsimanersoq siunertaralugu, pissarsiamik nalunaarsuinerup kingorna ukiut 5 tikillugit qaangiunneranni misissuisoqarsinnaavoq.

§ 6-imut siunnersuut aamma § 12-itut siunnersuummut tassungalu oqaaseqaatinut ataqatigiissillugu isigineqassaaq, tamatumalu kingorna nunami allamit aningaasaliinerup Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanera pillugu naliliinissamut paasissutissat attuumassuseqartut tamaasa, Naalakkersuisut piumasaqaatigisinnaavaat.

§ 7-imut

Qinnuteqaateqarnermut aamma nalunaaruteqarnermut, matumani qinnuteqaatit digitaliusumik tunniunneqarnissaat ilanngullugit, ingerlatseriaatsit pillugit Naalakkersuisut erseqqinnerusumik malittarisassanik aalajangersaasinnaasut, § 7-imi siunnersuutigineqarpoq.

Paasissutissanut tamanut atugassianut, aallaaviatigut qinnuteqaammi takuneqarsinnaasussanut malittarisassanik aalajangersaanissamut piginnaatitsissutip atorneqarnissaa naatsorsuutigineqarpoq. Ilaatigut paasissutissat tulluuttut pineqarsinnaapput:

1. Aningaasaliisartumit nunamit allameersumi immikkoortortaqaqfimmilu nunamit allamit aningaasaliinissamik pilersaaruteqaqfigineqartumi imaluunniit naammassineqartumi piginnittuussuseq, matumani inaarutaasumik aningaasaliisoq aamma aningaasaatini peqataaneq pillugit paasissutissat ilanngullugit.
2. Nunamit allamit aningaasaliinerup nalingata missinga.
3. Aningaasaliisartumi nunamit allameersumi immikkoortortaqaqfimmilu nunamit allamit aningaasaliinissamut pilersaarusiortfigineqartumi imaluunniit aningaasaliinermi naammassineqarsimasumi nioqqutissiat, sullissinerit aamma inuussutissarsiornermut tunngasumik nuussinerit.
4. Naalagaaffiit, aningaasaliisartup nunamit allamiut aamma suliffeqaqfiup, tassani nunamit allamit aningaasaliineq pilersaarutigineqarluni imaluunniit naammassineqarluni, inuussutissarsiornermut tunngasumik nuussinernik attuumassuteqaqtunik suliaqaqfigisai.
5. Paasissutissat, naalagaaffimmit atorneqarsinnaasut tunngavigalugit, aningaasaliinermi aningaasaliineq aamma taassuma aallaavia.
6. Ulloq, tassani nunamit allamit aningaasaliinerup naammassineqarfissaa eqqarsaatigineqartoq imaluunniit ulloq naammassineqarfia.

Inatsisartut inatsisaat manna malillugu imaluunniit tassannga malittarisassat aalajangersarneqartut malillugit, qinnuteqaatip tunniunneqarnissaa pillugu, Naalakkersuisut malittarisassanik erseqqinnerusunik aalajangersaasinnaanerat, aalajangersagassatut siunnersuutigineqartup aammattaaq kinguneraa. Tamanna assersuutigalugu immersugassaq elektroniskiusoq atorlugu pisinnaassaaq.

Sulianik suliarinnittarnerup qanoq ingerlanneqarnissaa Naalakkersuisut namminneq aalajangersassavaat. Tamanna malittarisassani aalajangersarneqassanngitsoq naatsorsuutigineqarpoq. Qinnuteqaatit imaluunniit suliat nalunaarutigineqartut piffissap naleqquttup iluani Naalakkersuisut suliarisassagaat naatsorsuutigineqarpoq. Sulianik suliarinnittarnermut piffissat atorneqartartut pillugit missingersuutit aamma sulianik suliarinnittarnermut ingerlatseriaatsit nalinginnaasut tamanut saqqummiunneqarsinnaapput.

§ 8-mut

Nr. 1-imut

Aningaasaliineq Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaangippat, nunamit allamit aningaasaliineq pillugu Naalakkersuisut akuersissuteqarsinnaasut imaluunniit akuersisinnaasut, *imm. 1-imi* oqaaseqatigiinni siullerni siunnersuutigineqarpoq.

Aningaasaliineq Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaappat, aamma § 9 malillugu piumasaqaateqarnikkut navianartorsiortitsinerup pitsaaliorneqarnissaa periarfissaasimanngippat, nunamit allamit aningaasaliinerup itigartitsissutigineqarnissaa imaluunniit inerteqqutigineqarnissaa, Naalakkersuisut nalunaarutigisinnaagaat, *imm. 1-imi* oqaaseqatigiit aappaanni siunnersuutigineqarpoq.

Taanna siunnersuummi § 4 malillugu akuersissuteqarnissamik piumasaqaateqarnermi ilaatinneqarpat, oqaaseqatigiittut siunnersuutigineqartoq taanna malillugu aalajangiisoqarpat, nunamit allamit aningaasaliinerup naammassineqarnissaa inatsisinut naapertuussinnaanngilaq. Aningaasaliinernut, § 5 malillugu nalunaaruteqarnissaq pillugu siunnersuummi malittarisassanut ilaatinneqartunut, aamma suli naammassineqanngitsunut, tamanna aamma atuuppoq. Nunanit allanit aningaasaliinernut naammassineqareersunut siunnersuummi § 11-mut tassungalu oqaaseqaatinut innersuussisoqarpoq.

Inatsisartut inatsisaat manna aamma tassannga malittarisassat atulersinneqartut malillugit nunamit allamit aningaasaliinerup, Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanerata nalilersorneqarnerani, Kalaallit Nunaanni immikkoortorta qarfimmu, aningaasaliinermut tunngassuteqartumut, tunngatillugu, pissutsit paasissutissallu pissarsiarineqarsinnaasut eqqarsaatigineqassasut, matumani aalajangiinermut tunngaviit tuliiuttut ilanngullugit:

- 1) Suliniut attaveqaasersuutit pingaarutillit iluaniinnersoq imaluunniit taakkununga sunniinersoq.
- 2) Kalaallit Nunaanni immikkoortorta qarfik paasissutissanik isertuussaasunik imaluunniit inummut paasissutissanik mianernartuusinnaasunik suliarinninnersoq imaluunniit atuisinnaatitaanersoq.
- 3) Kalaallit Nunaanni immikkoortorta qarfiup Kalaallit Nunaanni niuerfimmi inissisimaffia, matumani pitsaanerusumik taarserneqarsinnaaneranut periarfissat ilanngullugit.
- 4) Kalaallit Nunaanni immikkoortorta qarfik illersornissamut nioqqutissiormi ilaanersoq imaluunniit nioqqutissianik marloqiusamik atorneqarsinnaasunik imaluunniit teknikkikkut atortorissaarutini pingaaruteqartunik nioqqutissiormersoq.
- 5) Kalaallit Nunaanni immikkoortorta qarfik nioqqutissianik pingaaruteqartunik pilersuineramik suliaqarnersoq, matumani nukissiuutit aamma inuussutissiat isumannaatsuunissaat ilanngullugit.

6) Kalaallit Nunaanni immikkoortortaarfik atortussiat aatsitassamit pisut aamma aatsitassat pingaarutillit pillugit suliaqarnerseq.

Aalajangiinnermut tunngaviit ilitersuutaasut uani pineqarput, taamaammallu pissutsit attuumassuteqartut allat aamma pingaartinneqarsinnaasussaapput.

Inatsisartut inatsisaat manna aamma tassannga malittarisassat atulersinneqartut malillugit nunamit allamit aningaasaliinerup Kalaallit Nunaata isumannaatsuunissaanut imaluunniit tamat toqqissisimatinneqarnissaanut navianartorsiortitsisinnaanerata nalilersorneqarnerani, aningaasaliisartumut nunamit allameersumut tunngatillugu, pissutsit attuumassuteqartut aamma paasissutissat pissarsiarineqarsinnaasut eqqarsaatigineqassasut naatsorsuutigineqarpoq, matumani aalajangiinnermut tunngaviit tuliiuttut ilanngullugit:

- 1) Aningaasaliisarteq nunamit allameersaq toqqaannartumik imaluunniit toqqaannanngitsumik nunami allami naalakkersuisunit, nunani allani naalagaaffimmi sullissivinnit imaluunniit nunanit allanit sakkutooqarnermit naalakkersorneqarnerseq, matumani piginnittuuneq imaluunniit pingaarutilimmik aningaasalersuineq aqqutigalugu.
- 2) Aningaasaliisarteq nunamit allameersaq suliniutini, nunani ikinngutinnersuni aamma iligisani isumannaatsuunissamut imaluunniit tamat toqqissisimatinneqarnissaanut sunniisuni peqataanersaq imaluunniit peqataasimanersaq.
- 3) Aningaasaliisarteq nunamit allameersaq inatsisinik unioqqutitsisunik imaluunniit pinerluttuliorluni suliniutini, Kalaallit Nunaata isumannaatsuunissaanut imaluunniit tamat toqqissisimatinneqarnissaanut pingaaruteqartuni, peqataanersaq imaluunniit atassuteqarnissaanut asuliunngitsumik aarlerinaateqarnerseq.
- 4) Aningaasaliisartup nunamit allameersup piaaraluni misissuinissamik malittarisassat avaqqunneqarnissaanik misiliiniarneranik patsisissaqarnerseq, assersuutigalugu peqquserluuteqarnermut assingusumik ingerlatseqatigiiffinnik pilersitsinikkut.

Aalajangiinissamut tunngavissatut siunnersuutigineqartut taamatuttaaq missingersuutaammata aamma tamakkiisuunngimmata maluginiarneqassaaq, tamannalu Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanerup naliliiffigineqarnerata soorunami annertuummik paasilertoruminaatsuunermut atassuteqarneranik aamma navianartorsiortitsinnermut pissutsit ataatsimoortut piviusumik nalilersorneqarnissaannik kinguneqarnissaata tamatigut naatsorsuutigineqarnissaanik, tassani navianartorsiortitsinerup suugaluartulluunniit piviusunngoriataarnissaani kingunerineqarsinnaasut aamma pingaartinneqartussaanerannik pissuteqarpoq.

Nr. 2-mut

Naalakkersuisut imm. 1 malillugu aalajangiinissaasa tungaannut, nunamit allamit aningaasaliinerup naammassineqarnissaanut Naalakkersuisut utaqqiisaagallartumik inerteqquteqarsinnaasut, *imm. 2-mi* siunnersuutigineqarpoq.

Pisuni, taakkunani erniinnaartumik misissuinerup kingorna nunamit allamit aningaasaliinerup, imaluunniit allakkut nunamit allamit aningaasaliinerit eqqarsaatigineqartut Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsinermut atassuteqarsinnaanerit pasinartoqartoq, Naalakkersuisut paasippassuk, aalajangersagassatut siunnersuutigineqartup atorneqarnissaa naatsorsuutigineqarpoq.

Nunamit allamit aningaasaliineq siunnersuummi § 5-imi ilaatinneqartoq pineqarpat, siunnersuut malillugu akuersissuteqarnissamik imaluunniit inerteqquteqarnissamik aalajangiineq aalajangerneqartinnagu, aningaasaliineq inatsisinut naapertuuttumik naammassineqarsinnaasussaavoq. Pisuni taamaattuni aningaasaliinerup erseqqinnerusumik misissuiffigineqarnissaata naammassineqarnissaata aamma inaarutaasumik tamanna pillugu aalajangiinissap tungaanut, aningaasaliineq utaqqiisaagallartumik pitsaaliortariaqarpoq. Aningaasaliinerup § 5 malillugu nalunaarutigineqarsimanera imaluunniit nalunaarutigineqarsimannginnera, aalajangersagaq malillugu inerteqquteqarsinnaanerput pingaaruteqanngilaq.

Nunamit allamit aningaasaliineq, siunnersuummi § 4-imi ilaatinneqartoq pineqarpat, akuersissuteqaqqaarani aningaasaliinerup naammassineqarnissaa, § 4-imut akerliussaaq. Aamma pisumi taamaattumi aningaasaliinerup erseqqinnerusumik misissuiffigineqarnissaata naammassineqarnissaata aamma inaarutaasumik tamanna pillugu aalajangiinissap tungaanut, aningaasaliineq utaqqiisaagallartumik pitsaaliorneqarnissaa pisariaqartinneqarsinnaavoq. § 4 malillugu akuersissutip qinnuteqaatigineqarsimanera imaluunniit qinnuteqaatigineqarsimannginnera pingaaruteqanngilaq.

Imm. 2-tut siunnersuutigineqartoq malillugu suliap paasinarsarneqarnissaanut piumasaqaatit, utaqqiisaagallartumik pisinnaatitaanermik naammassinninnissamut atortup pineqarnera eqqarsaatigalugu isiginiarneqassaaq

Aalajangersagassatut siunnersuutigineqartoq malillugu utaqqiisaagallartumik inerteqquteqarnermik Naalakkersuisut aalajangiippata, tamatuma kingorna piaarnerpaamik nunamit allamit

aningsaasaliineq inatsisinut naapertuuttuunersoq pillugu Naalakkersuisut inaarutaasumik aalajangiissapput.

Imm. 3-mut

Nunamit allamit aningsaasaliisup noqqaassuteqarnerata kingorna, imm. 1 malillugu utaqqiisaagallartumik akuersisummik Naalakkersuisut aalajangiisinnaasut, imm. 3-mi siunnersuutigineqarpoq. Aalajangersagaq malillugu Naalakkersuisut utaqqiisaagallartumik aalajangiinissamut pisussaaffeqanngisaannassapput, kisianni nunamit allamit aningsaasaliisumit noqqaassuteqarnerup kingorna taamaaliornissaq toqqarsinnaavaat.

Aningsaasaliinerup Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisutut nalilernerqarnissaanik, nunamit allamit aningsaasaliinerup misissorneqarnera kingunerqarnavianngitsoq, aamma tamakkiisumik misissuinerup naammassineqarnissaanut atasumik suliamik suliarinninnermi piffissaq atorneqartoq naleqqutinngitsumik sivisuallaartutut nalilernerqarpat, aalajangersakkap atorneqarsinnaanissaa naatsorsuutigineqarpoq. Naliliinerup utaqqiisaagallartumik pissuseqarnerata malitsigisaanik, utaqqiisaagallartumik akuersissuteqarnissap akuerineqartariaqarnersoq pillugu noqqaassummut atatillugu Naalakkersuisut annertuumik missiliuisinnaapput.

Aalajangersagaq taanna malillugu aalajangiinerit utaqqiisaagallartuinnaammata, Naalakkersuisut inaarutaasumik akuersisummik nalunaaruteqarnissaat aningsaasaliisut ilimagisinnaanngilaat. Taamaalilluni utaqqiisaagallartumik aalajangiinerit tatigalugit aningsaasaliinerit pinerat, nunamit allamit aningsaasaliisup nammineq akisussaaffigissavaa.

§ 9-mut

Imm. 1-imut

Aningsaasaliinerup Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanerata pitsaaliorneqarnissaa siunertaralugu, nunamit allamit aningsaasaliinerup § 4-mi aamma § 5-mi ilaatinneqartup naammassineqarnissaanut piumasaqaatit, Naalakkersuisunut isumaqatigiissutigineqartut, aningsaasaliisartup nunamit allameersup eqqortissallugit neriorsuutigisinnaagai, imm. 1-mi siunnersuutigineqarpoq.

Akuersissut imaluunniit akuersineq, piumasaqaatinik, Naalakkersuisunut isumaqatigiissutigineqartunik tunngaveqartoq, ingerlatsinermi inatsiseqartitsineq malillugu aalajangiinertut pissuseqassaaq.

Nunanit allanit aningaasaliinissamut akuersissummik qinnuteqaatip imaluunniit nunamit allamit aningaasaliinerup akuerineqarnissaanut nalunaaruteqarnerup kingorna, qinnuteqaammi imaluunniit nalunaarutiginninnermi misissuinerup kingorna, Kalaallit Nunaata isumannaatsuutinneqarnissaanut imaluunniit tamat toqqissisimatinneqarnissaannut navianartorsiortitsisinnaasunik Naalakkersuisut nassarpata, kisianni taakku aningaasaliinerup naammassineqarnissaanut piumasaqaatinik erseqqinnerusunik piumasaqaateqarnikkut pitsaaliorneqarsinnaasut nalilerneqarpat, aalajangersagaq atorpeqassaaq. Pisuni taamaattuni piumasaqaatit taamaattut, aningaasaliisup nunamit allameersup naammassiumallugit oqaatigisai, Naalakkersuisut akuerisinnaavaat. Piumasaqaatit, aningaasaqarnermut tunngassuteqartut amerlanertigut pineqarsinnaapput, assersuutigalugu aningaasaliisup piginnittut piginneqataasuusaasa killilernerarnerat, aqutsinermut tunngassuteqartumik pissusillit, assersuutigalugu aningaasaliisup suliffeqarfimmi aqutsisuni peqataaneranut killiliinerit, imaluunniit piumasaqaatit suliasaqarfiit ilaanni, assersuutigalugu teknikkikkut atortorissaarutit pingaarutillit ineriartortinneqarneranni, aningaasaliisup paasisimasaqassuseqarnissaata killilernerneqarnissaannut sammitinneqartut. Ingerlatsinissamut-aamma pisiortorfinnut isumaqatigiissutitut atatillugu, taamatuttaaq taassuma taamaattoqarpat suliffeqarfimmut pilersuisuianut piumasaqaatinik aalajangersaasoqarsinnaassaaq.

Imm. 2-mut

Aningaasaliinerup Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsinissaata pitsaaliorneqarnissaa siunertaralugu, nunamit allamit aningaasaliinermut § 4-mi aamma § 5-imi ilaatinneqartumut akuersissuteqarnissamut imaluunniit akuerinninnissamut piumasaqaatit piumasaqaatitut Naalakkersuisut aalajangersarsinnaagaat, imm. 2-mi siunnersuutigineqarpoq.

Imm. 1-imut akerliusumik, nunamit allamit aningaasaliinerup akuersissutigineqarnissaanut imaluunniit akuerineqarnissaanut piumasaqaatitut, imm. 2-mi aalajangersagassatut siunnersuutigineqartup kinguneraa. Ingerlatsinissamut-aamma pisiortorfinnut isumaqatigiissutitut atatillugu, taamatuttaaq taassuma taamaattoqarpat suliffeqarfimmut pilersuisuianut piumasaqaatinik aalajangersaasoqarsinnaassaaq.

Imm. 3-mut

Nunamit allamit aningaasaliineq attanneqartillugu, imm. 1 aamma 2 malillugit piumasaqaatit eqqortinneqassat, imm. 3-mi siunnersuutigineqarpoq. Aningaasaliisoq nunamit allameersoq, piumasaqaatit isumaqatigiissutigineqartut ukiup ingerlanerani qanoq ilillutik eqqortinneqarsimanerat pillugit ukiumoortumik nalunaarusiamik nassiussisassaaq. Nalunaarusiami paasisutissat eqqortuunerat pillugit kukkunersiuisumit, Kukkunersiuisut aamma kukkunersiuinermik suliffeqarfiit akuerisaasut pillugit inatsimmik Kalaallit Nunaannut

atuutilersitsineq pillugu peqqussut malillugu akuerisaasumit, aamma aningaasaliisumit nunamit allameersumit attuumassuteqannginnerminik uppersaasumik, nalunaarummik nalunaarusiaq ilaqartinneqassaaq.

Nunanit allamit aningaasaliinerup Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsinermik kinguneqannginnissaata pitsaaliorneqarnissaanut, piumasaqaatit isumaqatigiissutigineqartut eqqortinneqarnissaannut pingaaruteqarpoq. Taamaalluni nalunaarummi piumasaqaatit naammassineqarsimanerisa ilisimatitsissutigineqarnerat aalajangersagassatut siunnersuutigineqartoq malillugu naammanngilaq, kisianni qanoq tamanna piviusumik pisimanersoq paasissutissiissutigineqassaaq. Paasissutissat eqqortuunerat qulakkeerniarlugu, aalajangersagassatut siunnersuutigineqartoq malillugu kukkunersiuisumit, kukkunersiuisut inatsit malillugu akuerisaasumit, nalunaarummik nalunaarusiaq ilaqartinneqassaaq.

§ 10-mut

Ilaatigut pisuni tulliuttuni, aalajangiineq Naalakkersuisut allanngortissinnaagaat imaluunniit utertissinnaagaat, § 10-mi siunnersuutigineqarpoq:

- 1) Aalajangiineq paasissutissat eqqunngitsunik imaluunniit paatsiveerussaataasut tunngavigalugit aalajangerneqarsimappat.
- 2) § 9 malillugu piumasaqaatinik eqqortitsinnginneq imaluunniit piumasaqaatit pillugit nalunaarusiornissamik eqqortitsinnginneq.
- 3) § 5 malillugu Kalaallit Nunaanni immikkoortortami piginnittutut piginneqataassutsinik imaluunniit taasisinnaatitaanernik toqqaannartumik imaluunniit toqqaannanngitsumik peqarnerup imaluunniit pissaaneqarfeqarnerup imaluunniit aalajangiinerni aalajangiisuusumik pissaaneqarnerup annertusineqarnerani akuersissummik peqarnissaq pillugu nutaamik qinnuteqarnissamut pisussaaffiup eqqortinneqannginnera.
- 4) § 12-imut akerliusumik aningaasaliisartoq nunanit allaneersoq paasissutissanik Naalakkersuisunut tunniussinngilaq.
- 5) Pissutsit allanngornerat, Kalaallit Nunaata isumannaatsuunissaanut imaluunniit tamat toqqissisimatinneqarnissaannut ilungersunartumik navianartorsiortinneqarnerannik kinguneqartut.

Nr. 1-imiit 5 ilanngullugu allattuineq tamakkiisuunngilaq. Utertitsisarneq pillugu ingerlatsinermut inatsiseqartitsinermi malittarisassat atuutissammata, tassunga atatillugu maluginiarneqassaaq.

Paasissutissat eqqunngitsut tunngavigalugit akuersissut tunniunneqarsimappat, imaluunniit oqartussaasut paatsoortinneqarnissaat siunertaralugu qinnuteqartup piaaraluni paasissutissat nipangiussimappagit, aalajangiineq assersuutigalugu allanngortinneqarsinnaavoq imaluunniit utertinneqarsinnaalluni.

Suliami akuusut piumasaqaatit piumasaqaatigineqartut eqqortinngippatigit, imaluunniit § 9, imm. 3-tut siunnersuutigineqartoq malillugu piumasaqaatit isumaqatigiissutigineqartoq qanoq ilillutik eqqortinneqarsimanerat pillugit pisussaaffiusumik ukiumoortumik nalunaarusiamik nassiussinngippata, taamatuttaaq aalajangiineq allanngortinneqarsinnaassaaq imaluunniit utertinneqarsinnaassaaq.

Aningaasaliisoq nunamit allameersoq agguagarsianik, Kalaallit Nunaanni immikkoortortaqaarfimmi, nunamit allamit aningaasaliinerit, § 3, naqinneq b-tut siunnersuutigineqartumi killissarititaasunik, taama malittariillutik, pingajorarterummik, 50 pct.-imik, pingajorarterutinik marlunnik imaluunniit 100 pct.-imik qaffaanermik kinguneqartut, kingusinnerusukkut suliffeqarfiup aqunneqarnerani pingaarutilimmik sunniuteqartut pissarsiarineqartut, pillugit akuersissummik qinnuteqanngippat, aalajangiineq aammattaaq allanngortinneqarsinnaassaaq imaluunniit utertinneqarsinnaassaaq.

Pissutsit allanngorneri allat, Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsinermik kinguneqartut pippata, aalajangiineq aamma allanngortinneqarsinnaassaaq imaluunniit utertinneqarsinnaassaaq.

§ 11-imut

Aningaasaliinermut akuersissuteqarneq imaluunniit akuersineq pillugu aalajangiineq, § 10 malillugu utertinneqarsimappat, aamma aningaasaliineq Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaappat, imaluunniit nunamit allamit aningaasaliineq § 8 malillugu itigartitsissuteqarsimanermut imaluunniit inerteqquteqarsimanermut akerliusumik naammassineqarsimappat, nunamit allamit aningaasaliinerup atorunnaarsinneqarnissaa pillugu Naalakkersuisut naalakkiuteqarsinnaasut, § 11-imi siunnersuutigineqarpoq.

Nunamit allamit aningaasaliineq, akuersissummik imaluunniit akuersinermik akerliusumik attanneqartoq, imaluunniit aningaasaliineq § 8 malillugu itigartitsissummut imaluunniit inerteqquteqarnermut akerliusumik naammassineqarsimappat, atorunnaarsitsisoqarnissaa pillugu Naalakkersuisut naalakkiuteqarsinnaanerannik aalajangersagassatut siunnersuutigineqartoq periarfissaliissummik tunisivoq.

Imm. 2-mut

Aningaasaliisoq nunami allameersoq § 4-mut akerliusumik akuersisummik qinnuteqarsimanngippat, aamma aningaasaliineq Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaappat, nunamit allamit aningaasaliinerup atorunnaarsinneqarnissaa pillugu Naalakkersuisut naalakkiuteqarsinnaasut, imm. 2-mi siunnersuutigineqarpoq.

Aningaasaliineq akuersisummik pisariaqartinneqartumik peqarani, siunnersuummi § 4-mut akerliusumik naammassineqarsimappat, nunamit allamit aningaasaliinerup atorunnaarsinneqarnissaa pillugu naalakkiuteqarnissamik aalajangersagassatut siunnersuutigineqartup Naalakkersuisut periarfissaliisummik tunivaat. Pisuni taamaattuni Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsinerit ilungersunartut pineqarsinnaapput, taamaammallu atorunnaarsitsineq pisariaqarsinnaavoq.

Imm. 3-mut

Aningaasaliineq Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaappat, nunamit allamit aningaasaliinerup § 6-imi ilaatinneqartup atorunnaarsinneqarnissaa pillugu Naalakkersuisut naalakkiuteqarsinnaasut, imm. 3-mi siunnersuutigineqarpoq.

Pisuni, taakkunani Naalakkersuisut nammineerlutik § 6-itut siunnersuutigineqartoq malillugu misissuinerмик aallartitsisimaneranni, aamma nunamit allamit aningaasaliineq Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaalluni, aalajangersagassatut siunnersuutigineqartoq atuutissaaq.

§ 12-imut

Imm. 1-imut

Nunanit allanit aningaasaliinissatut eqqarsaatigineqartut imaluunniit aningaasaliinerit naammassineqartut, Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanerisa imaluunniit Inatsisartut inatsisaat manna malillugu apeqqutit allat nalilersorneqarnissaannut pisariaqartinneqartunik, aningaasaliisumit nunamit allameersumit paasissutissanik tamanik Naalakkersuisut piumasaqaateqarsinnaasut, imm. 1-imi oqaaseqatigiinni siullerni siunnersuutigineqarpoq.

Aalajangersagassatut siunnersuutigineqartoq atituumik atuuffissaqarpoq aamma taamaammat § 4 malillugu qinnuteqaatinut, § 5 malillugu nalunaarutiginninnernut aamma § 6 malillugu misissuinernut atuutissalluni. Pisuni, taakkunani nunamit allamit aningaasaliineq § 4-mi ilaatinneqarnersoq pillugu misissuisoqarnerani, aamma tassani akuersisummik qinnuteqartoqarsimannginnerani, imaluunniit “nunamit allamit aningaasaliineq” pineqarnersoq pillugu misissuisoqarnerani, aalajangersagaq aammattaaq atuutissaaq. Pisunit, taakkunani § 10-tut siunnersuutigineqartoq malillugu akuersisummik utertitsisoqassanersoq pillugu misissuisoqarnerani, aalajangersagaq aammattaaq atuutissaaq.

Nunamit allamit aningaasaliinerup Kalaallit Nunaata isumannaatsuunissaanut imaluunniit tamat toqqissisimatinneqarnissaanut sunniisinnaanera pillugu paasissutissiinissamik piumasaqaatit assigiinngitsorpasusinnaapput, aamma taamaammat paasissutissat tamarluinnaasa, aningaasaliinerup piviusup Kalaallit Nunaata isumannaatsuunissaanut imaluunniit tamat eqqissisimatinneqarnissaannut navianartorsiortitsisinnaanera imaluunniit Inatsisartut inatsisaat manna malillugu apeqqutit allat nalilerneqarnissaannut pisariaqartinneqartut, siuningaani erseqqissarneqarnissaat taamaammat periarfissaqarnaviangilaq. Taamaammat paasissutissanik attuumassuteqartunik tamanik Naalakkersuisut piumasaqaateqarsinnaanerit siunnersuutigineqarpoq.

“Inatsisartut inatsisaat manna malillugu apeqqutit allat” oqaasertaliorneqarnerat atituumik paasineqassaaq aamma pisut, taakkunani “nunanit allamit aningaasaliineq” pineqarnersoq, imaluunniit aningasaliineq suliaasaqarfinni suliniutinilu immikkut ittumik malissarissusillit iluaaniinnersoq tassani ilaatigut pineqarput.

Paasissutissat eqqortuunerat pillugit kukkunersiuisumit, Kukkunersiuisut aamma kukkunersiuinermik suliffeqarfiit akuerisaasut pillugit inatsimmik Kalaallit Nunaannut atuutilersitsineq pillugu peqqussut malillugu akuerisaasumit, nalunaarummik nalunaarusiaq ilaqartinneqassasoq, Naalakkersuisut piumasaqaatigisinnaagaat, imm. 2-mi siunnersuutigineqarpoq. Aningaasartuut nunamit allamit aningaasaliisumit aningaasartuutigineqassaaq. Inuk, imm. 2 malillugu nalunaarummik tunniussisoq, aningaasaliisumit nunamit allameersumit attuumassuteqannginnini uppersarsassavaa.

Aalajangersagaq malillugu kukkunersiuisoq paasissutissaat suussusaannik tamanik, uppersarsarneqarsinnaasunik taamaallaat tunniussisussaassaaq. Paasissutissanut, aningaasaliisumit nunamit allameersumit tunniunneqartunut aalajangersagassatut siunnersuutigineqartoq taamaallaat atuutissaaq, tassami pisuni, imm. 2 malillugu Kalaallit Nunaanni immikkoortortaqarfimmit paasissutissanik pissarsiniartoqartillugu, kukkunersiuisup nalunaaruteqarnissaa pisariaqartutut nalilerneqanngimmat.

Pissutsit pillugit paasissutissat, Kalaallit Nunaata isumannaatsuutinnissaanut imaluunniit tamat toqqissisimatinneqarnissaannut navianartorsiortitsisinnaanerit pillugit naliliinissamut annertuumik pingaarutillit pineqarnerannik, Naalakkersuisut piviusumik naliliisimanerat, kukkunersiuisumit nalunaarut pillugu piumasaammi saniatigut piumasaqaataavoq. Kukkunersiuisumit nalunaarummut taamaattumut aningaasartuutit aningaasaliisartumit nunamit allaneersumit aningaasartuutigineqassapput. Aalajangersagaq malillugu nalunaaruteqarnermi, kukkunersiuisup aningaasaliisartumut nunamit allameersumut pineqartumut attuumassuteqannginnini, tamatuma peqatigisaanik uppersarsassavaa.

Aalajangersagassatut siunnersuutigineqartoq malillugu kukkunersiuisoq, kukkunersiuisut pillugit inatsit, Kalaallit Nunaannut atuutilersinneqarsimasoq, malillugu akuerisaasoq, pineqassaaq. Taamaalilluni ilaatigut kalaallit, qallunaat imaluunniit kukkunersiuisut nunanit allaneersut, kukkunersiuisut pillugit inatsit malillugu nunami maani sulianik suliarinninnissamut akuerisaasut pineqarsinnaapput.

Paasissutissat piumasarineqartut assersuutigalugu Naalakkersuisunut tunniunneqanngippata imaluunniit kukkunersiuisumit akuerisaasumit uppersarsarneqanngippata, qinnuteqaat imaluunniit nalunaarutiginninneq paasissutissat pigineqartut tunngavigalugit suliarineqarsinnaanngitsaq, Naalakkersuisut qinnuteqartumut imaluunniit nalunaarutiginnittumut nalunaarutigisinnaavaat.

Imm. 2-mut

Akuusuni attuumassuteqartuni Naalakkersuisuisut paasissutissanik aammattaaq pissarsiniarsinnaasut, matumani aningaasaliisartumit nunamit allameersumit paasissutissat uppersarsarneqarnissaat ilaatigut siunertaralugu Kalaallit Nunaanni immikkoortorta qarfigit pissarsiniarsinnaasut, imaluunniit Kalaallit Nunaanni immikkoortorta qarfigit pillugu paasissutissanik pissarsiniarsinnaasut, matumani aqutsisut ilusaat aamma suliaassarfiit ingerlatsiffiusut ilanngullugit, imm. 2-mi siunnersuutigineqarpoq.

Paasissutissat allat, Naalakkersuisut tigusimasaat imaluunniit pissarsiarisimasaat, qinnuteqaatip imaluunniit nalunaarutiginninnerup Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanerannik naliliinermi ilaasinnaanerat naatsorsuutigineqarpoq.

Tassani assersuutigalugu paasissutissat, Naalakkersuisut noqqaassuteqarnerup kingorna, sulianik suliarinninnerminnut atatillugu Kalaallit Nunaanni oqartussaasut attuumassuteqartut tusarniaavigineqarnerisa kingorna tigusaat aamma paasissutissat nunanit allaneersut, matumani

ilaatigut Politiit Immikkut Paasiniaasartui (PET) aamma Illersornissaqarfiup Immikkut Paasiniaasartui (FE) ilanngullugit. Inatsisartut inatsisaat manna malillugu sulianik suliarinninnermut atasumik ilaatigut paasiniaasartunit paasissutissanik pissarsinissaat aamma avitseqatigiissutigisinnaagaat, taamaalilluni naatsorsuutigineqarpoq. Paasissutissat tusarfinit ammasuneersut aamma naliliinermi ilaatinneqarsinnaassapput.

Suliami, pisortani oqartussaasutut suliami aalajangiinermik aalajangiitinnani paasissutissat attuumassuteqartut piviusut aamma inatsisilerinnermut tunngasut pissarsiarineqarnissaannik tunngavimmut naapertuuttumik, Naalakkersuisut namminneerlutik misissuinnermik suliaqarsinnaassapput, assersuutigalugu aningaasaliisartumut imaluunniit nunamit allamit aningaasaliinerup tunuliaqutaani piginnittuni allani tunisassianik dual-use-iusunik avammut tunisinissamut siusinnerusukkut itigartitsissuteqarsimanersoq pillugu misissuinnermikkut. Aammattaaq piginnittuussutsit pillugit nalunaarsuiffinni avataaniittuni nassaassaasuni Naalakkersuisut misissuinnermik suliaqarsinnaassapput, ilaatigut nunarsuarmi tamarmi ingerlatseqatigiiffiit taakku piginnittui pillugit nalunaarsuiffinni namminerisamik pigineqartuni. Tamatuma saniatigut Naalakkersuisut aallaqqaataasumik misissuinnerannut atatillugu, oqartussaasut allat tusarniaaffigineqarnerannik suliaqarneq pisariaqartinneqassaaq, matumani qallunaat oqartussaasui ilanngullugit. Oqartussaasut attuumassuteqartut ingammik tassaassapput Politiit Immikkut Paasiniaasartui (PET) aamma Illersornissaqarfiup Immikkut Paasiniaasartui (FE) aamma naalakkersuisoqarfik oqartussaasuusoq pineqartoq, kisianni suliap qanoq issusaa aamma pissutsit piviusut tunngavigalugit ataatsimut naliliineq apeqqutaatinneqassaaq.

§§ 4 aamma 5 malillugit qinnuteqaatit pillugit aamma §§ 8-miit 11 ilanngullugu aalajangersakkat malillugit aalajangiineq sioqqullugu Naalakkersuisut Kalaallit Nunaanni politidirektørimut tusarniaanermik suliaqassasut, naatsorsuutigineqarpoq. §§ 4 aamma 5 malillugit qinnuteqaatit tiguneqarnerannut atatillugu, qallunaat oqartussaasuusa attuumassuteqartut tusarniaavigineqarnerat tunngavigalugit, matumani immikkut paasiniaasartut, Udenrigsministereqarfik aamma Erhvervsstyrelsi ilanngullugit, politidirektørip tusarniaanermut akissummigut suliap paasinarsisinneqarnissaanut ilanngussisinnaanera naatsorsuutigineqarpoq. Suliamut qallunaat oqartussaasuusa attuumassuteqartut oqaaseqaatigisimasaat tunngavigalugit, politidirektøri tusarniaanermut akissummik ataatsimoortitamik tunniussissaaq, tassunga atatillugu naatsorsuutigineqarpoq. Assersuutigalugu § 9 malillugu neriorsuutit imaluunniit piumasaqaatit pillugit qallunaat oqartussaasuunit paasissutissanik tigusinissaq siunertaralugu, §§ §§ 8-miit 11 ilanngullugu aalajangersakkat malillugit aalajangiineq sioqqullugu Naalakkersuisut politidirektørimut tusarniaanermik suliaqassasut, taamatuttaaq naatsorsuutigineqarpoq. Politidirektøri nammineq paasissutissaatini imaluunniit qallunaat oqartussaasuunit paasissutissat tunngavigalugit, inatsimmi matumani § 6 malillugu misissuinissamik aallartitsinissaq pillugu Naalakkersuisunut innersuussuteqarsinnaasoq, aammattaaq naatsorsuutigineqarpoq. Naleqquttumik

annertussusilimmik Naalakkersuisut aamma Kalaallit Nunaanni politidirektøri kiisalu qallunaat oqartussaasui attuumassuteqartut, Kalaallit Nunaanni politidirektørimut tusarniaanermut akissuteqaat tunngavigalugu oqaloqatigiinnissaat naatsorsuutigineqarpoq. Piffissaliussamik kinguartitsinissamik politidirektøri immikkut ittumik noqqaassuteqanngippat, tusarniaanerup tigunerata kingorna piaartumik, kingusinnerpaamillu ulluinnaat 60-it qaangiunnerini tusarniaanermut akissummik politidirektøri nassiussissasoq naatsorsuutigineqarpoq. Politidirektørimut tusarniaanermut akissutip Naalakkersuisuni suliap suliarineqarnera ajornanngippat kinguartinneqannginnissaa, siunertarineqarpoq.

Imm. 3-mut

Inatsisartut inatsisaat manna malillugu suliamik suliarinninnermut atugassanik, nunat allat oqartussaasuunik paasissutissanik avitseqateqarsinnaaneq pillugu Naalakkersuisut malittarisassanik aalajangersaasinnaasut, imm. 3-mi siunnersuutigineqarpoq.

Piginnaatitsineq siunnersuutigineqartoq paasissutissat attuumassuteqartut avitseqatigiissutigineqarnissaat pillugit malittarissanik erseqqinnerusunik aalajangersaasinnaanermut atorneqarsinnaassapput, matumani siunnersuut malillugu Naalakkersuisut suliamik suliarinninnerannut pisariaqartinneqarpat nunani allani oqartussaasunik aamma Danmarkimi, Savalimmiunilu oqartussaasunik paasissutissanik isertuussaasunik avitseqatigiissuteqarneq ilanngullugu.

§ 13-imut

Imm. 1-imut

Nunanit allanit aningaasaliinernik Inatsisartut inatsisaanni matumani ilaatinneqartunik Naalakkersuisut nakkutilliissasut aamma tamanna pillugu malittarisassanik erseqqinnerusunik aalajangersaasinnaasut, imm. 1-imi siunnersuutigineqarpoq.

Assersuutigalugu akuersissummik qinnuteqarnermi aamma akuerineqarnissamik noqqaassuteqarnermi paasissutissat eqqortuunerannik, piumasaqaatit isumaqatigiissutigineqartut imaluunniit akuersissutini imaluunniit akuersissuteqarnerni aalajangersarneqartut eqqortinneqarnerannik aamma nalinginnaasumik nunanit allanit aningaasaliinerni, taakkunani akuersissummik qinnuteqartoqarsimanani imaluunniit akuerineqarnissamik noqqaassuteqarsimanani, aalajangersagassatut siunnersuutigineqartoq malillugu Naalakkersuisut nakkutilliisinnaassapput.

Nunanit allanit aningaasaliinernik tamanik ingerlaavartumik Naalakkersuisut nakkutiginninnissaat naatsorsuutigineqanngilaq, kisianni assersuutigalugu paasiniaasartunit paasissutissat

tunngavigalugit imaluunniit siunnersuummi § 4-mut akerliusumik akuersissuteqaqqaarani nunamit allamit aningaasaliisimaneq naammassineqarsimasoq pillugu tusagassiuutini paasissutissiissutinit ilimasutsinneqalerunik, nakkutilliinissamut imaluunniit taamaaliortoqassappat akuliunnissamut Naalakkersuisut periarfissaqarput. Assersuutigalugu nunanit allamit aningaasaliinerup siunnersuummi § 5-imi ilaatinneqartup Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanera pasitsaanneqarpat, Naalakkersuisut taamaaliorsinnaapput.

Imm. 2-mut

Tamanna pisariaqartinneqartutut nalilerneqarpat, Inatsisartut inatsisaat manna malillugu imaluunniit tassannga malittarisassat aalajangersarneqartut malillugit, Naalakkersuisut aamma oqartussaasunit allanit sinniisut nakkutilliinermut- aamma nakkutiginninnermut atasumik suliaqarnerminnut atugassaminnik, pisariaqartumik qanoq iliorsinnaanermut uppersaateqarlutik aamma eqqartuussivimmit aalajangiinertaqanngitsumik inuussutissarsiornermut tunngasumik ininut aamma assartuutitut isersinnaatitaassasut, imm. 2-mi siunnersuutigineqarpoq.

Kalaallit Nunaanni immikkoortortami, nunamit allamit aningaasaliinermit sammineqartumi, nakkutilliinermi aalajangersagassatut siunnersuutigineqartup atorneqarnissaa eqqarsaatigineqarpoq.

Kalaallit Nunaata isumannaatsuunissaanut aamma tamat toqqissisimatinneqarnissaannut, aamma paasissutissat allatut iliornikkut pissarsiarineqarsinnaasimannginnerani, aalajangersagassatut siunnersuutigineqartup taamaallaat atorneqarnissaa naatsorsuutigineqarpoq.

Piumasaqaatit aalajangersarneqartut, akuersissuteqarnermut piumasaqaataasimasut, eqqortinneqarnersut assersuutigalugu aalajangersarniarlugit, nakkutilliiartornermi siunertaasinnaavoq. Assersuutigalugu isumannaatsuunissamut ingerlatseriaatsit aamma aaqqissuinerit, paasissutissat ilaasa misikkarissut imaluunniit systemit aningaasaliisumit nunamit allameersumit tikinneqarsinnaanngitsuunissaasa malinneqarsimanerata qulakkeerneqarsimanerannik nakkutilliineq pineqarsinnaavoq. Oqartussaasut allat suliassa qarfinnut taakkununga immikkut ittumik paasisimasallit, assersuutigalugu paasiniaasartut, tamanna naleqquttut nalilerneqarpat, nakkutilliinermi peqataasinnaassapput. Nunamit allamit aningaasaliineq Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsinersoq § 6 malillugu misissuinermut atatillugu assersuutigalugu nakkutilliineq aamma pisinnaasussaavoq.

Inatsisartut inatsisaata malillugu suliassat suliarineqarnissaannut tamanna pisariaqartinneqarpat, Nakkutilliinernut atatillugu oqartussaasunit allanit sinniisunik Naalakkersuisut ilaqarsinnaapput,

matumani paasiniaasartut ilanngullugit. Oqartussaasunit allanit sinniisut taamaalillutik Naalakkersuisunik ikiuniarlutik, nakkutilliiartornerni peqataasinnaapput, kisiannili ininut inuussutissarsiorfiusunut, assartuutinullu immikkut isersinnaatitaanatik.

Naalakkersuisut eqqartuussivimmit aalajangiinermik peqaqqaratik suliffeqarfinnut isersinnaatitaanerat, inatsimmi tunngaviusumi § 72-imi oqaaseqatigiit aappannit immikkut ittumik iliorneruvoq.

Ininut, inuussutissarsiummik ingerlatsiffiusunut taamaallaat Naalakkersuisut isersinnaatitaassapput aamma taamaammat namminerisamik najugaqarfinnuunngitsoq. Pisuni, taakkunani suliffeqarfiup inuussutissarsiornermik ingerlatsinerminut inaataa namminerisamik angerlarsimaffimmiippat, taamaattoq aalajangersakkamut massumunnga naapertuuttumik Naalakkersuisut isersinnaasussaapput.

Eqqartuussivimmit aalajangiinermik peqaqqaaratik Naalakkersuisut inersinnaanermut periarfissaat taamaallaat nakkutilliinissamut tunngasumik atorsinnaannaassaaq. Inatsisiliorneq alla imaluunniit pinerluttulerinermik inatsit malillugu unioqqutitsinermik pillaatissiissutaasinnaasumik pissutissalimmik pasitsaassisoqarpat, suliaq eqqartuussisarnermik inatsimmi pinerluttulerinermi inatsiseqartitsineq pillugu malittarisassat malillugit suliarineqartussaassaaq. Taamaammat suliaq politiinit suliarineqartussaassaaq.

Imm. 3-mut

Immikkoortortaqarfiit aamma aningaasaliisartut nunanit allameersut imm. 2 malillugu nakkutilliinerup- aamma nakkutiginninnerup sunniuteqarluartumik naammassineqarnissaanut suliarineqarnissaanut pisariaqartinneqartumik ikiutissasut, imm. 3-mi siunnersuutigineqarpoq, matumani paasissutissat attuumassuteqartut tunniunnerisigut, ininut inuussutissarsiornermut tunngassuteqartunut aamma assartuutunut isersinnaatitsinikkut aamma nakkutilliiartornermi ikiuunnikkut.

Naalakkersuisut paasissutissanik taakkuninnga noqqaassutigineqartunik tunineqarsinnaanissaat kiisalu ininut assartuutinullu inuussutissarsiornermut tunngassuteqartunut, Naalakkersuisut nakkutilliinerannut pisariaqartinneqartutut naatsorsuutigineqartunut isersinnaatitaanissaat, ikiunnerup kinguneraa. Namminerisamik pigisat assersuutigalugu aqutsisunit imaluunniit sulisunit pigineqartut, aalajangersakkami ilaatinneqanngillat.

§ 14-imut

Tamanna naleqquttutut isigineqartillugu, Inatsisartut inatsisaat malillugu nakkutilliinerup aallartinneqarnera imaluunniit aallartinneqarsimanera, nakkutilliinermit inerniliussat kiisalu Inatsisartut inatsisaat aamma tassannga malittarisassat atulersinneqartut malillugit aalajangiinerit, Naalakkersuisut tamanut saqqummiussinnaagaat, § 14-imi siunnersuutigineqarpoq.

Naalakkersuisut nakkutilliinermit suliaq aallartissimagaat, imaappoq nakkutilliineq ingerlasoq, Naalakkersuisut saqqummiussinnaagaat, aalajangersagassatut siunnersuutigineqartup ilaatigut kinguneraa. Taamaalillutik aalajangiinissaq sulii aalajangiiffigineqartinnagu, nakkutilliineq aallartinneqarsimasoq pillugu Naalakkersuisut tamanut ilisimatitsisinnaapput. Pisoqarsinnaavoq, taakkunani Naalakkersuisut nakkutilliinermit aallartitsisimanerat pillugu paasissutissat annertuumik tamanit soqutigineqarlutik. Aningaasaliisartup nunamit allameersup paasissutissanik piumasagaatigineqartunik tunniunniussinissaanut imaluunniit isumaqatigiissutigineqartut imaluunniit piumasagaatit aalajangersarneqartut pillugit Naalakkersuisut naalakkiutaasa malinneqarnissaannut, tamanut saqqummiussinermi aarlerinaat aammattaaq ilapittuutaasinnaavoq.

Aalajangersagassatut siunnersuutigineqartoq malillugu, aningaasaliisartup nunamit allameersup aqqanik aamma taamaattumik peqarpat CVR-normuanik kiisalu taamaattoqarsimappat unioqqutitsinerup ilimagineqartup suussusaanik, Naalakkersuisut nalunaarutaat imaqarsinnaavoq. Ataqtigiissaagaasumik tamanut saqqummiussineq pineqanngilaq, kisiannili tassani suliani ataasiakkaani tamani, namminerisamik imaluunniit pisortat soqutigissaannik, tassunga paasissutissanut tunngassuteqartumut innimigisassat pillugit, Naalakkersuisut nalilersueqqissaarnerannik aqqissuussineq pineqarluni.

Aalajangersagassatut siunnersuutigineqartoq malillugu, nakkutilliinermit inerniliussaq tamaat imaluunniit ilaannaa Naalakkersuisut saqqummiussinnaavaat. Aningaasaliisartup nunamit allameersup aqqanik aamma taamaattoqarpat CVR-normuanik kiisalu unioqqutitsinerup suussusaa aamma nakkutilliinermit uiggiullu Naalakkersut aalajangiinera tamakkerlugu imaluunniit ilaannaa, nakkutilliinerup inerniliussaata tamanut saqqummiunneqarnera imaqassaaq. Pisuni, taakkuni immikkoortortaqarfirmik nakkutilliineq aallartinneqarsimasoq imaluunniit aallartinneqartussaasoq Naalakkersuisut tamanut saqqummiussisimaneranni, Naalakkersuisut nakkutilliinerup inerniliussaani aamma tamanut saqqummiussinissat naatsorsuutigineqarpoq. Taamaattoq nakkutilliinermit inerniliussap tamanut saqqummiunneqarnerani, Naalakkersuisut nakkutilliinermit aallartitsisimanerata siuningaani saqqummiunneqarsimanissaa apeqqutaanngilaq.

Aalajangersagassatut siunnersuutigineqartoq malillugu tamanut saqqummiussinermi, nunanit allanit aningaasaliinerit pillugit akuersissuteqarnissamik imaluunniit nalunaaruteqarnermi, paasissutissat Kalaallit Nunaata isumannaatsuunissaanut imaluunniit tamat toqqissisimatinneqarnissaannut

tunngassuteqartut ilaatinneqanngillat, kisianni taamaallaat tulliusumik nakkutilliineq pillugu paasissutissat ilaatinneqassallutik.

Aalajangersagassatut siunnersuutigineqartoq malillugu, tamanut saqqummiussineq qanoq ililluni pissanersoq, Naalakkersuisut aalajangissagaat naatsorsuutigineqarpoq.

Tamanna naleqquttutut isigineqartillugu, aalajangersagassatut siunnersuutigineqartoq malillugu tamanut saqqummiussineq pisinnaavoq. Tamanut saqqummiussineq pinerluttoqarsimanerani paasiniaanermut imaluunniit misissuinnermut, imaluunniit tamanut saqqummiussineq aningaasaliisartumut nunamit allammeersumut, imaluunniit Kalaallit Nunaanni immikkoortortaarfimmuut naleqqutinnigitsumik annertuumik ajoqusiisussatut nalilerneqarpat, tamanut saqqummiussineq pissanngitsoq, tamatuma ilaatigut kinguneraa.

§ 15-imut

Aningaasartuutitut Inatsisartut inatsisaat manna aamma tassannga malittarisassat atulersinneqartut malitsigisaanik oqartussaasut suliarinninnerannut atassuteqartut pillugit akiliummik akiliisoqarnissaa pillugu Naalakkersuisut malittarisassanik aalajangersaasinnaasut, § 15-imi siunnersuutigineqarpoq.

Aalajangersagassatut siunnersuutigineqartoq malillugu Naalakkersuisut allaffissornerannut Naalakkersuisut akiliutit pillugit malittarisassanik aalajangersaasinnaanermut periarfissaqarput. Akiliutitigut aningaaliineq pillugu malittarisassanik aalajangersaasinnaanermut periarfissaq, akuersissuteqarnissamut- aamma nalunaaruteqarnermut suliat suussusaannut tamanut, Naalakkersuisut inatsit manna aamma tassannga malittarisassat atuutilersinneqartut malillugit suliarisaannut, atuutissaaq. Aalajangersagassatut siunnersuutigineqartumi assersuutigalugu sulianik suliarinninnermut, nakkutilliinnermut oqartussaasut suliarinninnerinut allanut, suliamut tunngatillugu angalanernut, avataanit siunnersortitut il.il. aningaasartuutit ilaatinneqarput.

§ 16-imut

Imm. 1-imut

Inatsisartut inatsisaat manna malillugu iliuuserisassat naammassineqarnissaannut tamanna pisariaqartinneqarpat, Naalakkersuisut namminerisamik pigisanik pinngitsaaliissummik taarsiissutitalimmik pigisanik piginnikkunnaarsitsineq aallartissinnaagaat siunnersuutigineqarpoq.

Inatsisartut inatsisaat manna malillugu iliuutsit naammassineqarnerat pinngitsaaliissummik taarsiissutitalimmik pigisanik piginnikkunnaarsitsinertut akuliunneruppata, aalajangersagaq atuutissaaq. Pissutsit assigiinngitsut malillugit assersuutigalugu nunanit allamit aningaasaliineq pillugu atorunnaarsitsinissamik naalakkiuteqarneq pillugu § 11 malillugu iliuuseqarnermi tamanna pisinnaavoq.

Iliuutsit taamaattut naammassineqarsinnaanerak, naak inatsimmi tunngaviusumi § 73 malillugu pinngitsaaliissummik taarsiissutitalimmik pigisanik piginnikkunnaarsitsinermik kinguneqartussaagaluartut, aalajangersagassatut siunnersuutigineqartup qulakkeerpaa.

Tunngaviusumit inatsimmit isigalugu pinngitsaaliissummik taarsiissutitalimmik pigisanik piginnikkunnaartitsisoqassappat, pingaarnertut piumasaqaatit marluk naammassineqaaqqaassasut, inatsimmi tunngaviusumi § 73, imm. 1-ip malitsigaa. Siullertut akuliunneq “pigisanut”, inatsimmi tunngaviusumi § 73-imi illersorneqartunut, sammitinneqassaaq. Aappaattut akuliunneq pinngitsaaliissummik taarsiissutitalimmik pigisanik piginnikkunnaartitsinerussaaq (uani tunniussineq pineqassaaq).

Inatsimmit tunngaviusumit isigalugu pinngitsaaliissummik taarsiissutitalimmik pigisanik piginnikkunnaarsitsinertut pissusilimmik akuliuttoqarpat, akuliunnerup inatsimmut tunngaviusumut naapertuunnissaanut piumasaqaatit pingasut naammassineqarsimassapput. Akuliunneq inuiaqatigiinnit piumasaqaataassaaq, inatsit malillugu suliarineqassalluni, aamma piginnittumut pineqartumut tamakkiisumik taarsiissut tunniunneqassaaq. Inuiaqatigiinniit akuliunnerup piumasaqaataanissaanut piumasaqaat, tamatigut naammassineqarsimassaaq, tassami aningaasaliinerup atorunnaarsinneqarnissaa pillugu naalakkiuteqarneq, Kalaallit Nunaata isumannaatsuunissaannut imaluunniit tamat toqqissisimatinneqarnissaannut eqqarsaatigisassat aallaavigalugit pisussaammat.

Inatsisip tunngaviusup namminersortut kisiisa illersunngilai, kisianni aamma inatsisitigut pisinnaatitaasut pisussaataasullu, inunnit pilersinneqarsimasut (imaluunniit tiguneqarsimasut) suussusaat tamaasa – ingerlatseqatigiiffiit, peqatigiiffiit, suliffeqarfiit imminnut ingerlatittut il.il. Aamma pisortanit naalagaaffiup, kommunit aamma inatsisitigut pisinnaatitaasut pisussaataasullu pilersitaat (imaluunniit tamakkiisumik tigusimasaat) pisarneq malillugu illersugaasut, pisarneq malillugu isumaqartoqarpoq. Pisuni tamani pisortani inatsisitigut pisinnaatitaasut pisussaataasullu namminersortutulli tamanit illersugaanerup assinga pineq ajoraat, taamaattoq sulisaatsimi nutaanerusumi takuneqarsinnaavoq.

Oqaaseq “pigisaq” inatsimmi tunngaviusumi § 73-imi oqaaserineqartoq, atituumik paasineqassaaq. Taamaallilluni pisarneq malillugu piginnittuusinnaaneq taamaallaat aalajangersakkap illersunngikkaa, nalinginnaasumik isumaqarfigineqarpoq. Aamma atorsinnaasanut pisinnaatitaaffiit killillit, soorlu atuisinnaatitaanerit, pigisaq pillugu naalakkiutit imaluunniit pisinnaatitaaffiit eqqartuussivikkut nalunaarsukkat aamma qularnaveeqqusiussaqaarluni taarsigassarsiani pisinnaatitaaffiit, aamma namminerisamik isumaqatigiissutit malillugit pisinnaatitaaffiit inatsimmit tunngaviusumit pigisaq pillugu oqaatsip imarisaani illersorneqarput.

Aalajangersakkap taamaallaat innuttaasut akornanni inatsiseqartitsinertut pissuseqanngitsut, kisianni aamma pisinnaatitaaffiit immikkut ittut inuussutissarsiornermut tunngassuteqartut pisortat inatsiseqartinneqarnerat tunngavigalugu pilersinneqartut, assersuutigalugu namminersorluni inuussutissarsiorsinnaatitaanerit illersorneqartut, aammattaaq nalinginnaasumik isumaqarfigineqarput.

Inatsimmit tunngaviusumit isigalugu pinngitsaaliisummik taarsiissutitalimmik pigisanik piginnikkunnarsitsineq pineqassappat, akuliunneq pinngitsaaliisummik taarsiissutitalimmik pigisanik piginnikkunnaartitsinerup suliarineqarnera pineqassaaq (tunniussineq pineqassaaq).

Inatsit tunngaviusoq pillugu inatsiseqartitsineq pillugu atuakkiaatini aamma sulisaatsimi, inatsisiliornissamut pissaaneqartut – pinngitsaaliisummik taarsiissutitalimmik pigisanik piginnikkunnaarsitsinertaqanngitsumik – inatsimmi tunngaviusumi § 73-imi pisinnaatitaaffiit illersugaasut pillugit pisinnaatitaaffiit atorineqarnerat malittarisassiorsinnaagaat, ilaatigut innuttaasut qanoq iliornissamut kiffaanngissuseqarneranni aamma nammineq pigisaminnik atuisinnaanerannut killiliinikkut, tassunga atatillugu nalinginnaasumik isumaqartoqarpoq. Akuliunneq pinngitsaaliisummik taarsiissutitalimmik pigisanik piginnikkunnaarsitsinertut pissuseqarnerasoq pillugu apeqqut, akuliunnerup qanoq issusaa pillugu ataatsimut nalilersuinermit tunngaveqassasoq, aammattaaq isumaqarfigineqarpoq.

Pinngitsaaliisummik taarsiissutitalimmik pigisanik piginnikkunnaarsitsinissap suliarinissaanut periarfissaliissut atituumik samminiffeqarpoq, taannalu pinngitsaaliisummik taarsiissutitalimmik pigisanik piginnikkunnaarsitsinerup inatsit malillugu iliuusissat, Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsinerit pitsaaliorniartugit pisariaqartinneqartut naammassinissaanut pisariaqartinneqartunut killiliiffigineqarpoq.

Siunnersuummi § 11 malillugu akuliunnerit taamaammat Kalaallit Nunaata isumannaatsuunissaata imaluunniit tamat toqqissisimatinneqarnissaata illersorneqarnissaannik tamatigut siunertaqassapput.

Ingammik pissutsit, nunamit allamit aningaasaliinerup atorunnaarsinneqarnissaa pillugu naalakkiuteqarnermik kinguneqartut, Kalaallit Nunaata isumannaatsuunissaanut imaluunniit tamat toqqissisimatinneqarnissaanut navianartorsiortitsinerit eqqarsaatigineqarnerannik tunngaveqartinneqarnerata pinngitsaaliisummik taarsiissutitalimmik pigisanik piginnikkunnaarsitsinerup pineqarnissaanut ilaatigut pingaartitsinerimik oqariartuuteqarnera isumaqarfigineqassaaq. Kisianni pissutsit assigiinngitsut pissutigalugit akuliunnerup pinngitsaaliisummik taarsiissutitalimmik pigisanik piginnikkunnaarsitsinertut isigineqarsinnaanera akerlilerneqarsinnaanngilaq. Tamanna suliami ataasiakkaami pissutsit piviusumik nalilerneqarnerannik tunngaveqassaaq.

Imm. 2-mut

Inatsit manna malillugu iliuutsit naammassineqarnissaat pinngitsaaliisummik taarsiissutitalimmik pigisanik piginnikkunnaarsitsinertut akuliunnertut suliarineqarpata, piginnittumut tassunga imaluunniit piginnittunut taakkununga tamakkiisumik taarsiissuteqartoqarnissaa, *imm. 2-mi* siunnersuutigineqarpoq.

Pisuni Inatsisartut inatsisaat malillugu, Kalaallit Nunaata isumannaatsuunissaanut imaluunniit tamat toqqissisimatinneqarnissaanut navianartorsiortitsinerit pitsaaliorniarlugit iliuuseq pisariaqartinneqartoq, pinngitsaaliisummik taarsiissutitalimmik pigisanik piginnikkunnaarsitsinertut isigisariaqartoq, aningaasaliisumut nunamit allameersumut tamakkiisumik taarsiissuteqarnikkut taamaallaat iliuutsip naammassineqarsinnaanissaa, aalajangersagassatut siunnersuutigineqartup malitsigaa.

Imm. 3-mut

Imm. 1 malillugu pinngitsaaliisummik taarsiissutitalimmik pigisanik piginnikkunnaarsitsinerimik sulisaasissaaq pillugu malittarisassanik erseqqinnerusunik Naalakkersuisut aalajangersaasinnaasut, *imm. 3-mi* siunnersuutigineqarpoq.

Aalajangersagassatut siunnersuutigineqartoq malillugu assersuutigalugu immikkut ittumik isumalioqatigiissitat, *imm. 1* malillugu sulianik suliarinnittussat, pilersinneqarsinnaassapput, matumani isumalioqatigiissitat qanoq ilillutik pilersinneqarnissaa pillugu malittarisassat, aamma malittarisassat suut isumalioqatigiissitani suliat suliarineqarneranni atuutissanersut ilanngullugit. Malittarisassat taakkua Pigisanik aalaakkaasunik arsaarinnissuteqartarneq pillugu Inatsisartut inatsisaanni aalajangersakkanik sanioqqutitsisinnaapput.

§ 17-imut

Imm. 1-imut

Akuersissuteqarnissamik qinnuteqaatit, nalunaarutiginninnerit, piumasaqaatit pillugit neriorsuinerit, nalunaarusiat il.il., Naalakkersuisunut nassiunneqartut, kalaallisut imaluunniit tuluttut oqaasertaliorneqassasut, imm. 1-imi siunnersuutigineqarpoq, taamaattoq imm. 2 takuuk.

Imm. 2-mut

Qinnuteqaatit il.il. tuluttut nassiunneqarpata, aamma kalaallisut nutserisoqarnissaa pisariaqartinneqartoq, Naalakkersuisut nalilerpatigit, tassunga aningaasartuutit aningaasaliisartup nunami allameersup akilissagai, imm. 2-mi siunnersuutigineqarpoq.

Qinnuteqaatit il.il. tamarmik, tuluttut nassiunneqartut, kalaallisut nutserneqartariaqarnerat, aalajangersagassatut siunnersuutigineqartup kingunerinngilaa. Taamaallaat pisuni ataasiakkaani taamaaliortoqarnissaata pisariaqartinneqarneranik, Naalakkersuisut piviusumik naliliineranni tamanna pissaq.

§ 18-imut

Pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaanni allagaatinik takunnissinnaatitaaneq aamma inuup imminut tunngasumik paasissutissat pillugit takunnissinnaatitaanera pillugit malittarisassat, sulianut Inatsisartut inatsisaat manna imaluunniit tassannga malittarisassat malillugit suliarineqartunut atuutinngitsut, § 18-imi siunnersuutigineqarpoq.

Pisortat ingerlatsinerat pillugu paasitinneqarsinnaatitaaneq pillugu inatsit malillugu allagaatinik takunnissinnaatitaaneq, sulianut misissuinernullu Inatsisartut inatsisaanni matumani ilaatinneqartunut atuutinngitsoq, allagaatinik takunnissinnaatitaanermut ilaatitsinnginnissap siunnersuutigineqartup kinguneraa. Pisortat ingerlatsinerat pillugu paasitinneqarsinnaatitaaneq pillugu inatsimmi oqaaseqaatit allattorneqarnissaannik pisussaaffik pillugu § 6 kisianni sulianut inatsit manna malillugu suliarineqartunut atuutissaaq.

Pisortat ingerlatsineranni suliassat suliarineqartarnerat pillugu Inatsisartut inatsisaanni akuusut allagaatinik takunnissinnaatitaanerat pillugit malittarisassat suli atuupput. Suliassat suliarineqartarnerat pillugu inatsimmi § 15, imm. 1-imi, matumani nr. 2-imiittoq ilanngullugu, tunniusseqqusinnginneq pillugu aalajangersakkat taamaattoq atuutissasut naatsorsuutigineqarpoq, tassami akuusut allagaatinik takunnissinnaatitaanerannik atuutitsinnginneq Kalaallit Nunaata isumannaatsuunissaanut aamma tamat toqqissisimatinneqarnissaanut eqqarsaatiginninneq pissutigalugit amerlanertigut pisariaqartinneqartarpoq. Paasissutissat taamaattut aamma, suliassat

suliarineqartarnerat pillugu inatsimmi § 19, imm. 2, nr. 4 malillugu akuusut tusarniaavigineqarneranni ilaatinneqanngillat.

§ 19-imut

Naalakkersuisut naalagaaffimmilu oqartussaasut pinerluttulerinermi inatsimmi §§ 50-imiit 54 ilanngullugu aalajangersakkat malillugit akisussaaffeqarlutik, paasissutissat allanut oqaatigeqqusaanngitsut, Inatsisartut inatsisaat manna malillugu oqartussaasutut suliassanik isumaginninnertik aqputigalugu ilisimalikkatik, isertuutissallugit pisussaaffeqassasut § 19, imm. 1-imi siunnersuutigineqarpoq, taamaattoq § 14 takuuk. Sulinermut imaluunniit isumaqatigiissummut pissutsit atorunnaareersimagaluartut, tamanna aamma atuuppoq.

Oqartussaasut sulisuisa inatsisartut inatsisaat manna malillugu sulianik suliarinninnerminnut atatillugu paasissutissat ilisimaligaasa amerlanerpaartaat, allanut oqaatigeqqusaasussaannngillat, tassami suliani, Kalaallit Nunaata isumannaatsuunissaa imaluunniit tamat toqqissisimatinneqarnissat pillugit navianartorsiortitsinernut tunngassuteqartussaapput. Paasissutissat tamanit tikinneqarsinnaasunut, assersuutigalugu suliffeqarfiit pillugit nalunaarsuiffinni tamanit tikinneqarsinnaasunit takuneqarsinnaasut, aamma uani pineqarput, tassami paasissutissat taamaattut nunanit allanit toqqaannartumik aningaasaliinerni, Kalaallit Nunaata isumannaatsuunissaanut imaluunniit tamat toqqissisimatinneqarnissaannut tunngassuteqartut, suliani piviusuni ilaasussaammata.

Imm. 1 malillugu nipangiussisussaataaneq taamaattoq paasissutissanut, § 14 malillugu Naalakkersuisut tamanut saqqummiussaannut atuutinngilaq. Imm. 1 malillugu nipangiussisussaataaneq inunnut, oqartussaasut ingerlatsinerannut atasumik sullissinermik suliassanik suliaqartunut aamma paasisimasalinnut, Naalakkersuisut naalagaaffimmilu oqartussaasut sinnerlugit sulisunut, matumani IT pillugu siunnersortit, IT-kkut aaqqiissutissanik, inatsit malillugu suliat pillugit paasissutissartalinnik, tikitsisinnaasut ilanngullugit, aamma atuuppoq. Sulinermut- imaluunniit isumaqatigiissummut pissutsit atorunnaareersimagaluartut, tamanna aamma atuuppoq.

Inummit, nipangiussisussaataanermi illersorneqartussatut siunertaqarfigineqartumit akuersissut, inuit imm. 1-imi taaneqartut paasissutissanik allanut oqaatigeqqusaanngitsunik ingerlatitseqqinnissaannut pisinnaatitsilersitsissanngitsoq, § 19, imm. 2-mi siunnersuutigineqarpoq.

Suliani paasissutissat, Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsinernut tunngassuteqartut pineqartussaanagerat, tassunga pissutaavoq.

Inatsisartut inatsisaat manna malillugu sulianik suliarinninnermut atatillugu oqartussaasut arlallit akornanni paasissutissanik avitseqatiginniissinnaaneq pisariaqartinneqassaaq. Imm. 1 apeqqutaatinnagu, paasissutissat allanut oqaatigeqqusaanngitsut oqartussaasunut erseqqinnerusumik taaneqartunut ingerlateqqinneqarsinnaanerat pillugit Naalakkersuisut malittarisassanik aalajangersaasinnaasut, § 19, imm. 3-mi siunnersuutigineqarpoq.

§ 20-imut

Imm. 1-imut

§ 8 malillugu imaluunniit § 11 malillugu naalakkiuteqarnermut itigartitsissuteqarnermut imaluunniit inerteqquteqarnermut akerliusumik isumaqatigiissutigineqartoq imaluunniit attanneqartoq atuuttuussuseqassanngitsaq, imm. 1-mi siunnersuutigineqarpoq.

Aningaasaliisut nunanit allaneersut aamma taakku isumaqatigiissuteqarfigisaat, isumaqatigiissut § 8 malillugu itigartitsissutigineqartumut imaluunniit inerteqqutigineqartumut akerliusoq tatigisinnaanngikkaat, aalajangersakkap ilaatigut kinguneraa.

Aningaasaliisut nunanit allaneersut aamma taakku isumaqatigiissuteqarfigisaasa isumaqatigiissut nunamit allamit aningaasaliinerup atorunnaarsinneqarnissaa pillugu § 11 malillugu itigartitsissutigineqartumut imaluunniit inerteqqutigineqartumut akerliusoq tatigisinnaanngikkaat, aalajangersakkap kinguneraa. Tassani akuusut peqqusersuitsumik imaluunniit piaaralutik iliuuseqarsimanerat apeqqutaanngilaq.

Isumaqatigiissutip atortussaannngitsup inatsisitigut sunniutaasa atortussaannngitsunngortitsineq pillugu malittarisassat nalinginnaasut malissavai, matumani akuusut akornanni akiliutit utertinneqarnissaaq ilanngullugit.

Imm. 2-mut

§ 8 malillugu itigartitsineq imaluunniit § 11 malillugu atorunnaarsitsinissamik naalakkiuteqarneq malinneqanngippat, akuersissut Kalaallit Nunaanni oqartussanit atulersinneqartoq, suliniummut nunamit allamit aningaasaliinnermut tunngassuteqartoq, Naalakkersuisut atorunnaarsissinnaassagaat, imm. 2-mi siunnersuutigineqarpoq.

Kalaallit Nunaata isumannaatsuutinissaanut imaluunniit tamat toqqissisimatinneqarnissaannut eqqarsaatigisassat pissutigalugit, malititsinnginnerup iliuusereriikkanut Naalakkersuisut kinguneqartitsisinnaanerat, aalajangersakkap periarfissippaa. Kalaallit Nunaanni oqartussaasunit tamanit akuersissutit atorunnaarsinneqarnissaannik aalajangersakkakkut Naalakkersuisut

periarfissaqalerput. Taamaalilluni namminersorlutik oqartussani oqartussaasuni kommuninilu oqartussaasut tassani ilaatinneqarput.

Akuerissutitut tamanut, suliniutitut, nunamit allamit aningaasaliinermut tunngassuteqartumut, atulersinneqartunut, aalajangersagassatut siunnersuut atuutissaaq. Aningaasaliisumut nunamit allameersumut, Kalaallit Nunaanni immikkoortortaqaqfimmumut imaluunniit akuusunut attuumassuteqartunut allanut akuersissutit atulersinneqartut Naalakkersuisut atorunnaarsissinnaagaat tamatuma kinguneraa.

Atsikkutigiissitsinissamik tunngavik isiginiarlugu aalajangersagassatut siunnersuutigineqartoq atorneqassaaq.

§ 21-imut

§ 11 malillugu nunamit allamit aningaasaliinerup atorunnaarsinneqarnissaa pillugu naalakkiut malinneqanngippat, immikkoortortaqaqfimmumut pineqartumi Kalaallit Nunaanni najugaqartumi, aamma aningaasaliisartup nunamit allaneersup naalakkersugaani, piginnittutut piginneqataassuseq taasisinnaatitaanermut attuumassuteqartoq atorunnaarsinniarlugu Naalakkersuisut Danmarkimi Erhvervsstyrelsimut saaffiginnissutigisinnaagaat, § 21-imi siunnersuutigineqarpoq. Naalakkersuisut noqqaassuteqarnerisa kingorna Erhvervsstyrelsip taasisinnaatitaanerup atorunnaarsinneqarnissaanut periarfissaaq taamaallaat atorsinnaagaa, naatsorsuutigineqarpoq. Taamaalilluni Inatsisartut inatsisaat malillugu Erhvervsstyrelsi nammineerluni pisinnaatitaanngilaq.

§ 11 malillugu nunami allamit aningaasaliinerup atorunnaarsinneqarnissaanik peqqussummut piffissaliussaaq naasimappat, aningaasaliisartoq nunamit allameersooq pineqartoq Naalakkersuisut siullermik malitseqqullugu nukingisaassavaat aamma nunamit allamit aningaasaliineq sulii atorunnaarsinneqanngippat, suliffeqaqfimmumut Kalaallit Nunaanni najugaqartumi, aamma aningaasaliisartup nunamit allaneersup pineqartup naalakkersugaani, piginnittutut piginneqataassutit taasisinnaatitaanermut attuumassuteqartup atorunnaarsinneqarnissaa pillugu Danmarkimi Erhvervsstyrelsi aalajangiissasoq, Erhvervsstyrelsimut Naalakkersuisut saaffiginnissuteqassapput.

Aningaasaliisartup nunamit allameersup kingusinnerusukkut taasisinnaatitaaneq pisaareqqinnaviannngilaa, tassami aningaasaliisartup taasisinnaatitaanermik arsaarneqarnera pillugu aalajangiineq, aningaasaliisartup suliffeqaqfimmumut piginnittutut piginneqataassutinik pigisaqarnera, Kalaallit Nunaata isumannaatsuunissaanut aamma tamat toqqissisimatinneqarnissaannut navianartorsiortitsisinnaanerani tunngaveqarmat.

Aningaasaliisartoq nunamit allameersoq, nunamit allamit aningaasaliinerup, Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisup atorunnaarsinneqarnissaanik naalakkiuummut malinninnginnermigut, inatsisinut akerliusumik iliuuseqarsimammat, pisuni taamaattuni pinngitsaaliisummik taarsiissutitalimmik pigisanik piginnikkunnaarsitsinissamut piumasaqaatit nalinginnaasumik naammassineqarnavianngillat. Kisianni suliat takkutissappata, taakkunani piumasaqaatit qaqutigorluinnaq naammassineqarsimallutik, § 16 malillugu pinngitsaaliisummik taarsiissutitalimmik pigisanik piginnikkunnaarsitsineq pisinnaassaaq.

§ 22-imut

Inatsit malillugu aalajangiinerit eqqartuussivimmi misilinneqarsinnaanerit pillugit malittarisassanik aalajangersaasoqassasoq, § 22, imm. 1-mi siunnersuutigineqarpoq.

§§ 8-mit 11 ilanngullugu aamma § 20, imm. 2-mi aalajangersakkat malillugit itigartitsineq, naalakkiuteqarneq, inerteqquteqarneq imaluunniit piumasaqaatit il.il. pillugit misiliinissamut eqqartuussisunut suliaassanngortitsineq, akuusumut pineqartumut aalajangiinerup nalunaarutigineqarnerata kingorna qaammatit 6 iluanni saqqummiunneqassasoq, § 22, imm. 2-mi siunnersuutigineqarpoq. Inatsit malillugu aalajangiinernut tunngatillugu, suliat naammassineqarnissaannik pisariaqartitsinerup eqqarsaatigineqarnera pissutigalugu eqqartuussisunut suliaassanngortitsinissamut piffissaliussaq aalajangersarneqarpoq.

§ 22, imm. 3-tut siunnersuutigineqartukkut, pisuni immikkut ittuni, inuit, Politiit Immikkut Paasiniaasartuini sulisut, Naalakkersuisut eqqartuussinermi sinniisutut pisinnaatitaatit eqqartuussinermi peqataatissinnaavaat. Suliap ingerlanerani Politiit Immikkut Paasiniaasartuinit paasissutissanik, aarlerinaatip nalilerneqarneranut tunngaviliisimasunik, allanut oqaatigeqqusaanngitsunik taamaattoqassappat saqqummiussisoqartussaasussaananeranut atatillugu tamanna isigineqarneqassaaq. Taamaattoqassappat Politiit Immikkut Paasiniaasartuinit inatsisilerinermut tunngasumik suliaqartumik, eqqartuussivimmi peqataatitsisoqassasoq naatsorsuutigineqarpoq.

§ 23-imut

Eqqartuussivimmut suliamik saqqummiussisimasumut, imaluunniit suliame akuusutut ilannguttumut, aamma paasissutissat, § 18, imm. 2 malillugu aalajangersakkami paasissutissat ilaatinneqartut eqqarsaatigalugit, akuusunut allagaatinik takunnissinnaatitaanermi mininneqartut eqqarsaatigalugit, taanna sinnerlugu akuusutut pisinnaatitaasumut soqutigisanik isumaginnittussamik, eqqartuussivik eqqartuussissuserisumik immikkut ittumik ivertitsissasoq, §

23, imm. 1-imi siunnersuutigineqarpoq. Eqqartuussissuserisoq illersuisut immikkut ittu ilaannit, Kalaallit Nunaanni eqqartuussisarnermik inatsimmi § § 339 c, imm. 7, aamma § 392, imm. 4 malillugit suliani ivertinneqarsinnaasoq, ivertinneqassaaq.

Akuusoq aamma taassuma eqqartuussissuserisua paasissutissanik pineqartunik tikitsisinnaanngillat aamma akuusutut piginnaatitaaffinnik nalinginnaasunik suliaqarnissamik periarfissaqanngillat, matumani, naak taakku eqqartuussivimmut saqqummiunneqaraluartut aamma eqqartuussiviup aalajangiinerani tunngavittut ilaagaluartut, ingammik paasissutissat pineqartut pillugit naliliisinnaasussaaneq aamma oqaateqarsinnaasussaaneq ilanngullugit. Tassunga taarsiullugu tamanna eqqartuussissuserisumit immikkut ittumit, atortussat suliami ilanngunneqarnissaat siunertaralugit eqqartuussivimmut saqqummiunneqartut pillugit ilisimasaqartumit aamma oqaaseqaateqarnissamik periarfissaqartumit isumagineqassapput, matumani paasissutissat taakku allanut oqaatigeqquneqanngitsut, isumannaatsuunissamut tunngasut pissutigalugit akuusumut taassumalu eqqartuussissuserisuanut ingerlateqqinneqarsinnaanngitsut ilanngullugit. Paasissutissat taakku allanut oqaatigeqqusaanngitsut eqqarsaatigalugit, akuusoq sinnerlugu akuusutut piginnaatitaaffiit eqqartuussissuserisup immikkut ittup suliarissavai, kisianni allakkut suliami akuussanngilaq imaluunniit akuusumut sinniisuussanngilaq. Akuusoq eqqartuussissuserisuni peqatigalugu inunnut sakkutuujunngitsunut eqqartuussinnermut tunngasunik akuusutut pisinnaatitaappata, matumani paasissutissat, sullissisumut ingerlateqqinneqartut aamma eqqartuussivimmut saqqummiunneqartut eqqarsaatigalugit, eqqartuussissuserisoq immikkut ittoq sullissisoq sinnerlugu taamaalilluni sinniisuussanngilaq. Eqqartuussissuserisoq immikkut ittoq assersuutigalugu paasissutissat, akuusut allagaatinik takunnissinnaatitaanerannit ilaatinneqanngitsunik paasisimasaqarpoq aamma oqaaseqaateqarsinnaalluni, soorlu aamma § 24-itut siunnersuutigineqartoq malillugu eqqartuussissuserisup paasissutissat taamaattut akuusumut taassumalu eqqartuussissuserisuanut ingerlateqqinneqarnissaat noqqaassutigisinnaagai, aamma paasissutissat ingerlateqqinneqannginnissaannik eqqartuussiviup aalajangiinera aalajangeqqitassanngortissinnaavaa.

Imm. 1 malillugu eqqartuussissuserisoq immikkut ittoq suliami eqqartuussinerit tamaasa pillugit nalunarfigineqassasoq amma taakkunani peqataanissaminut pisinnaatitaasoq, § 23, imm. 2-mi siunnersuutigineqarpoq. Suliami atortussat ilaatinneqartut pillugit eqqartuussissuserisoq ilisimatinneqassaaq aamma assilillugit sanaqqinneqarnerannik tunineqassalluni, taamaattoq imm. 3 takuuk.

Kalaallit Nunaata isumannaatsuunissaa imaluunniit tamat toqqissimatinneqarnissaat eqqarsaatigalugit, eqqartuussissuserisumut immikkut ittumut assilillugit sanaqqinneqartunik tunniussisoqarsinnaanngitsaq, Naalakkersuisut aalajangersinnaagaat, § 23, imm. 3-mi siunnersuutigineqarpoq. Aalajangiineq eqqartuussissuserisumit immikkut ittumit eqqartuussivimmut saqqummiunneqarsinnaavoq, aamma tassunga taarsiullugu atortussanut eqqartuussissuserisup qanoq ililluni tikitsisinnaanera pillugu taamaattoqassappat

isumaqatigiinngissut eqqartuussiviup isummerfigisinnaavaa. Assilillugit sanaqqitat tunniunneqarnissaat pillugit apeqqut eqqartuussissuserisumit immikkut ittumit eqqartuussivimmut qinnuteqarnikkut saqqummiunneqarsinnaavoq, aamma tassunga taarsiullugu atortussanut eqqartuussissuserisup qanoq ililluni tikitsisinnaanera pillugu taamaattoqassappat isumaqatigiinngissut eqqartuussiviup isummerfigisinnaavaa.

§ 24-imut

Paasissutissat akuusut allagaatinik takunnissinnaatitaanerani ilanngunneqanngitsut, eqqartuussissuserisumut immikkut ittumut ingerlateqqinneqarsinnaanerani pillugit § 24-imi aalajangersagassatut siunnersuutigineqartoq imaqarpoq.

Kalaallit Nunaata isumannaatsuunissaa imaluunniit tamat toqqissisimatinneqarnissaat eqqarsaatigalugit akuliunneq pisariaqartinneqarnissaa pillugu naliliinermi paasissutissat allanut oqaatigeqqusaanngitsut ilaatinneqartut, erseqqissumik aallaaviatigut eqqartuussivimmut saqqummiunneqassapput. Taamaattoq naliliinermi paasissutissat ima pissuseqartut ilaatinneqarsimasinnaapput, Kalaallit Nunaata isumannaatsuunissaanut, matumani immikkut ittumik paasiniaasartut sulineri ilanngullugit, taakku allanut ingerlateqqinneqarsinnaanatik aamma eqqartuussivimmi misiliinermut ilaatillugu ingerlateqqinneqarsinnaanatik.

Akuusut allagaatinik takunnissinnaatitaanerannit paasissutissat ilaatinneqanngitsut, immikkut ittumik eqqartuussissuserisumut § 23, imm. 1 malillugu ivertinneqartumut, ingerlateqqinneqassasut, § 24, imm. 1-imi siunnersuutigineqarpoq. Paasissutissat taamaattut immikkut ittumik eqqartuussissuserisumut ingerlateqqinneqarsimappata, pineqartup akuusumut imaluunniit taassuma eqqartuussissuserisuanut suliaq oqallisigissanngilaa aamma eqqartuussinerni, taakkunani akuusoq imaluunniit taassuma eqqartuussissuserisua najuulluni, oqaaseqaateqarsinnaanngilaq. Illuatungaani pisarpat, immikkut ittumik eqqartuussissuserisup, assersuutigalugu akuusumut apeqqutinik ilassutaasunik apeqquteqarnermigut paasissutissanik, isumannaallisaanermut tunngassuteqartut pissutigalugit akuusumut ingerlateqqinneqarsinnaanngitsut, ilisimasaminik piaarinani ersersitsisinnaanera aarlerinaateqarsinnaavoq. Tamatuma saniatigut qaqugukkulluunniit akuusoq aamma taassuma eqqartuussissuserisua immikkut ittumik eqqartuussissuserisumut allakkatigut suliaq pillugu nalunaaruteqarsinnaapput.

Isumannaallisaanermut pissutsinut tunngassuteqartunut akuusut allagaatinik takunnissinnaatitaanerannit mininneqarneq tunngavilersorsinnaanngippassuk, § 23, imm. 1 malillugu, paasissutissat Inatsisartut inatsisaat manna malillugu Naalakkersuisut aalajangiineranni ilaatinneqarsimasut, inummumut aamma taassuma eqqartuussissuserisuanut, eqqartuussiviup, nammineq aalajangiinermigut imaluunniit immikkut eqqartuussissuserisup piumasaaqateqarneratigut, ingerlateqqissinnaagai, § 24, imm. 2-mi siunnersuutigineqarpoq.

Aalajangiineq aalajangiinikkut, aamma immikkut ittumik eqqartuussissuserisoq aamma inuk pisortat sinnerlugit suliami akuusoq, oqaaseqaateqarnissaminnik periarfissinneqareerneranni aalajangerneqassaaq. Aalajangiineq inunnit, oqaaseqatigiit aappaanni taaneqartunit, aalajangeqqitassanngortinneqarsinnaavoq. Paasissutissat ingerlateqqinneqarsinnaanerit pillugit aalajangiinerup aalajangeqqitassanngortinneqarnera kinguartitsinermik kinguneqassaaq.

Taamaalilluni pisuni, taakkunani eqqartuussiviup piviusumik naliliinerup kingorna, isumannaallisaanermut tunngasumik pissutsit, paasissutissat allanut oqaatigeqqusaasariaqannginnerannik aamma akuusumut imaluunniit taassuma eqqartuussissuserisuanut tunniunneqannginnissaannik pissutissaqartitsisut pigineqanngitsut aalajangerpagu, aalajangersagassatut siunnersuummi pisut ilaatinneqarput.

Imm. 2-mi oqaaseqatigiit siulliit malillugit eqqartuussivik aalajangiisimappat, paasissutissat pineqartut eqqartuussivimmut suliami ilaannnginnissaat, Naalakkersuisut aalajangersinnaagaat, § 24, imm. 3-mi siunnersuutigineqarpoq.

§ 25-imut

Eqqartuussinerup ilaa, tassani paasissutissat aalajangiinerup tunngassuteqarlutik imaluunniit saqqummiunneqarlutik imaluunniit suliarineqarlutik, taakku akuusut allagaatinik takunnissinnaatitaanerannit ilanngunneqaratik imaluunniit ilanngunneqarsinnaanatik, aamma § 24, imm. 2 malillugu aalajangiinerup ilaatinneqanngitsut, matut matullugit ingerlanneqassasut, § 25, imm. 1-mi siunnersuutigineqarpoq. Eqqartuussinerup ilaani tassani § 23, imm. 1 malillugu immikkut ittumik eqqartuussissuserisoq ivertinneqartoq peqataassaaq, kisianni inuk, aamma taassuma eqqartuussissuserisua peqataassanngillat.

Taamaalilluni eqqartuussinerup ilaani tamani, tassani paasissutissat taamaattut saqqummiunneqarsimallutik imaluunniit allakkut Naalakkersuisut sinniisaata eqqartuussivimmut suliamik ingerlatsinerani saqqummiunneqarsimallutik, tamanna atuuppoq.

Eqqartuussinerit, imm. 1 malillugu tamakkiisumik imaluunniit ilaannakoortumik matut matoqqatillugit ingerlanneqartut qanoq naammassineqassanersut, eqqartuussiviup aalajangissagaa, § 25, imm. 2-mi siunnersuutigineqarpoq.

Suliami eqqartuussinerit allatigut matut ammatillugit imaluunniit matoqqatillugit ingerlanneqarnissaat pillugit apeqqut, ullumikkutut malittarisassat nalinginnaasut malillugit aalajangiiffigineqassaaq.

§ 26-imut

Imm. 1-imut

Inatsisartut inatsisaat ulloq 1. januar 2026 atuutilissasoq, imm. 1-imi siunnersuutigineqarpoq.

Imm. 2-mut

Nunanit allanit aningaasaliinermut, inatsisip atuutilinnginnerani naammassineqarsimasunut, Inatsisartut inatsisaat atuutissanngitsoq, imm. 2-mi siunnersuutigineqarpoq.

Nunamit allamit aningaasaliineq qaqugukkut naammassineqarsimasutut isigineqarsinnaanersoq pillugu, aningaasaliinerup suussutaa apeqqutaavoq.

Kalaallit Nunaanni suliffeqarfimmi piginnittutut piginneqataassutit pissarsiarineqarnerat pineqarpat, piginnittuunermi pissutsit Erhvervsstyrelsimut nalunaarutigineqarneranut tassaassaaq piffissaq aallaaviatigut pingaaruteqartinneqartoq. Isumaqatigiisummit tunngaveqartumik naalakkersuisinnaaneq imaluunniit sunniuteqarsinnaaneq pineqarpat, isumaqatigiissutip pineqartup isumaqatigiissutigineqarnera imaluunniit suliniutip aallartinneqarnera tassaassaaq piffissaq aallaaviatigut pingaaruteqartinneqartoq.

Nunamit allamit aningaasaliineq pioreersoq, Inatsisartut inatsisaata atuutilersinneqarnerata kingorna § 3, nr. 4, naqinneq b-mut siunnersuummi killiliussat aalajangerneqarsimasut qaangerlugit annertusineqarpat, nunamit allamit aalajangiinerup annertusineqarnera tassaassaaq, Inatsisartut inatsisaannit atuiffiusussaaq. Taamaattoq Inatsisartut inatsisaata atuutilinnginnerani aningaasaliinermut naammassineqarsimasunut akuliuttoqarsinnaassanngilaq.

Tusarniaaneq pillugu allakkiaq

Siunnersuut piffissami 15. august 2025-imiit 13. oktober 2025-imut Naalakkersuisunut tusarniaanernut ammaassivimmi tamanit tikinneqarsinnaasimavoq, soorlu aamma siunnersuut piffissami tassani tulluuttunut tusarniutigineqarsimasoq:

- Naalakkersuisut Siulittaasuata Naalakkersuisoqarfia
- Aningaasaqarnermut Akileraartarnermullu Naalakkersuisoqarfik
- Nunanut Allanut Ilisimatusarnermullu Naalakkersuisoqarfik
- Aalisarnermut, Piniarnermut, Nunalerinnermut Imminullu Pilersornermut Naalakkersuisoqarfik
- Ineqarnermut, Attaveqaasersuutitut Isorliunerusunullu Naalakkersuisoqarfik
- Ilinniartitaanermut, Kulturemut, Timersornermut Ilageeqarnermullu Naalakkersuisoqarfik
- Meeqqanut, Inuusuttunut Ilaqutariinnullu Naalakkersuisoqarfik
- Isumaginninnermut, Suliffeqarnermut Nunamullu Namminermut Naalakkersuisoqarfik
- Pinngortitamut Avatangiisinullu Naalakkersuisoqarfik
- Peqqissutsimut Inunnullu Innarluutilinnut Naalakkersuisoqarfik
- Statsministereqarfimmut
- Finansministereqarfimmut
- Udenrigsministereqarfimmut
- Inatsisit Atuutsinneqarnerannut ministereqarfimmut
- Erhvervsministereqarfimmut
- Erhvervsstyrelsimut
- A-revisionimut
- Advokatfirmaet Malling & Hansen Damm-imut
- Avannaata Kommunianut
- Bankivimmut
- Nuummi BDO Statsautoriseret Revisionsaktieselskabimut
- BK Revision ApS-imut (Qaqortoq)
- Atuisartoqarnermut Unammilleqatigiinnermullu Aqutsisoqarfimmut
- Sulisitsisunut GE-mut (Grønlands Erhverv)
- Grønlands Revision A/S-imut
- Grønlandsbankimut
- Nunatsinni Advokatinut
- Kirk Larsen & Ascanius Greenland-imut

- KNAPK-mut
- Kommune Kujallermut
- Kommune Qeqertalimmut
- Kommuneqarfik Sermersuumut
- Nalik Ventures A/S-imut
- Nuna Law-imut
- Paulsen | Keldsen-imut
- Qeqqata Kommunianut
- Revisoren i Sisimiut-nut
- SIK-mut (Sulineramik Inuussutissarsiuteqartut Kattuffiannut)
- SISA-mut
- Transparency International Greenland-imut
- Visit Greenland A/S-imut

Tusarniaanermut piffissaliussap naanerani Naalakkersuisut tulluittunit tusarniaanermut akissutini tiguisimapput:

- Ineqarnermut, Attaveqaasersuutitut Isorliunerusunullu Naalakkersuisoqarfik
- Meeqqanut, Inuusuttunut Ilaqutariinnullu Naalakkersuisoqarfik
- Aningaasaqarnermut Akileraartarnermullu Naalakkersuisoqarfik
- Pinngortitamut Avatangiisinullu Naalakkersuisoqarfik
- Isumaginninnermut, Suliffeqarnermut Nunamullu Namminermit Naalakkersuisoqarfik er
- Grønlandsbanken
- Sulisitsisut (GE)
- Nalik Ventures A/S
- Nuna Law
- SIK (Sulineramik Inuussutissarsiuteqartut Kattuffiat)
- Visit Greenland A/S
- Inu:IT
- Transparency International Greenland

Tulluittuni tusarniaanermut akissutit aamma allanngortitsinissamut siunnersuutit, tusarniaanerup nalaani takkussimasut suliarineqarput. Naalakkersuisut tusarniaanermut akissutitut oqaaseqaataat uingasumik allanneqarput.

Tusarniaanermut akissutit tamarmik Inatsisartuni ataatsimiititaliamut suliarinnittussamut tamakkerlugit ilanngullugit nassiunneqarput.

1. Oqaaseqaatit nalinginnaasut

SIK siunnersuummut oqaaseqaateqanngilaq.

Ingerlatseqatigiiffiit pingaarutillit atortullu piginnittuisa naleqqutinngitsumik pissarsiarineqarnissaannut imaluunniit aningaasaliissutitut illersuinissaq pillugu inatsisissatut siunnersuutip siunertaa nalinginnaasumik naammagisimaarlugu **Transparency International Greenlandip** oqaatigaa.

Ukiuni aggersuni mittarfiit, timmisartut aqqutaat nutaat aamma nalinginnaasumik takornariaqarnerup siuariartornera aqqutigalugit, annertunerusumik tikinneqarsinnaaneq naatsorsuutigineqassasoq, **Visit Greenlandip** maluginiarpaa. Tassunga atatillugu nunanit allanit aningaasaliinerit pisut ilaanni misigisassanut neqeroorutit nutaat ineriartortinneqarneranni aamma takornarialerinermit attaveqaasersuutit patajaallisarneqarneranni tangertatut ilaasinnaapput. Aningaasaliinernut taamaattunut killiliussat erseqqissut inuussutissarsiummi sullissisunut siumut nalunngisaqareermik pilersitsisinnaavoq aamma suleqatigiinneq, niuerfinnut isersinnaaneq aamma piginnaasanik ineriartortitsineq ikorfartorsinnaallugu. Takornarialerineq pillugu suliaasaqarfinnut inatsisissatut siunnersuut pingaaruteqarsinnaasoq, kisianni suliaasaqarfik misissuinermit ilaatinneqarnerasoq erseqqissumik takuneqarsinnaanngitsoq, Visit Greenlandip maluginiarpaa. Tamatuma erseqqissaavigineqarnera takornarialerinermit sullissisunut annertunerusumik erseqqissititsinermit aamma pitsaanerusumik pilersaarusiornissamut ilapittuutaataasinnaavoq.

Inatsisissatut siunnersuummi § 4-mi suliaasaqarfinnut/sammisanut allattorneqartuni ilaatinneqartunut aningaasaliinerit pineqartillugit, takornariaqarnermut suliaasaqarfiup ilaatinneqarnera naatsorsuutigineqartoq, Inuussutissarsiornermut, Aatsitassanut, Nukissiutitut, Inatsisit Atuutsinneqarnerannut Naligiissitaanermullu Naalakkersuisoqarfiup maluginiarpaa.

Aningaasaliinernut, tassunga atatillugu navianartorsiortitsisinnaasunut, Kalaallit Nunaata isumannaatsuunissaata aamma tamat toqqissisimatinneqarnissaasa illersorneqarnissaat pillugit pingaarnertut anguniagaq **Sulisitsisut** tapersersorpaat. Misissuisarnernut systemi uppernassusilik aamma akimut ersittoq, Kalaallit Nunaata aalaakkaasutut aamma akisussaassuseqartutut aningaasaliinissamut inatsisitigut oqartussaaffiuneranik tatiginninnerup attanneqarnissaanut pingaaruteqarpoq. Tamatuma peqatigisaanik aningaasaliisut misissorneqarnissaannut systemip ingerlalluortoq siumut nalunangereertuussasoq, assigiaartuussasoq aamma inuussutissarsiuteqarnerup soqutigisaanik akuersaartuussasoq, taamaalilluni siunertarineqanngitsumik aningaasatigut ineriartornermik, aningaasaatit imaluunniit nunat tamat akornannit akuusut tikinneqarsinnaanerannut kigaalakuersuisuussannginnera, Sulisitsisut erseqqissassallugu kissaatigaat.

Ilaatigut nunat tamat akornanni misilittakkat ingammik ingerlatseqatigiiffiit naalagaaffimmit aqunneqartut eqqarsaatigalugit, pisinikkut imaluunniit taarsigassarsisitsinikkut naalagaaffinnut, aamma taakku niuernermit tunngassuteqarluinnartut saniatigut, ingerlatseqatigiiffinnut naalagaaffimmit pigineqartunut, naalagaaffimmut taarsigassarsisumut pissaanermik atuisinnaanerannut periarfissaqarnerat eqqarsaatigalugit, inatsisissatut siunnersuut pisariaqartinneqartoq, **Grønlandsbanken** isumaqarpoq. Tamatuma saniatigut, assersuutigalugu Rusland-Ukrainimi sorsunnermut il.il. saqitsaassutitut arlalinnut atatillugu, iliuusereriikkanut kinguneqartitsinerit unioqqutitsinneqarnissaannut navianartorsiutikkut, dual-use pillugu ajornartorsiutip qanoq issusia soqutiginarsisinneqarpoq. Taamaattoq nunanit allanit aningaasaliinerit pillugit nunat allat malittarisassiuineri takuneqarsinnaasunut naleqqiullugu, inatsisissatut siunnersuutikkut sukaterinerit arlallit ilanngunneqarmata, Grønlandsbankip maluginiaqquaa.

Kalaallit Nunaata avannaarsuani kangianilu nunami allanngutsaaliugassatut immikkoortitami PAN-ip angallanneq aamma suliniutit pillugit malittarisassiuineranut kiisalu Kalaallit Nunaanni nunap ilaani inoqanngitsuni (“ilisimasassarsiorlunissamut akuersissutitut”) inatsisissatut siunnersuut pingaaruteqarsinnaasoq **Pinngortitamut Avatangiisinullu Naalakkersuisoqarfiup (PAN-ip)** maluginiarpaa. Sumiiffinni avinngarusimasumiittuni nunanit allanit aningaasalersukkanik ilisimasassarsiorluni suliniutit arlallit, sullissisunit/suliffeqarfinnit/sullissivinnit pioreersunit suli alliertortunit, suliassaqarfinnit sukkasuumik alliertortumit siulersorneqartut ingerlammata, aamma suliniutit taakku pilersaarusiornermut pingaaruteqarsinnaammata, PAN-ip tassunga atatillugu maluginiarpaa. Kalaallit Nunaanni sumiiffinni avinngarusimasumiittuni angallannerit suliniutillu malittarisassiuinneqarnerat pilersinneqareermat, matumani akuersissummik peqarnissaq aamma uppersaasarsuissaq pillugit piumasaqaatit ilanngullugit, PAN-ip allaaseraa. Suliniutit ilaat – ingammik ilisimatusarnermik- aamma ilisimasassarsiornermik tunngaveqartut – pilersaarusiornermut tunngaveqartumik najuunnermik kinguneqarsinnaapput aamma taamaammat misissuinissamut Inatsisissatut siunnersuutigineqartumi killiliussat iluaniittussat isumaliutigineqartariaqaraluartik. Pilersaarusiornermut tunngasumik najunnermi oqaatsit imaasa suliniutit suussusaat soqutigisallu assigiinngitsorpassuit matussusersinnaammassuk, inatsisiliornermi killiliinerit eqqunneqarnissaat sioqqullugu pissutsit taakku erseqqissaavigineqartariaqartut, PAN-ip kajumissaarutigaa. Inatsisissatut siunnersuummi matumani ingammik § 4-mut atatillugu tamanna atuuppoq, tassani nunanit allanit aningaasaliissutit “suliassaqarfiit suliniutillu immikkut ittumik malussarissusillit” iluanniittunut sioqqutsisumik Naalakkersuisunit akuersissummik piumasaqaateqartoqarluni.

Inatsisissatut siunnersuut taamatut iluseqarluni immikkoortut ilaanni erseqqissusermik amigaateqartoq **Nuna Law-ip** maluginiarpaa, aamma aningaasaliisumut aamma Kalaallit Nunaanni suliffeqarfimmut, nunamit allamit aningaasaliineq aqputigalugu aningaasaatinik pissarsinissamik kissaateqarsinnaasumut siumut nalunngeriigaqarnissaq siunertaralugu, misissuinissamik aaqqissuussineq erseqqissarneqassasoq siunnersuutigalugu.

Siunnersuut eqqasuuteqarluni **Inu:IT-p** atuarpaa, ilaatigut pissutigalugu Inu:IT Kalaallit Nunaanni suliffeqarfippassuit allat assigalugit, nunap killeqarfiisa avataannit piginnittoqarluni suliffeqarfiummat.

Inatsisissatut siunnersuutip suliarineqarnerani, oqimaaqatigiissitsinissap anguneqarnissaa pingaartinneqarsimavoq, taamaalilluni aningaasaliinermi avatangiisit ajortumik sunnerneqassagaluarpata sunnerinnerup millisinneqarnissaa, tamatumalu peqatigisaanik isumannaatsuunissamut tunngatillugu Kalaallit Nunaata isumannaatsuunissaanut aamma tamat toqqissisimatinneqarnissaanut aarlerinaatinut tunngatillugu qajannaatsumik aaqqiinissaq anguneqassalluni.

Suliassa qarfinnut immikkut ittumik malussarissunut akuersissuteqarnissamik aaqqissuussinissamut inatsit malillugit pisussaaffiusup aamma suliassa qarfinnut allanut nammineq kajumissuseq malillugu nalunaaruteqarnissamik aaqqissuussinissamut ataqatigiissitsinissamik siunnersuutip isumannaatsuunissamut navianartorsiortitsinermut tunngatillugu piumasaqaatit naleqqussarneqarsinnaanerat periarfissippaa. Suliassa qarfinnut suliniutinullu immikkut ittumik malussarissusilinnut piumasaqaatinik sukannernerusunik piumasaqaateqarpoq, tassani isumannaatsuunissamut navianartorsiortitsinerit annerpaatut nalilerneqarlutik, tamatumalu peqatigisaanik suliassa qarfinni allani tamani piumasaqaatit sukangannginnerusut aamma allanngorarsinnaasut atuupput.

Tusarniaanermut akissutit tiguneqartut Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup maluginiarpai. Aningaasaliisarnermi misissuinissamut suliassa qarfiup malittarisassiuunneqarnissaa pisariaqartinneqartumik pisariaqartinneqartoq, naalakkersuisoqarfiup nalilerpaa, aamma taamaammat inatsisissatut siunnersuut pissutissaqarpoq. Naalakkersuisoqarfiup tusarniaanermi akissutit tiguneqartut isummerfigisimavaa aamma tamanna pisariaqartutut isigineqartillugu, inatsisissatut siunnersuut aaqqissimallugu.

Inatsisiliornernut allanut tunngatillugu inatsisissatut siunnersuutip isummenera amigaatigineqartoq **Transparency International Greenland-ip** maluginiarpaa. Ingammik ingerlatseqatigiiffiit pillugit inatsimmut aamma unammilleqatigiinnermut inatsimmut tunngatillugu tamanna atuuppoq.

Inatsisissatut siunnersuummi matumani inatsisiliornernut allanut erseqqilluinnartumik isummertoqarnissaa pisariaqanngitsoq, Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup nalilerpaa. Taamaattoqassappat malittarisassat akerleriinneranni imaluunniit isumasiuinermi nalorninerni piviusuni, pisoq piviusoq inatsisilerinerneq tunngasumik isumasiuinerneq tunngaviit il.il. nalinginnaasut aallaavigalugit nalilersorneqartussaassaaq.

1.1 Piffissaliussat

Qallunaat aalajangersagaannut assingusumik, sivisunerpaamik sulianik suliarinninnissamut piffissaq atorineqartussaag taallugu, sulianut suliarinnittarnermut piffissanik killilikkanik immikkoortiterisoqarnissaanut aalajangersakkamik ilanngussisoqarnissaa, **Nuna Law-ip** kajumissaarutigaa. Suliat suliarineqartarnerinut piffissaliussat inatsisitigut aalajangersarneqartut ilanngunneqarnissaat, aamma piffissaliussap iluani aalajangiinermik oqartussaasoq aalajangiinngippat, utaqqiisaagallartumik akuersissutit pillugit imaluunniit oqaasertalinngisamik akuersissuteqartoqartarnissaanik periarfissap pilersinneqarnissaa, **Sulisitsisut** innersuussutigaat. Inatsisissatut siunnersuut, aningaasaliisumut imaluunniit Naalakkersuisunut piffissaliussanik imaqqanngitsoq, **Ineqarnermut, Attaveqaasersuutinut Isorliunerusunullu Naalakkersuisoqarfiup (IAIN-ip)** taamatuttaaq maluginiarpaa. Taamaammat siunnersuummi aalajangersakkamik, piffissaliussanik aalajangersaasumik, imaluunniit taakku aalajangersakkani attuumassuseqartuni ilanngunneqartariaqarnerat, isumaliutigineqarsinnaavoq. *Piffissaliussat najoqqutat assigalugit allaffissornikkut aalajangerneqarsinnaasut, aamma tamanna inatsimmi toqqaannartumik malittarisassiussallugu pisariaqartinneqanngitsoq, Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup maluginiarpaa.*

1.2 Oqartussaasoq piginnaatitaasoq

Immikkoortortaqarfiup sorliup piviusumik nakkutigininneq/nakkutilliineq/sulianik suliarinninneq suliarissanerai pillugit malittarisassanik amigaateqartoq, **Transparency International Greenland-ip** maluginiarpaa.

Siunnersuummut nassuiaatini nalinginnaasuni immikkoortoq 2.3-mi allassimavoq, inatsimmut matumunnga tunngatillugu Naalakkersuisut tassaasut oqartussaasut piginnaatitaasut, aamma inuussutissarsiornermut naalakkersuisoqarfik akisussaasuusup, oqartussaasutut piginnaatitaasutut atuuffik isumagissagaa naatsorsuutigineqarpoq, soorlu aamma aqutsisoqarfimmik naalakkersuisoqarfiup ataaniittussamik, Inatsisartut inatsisaat manna malillugu suliassanik suliarinnissinnaasussamik pilersitsisoqarsinnaanera naatsorsuutigineqarsinnaavoq.

1.3 Allaffissorneq atortuulersitsinerlu

Inatsisip ilusilersorneqarnissaa aamma allaffissornikkut aqunneqarnissaa pingaaruteqartorujussuusoq, taamaalilluni aningaasaliinernut, politikkikkut piviusumik siuarsarneqartussatut kissaatigineqartunut, sulisaatsimi ingammik aatsitassanut tunngatillugu atuuttunut, tassanimi nunanit allanit aningaasaatinik immikkullu ilisimasanik annertuunik pisariaqartitsiffiummata, pisariaqanngitsumik nalornisitsinermik imaluunniit pisariaqanngitsumik allaffissornikkut sulinermik pilersitsissanngimmat, **Aningaasaqarnermut Akileraartarnermullu Naalakkersuisoqarfiup** maluginiarpaa. Inatsit, taassumalu malitsigisaanik nalunaarutit kiisalu taassuma ajornaatsumik allaffissornikkut ingerlanneqarnissaa taamaattumik erseqqissumik navianaammik tunngaveqartariaqarpoq aamma sunniuteqarluartumik pisariaqarluni. Inatsisissatut siunnersuut nassiunneqartoq tassungalu oqaaseqaatit iluaqutaasumik aaqqinneqarsinnaasut, taamaalilluni erseqqissumik navianaammik tunngaveqartariaqarnera aamma inatsisip sunniuteqarluartunngornissaata takuneqarsinnaasariaqartoq, Aningaasaqarnermut Akileraartarnermullu naalakkersuisoqarfik isumaqarpoq. Inatsimmut taassumalu malitsigisaanik nalunaarutit aqutugalugit ajornaatsumik aaqqiissutissanut siunnersuutit arlallit Aningaasaqarnermut Akileraartarnermullu naalakkersuisoqarfiup aammattaaq allattorpai.

Misissuisarnissamik aaqqissuussineq oqartussaasuni attuumassuteqartuni qanoq ililluni sulianik suliarinnittarnermi ilanngunneqarnissaata erseqqissaavigineqartariaqarnera, **PAN-ip** kaammattuutigaa. Inatsisip atortuulersinneqarnera aamma misissuinissamut ingerlatseriaatsit oqartussaasunik arlalinnik kalluissasut, PAN-ip aammattaaq maluginiarpaa. Assigiaamik sulianik suliarinnittoqarnissaa ataqatigiiaarisoqarnissaalu qulakkeerniarlugit, naalakkersuisoqarfiit attuumassuteqartut aamma allat oqartussaasut peqataasut akornanni suleqatigiinnissamut ilutsip pilersinneqarnissaa PAN-ip kaammattuutigaa.

Siunnersuutit nassiunneqartut Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup maluginiarpai, nalunaarutillu tulliusut suliarineqalerpata taakku isumaliutiginninnernut ilaajumaarput. Atuuffissaata killilerneqarnissaanut malittarisassat erseqqinnerusut aamma nunanit allanit aningaasaliinissanut

qinnuteqaatinut kiisalu nunanit allanit aningaasaliinerit nalunaarutigineqartarnissaannut ingerlatseriaatsit tulliusumik nalunaarusiornikkut aalajangersarneqassammata, naalakkersuisoqarfiup maluginiarpaa.

1.4 Nunat tamat akornanni inatsiseqartitsinerup aamma Europami Inuit Pisinnaatitaaffii pillugit Eqqartuussiviup naleqqiunnerat

Ingammik piginnittuusinnaanermut, inuup inuunermini atugaasa allanit susassarineqanngitsut illersorneqarnerannut aamma allaffigeqatigiissinnaanermut kiisalu naapertuilluartumik eqqartuunneqarnissamik pisinnaatitaanermut aamma eqqartuussinernut sunniuteqarluartunut tunngatillugu, inatsimmut oqaaseqaatit taamaallaat tunngaviusumik inatsimmut aamma Europami Inuit Pisinnaatitaaffii pillugit Eqqartuussivimmuungitsoq, naapertuuttoqarneranik isummertut, **Transparency International Greenland-ip** maluginiarpaa. Allagaatinik takunnissinnaatitaaneq aamma pisortat ingerlatsinerat pillugu paasitinneqarsinnaaneq pillugu inatsisartut inatsisaanni malittarisassat malillugit imminut tunngasunut annertusisamik allagaatinik takunnissinnaatitaaneq, sulianut, Inatsisartut inatsisaat malillugu suliarineqartunut atuutinngitsoq, inatsisissatut siunnersuutip aalajangeraa, tamannalu nunamit allamit aningaasaliisup imminut illersornissaminut aamma sunniuteqarluartumik pisinnaatitaaffimmik naammassineqarnissaanut atortumik atuinissaanut naammattumik periarfissinneqarneris pillugu apeqquummik ilungersunartumik saqqummeeratarsinnaasoq Transparency International Greenland-ip tikkuarpaa. Qanoq annertutigisumik tamanut saqqummiussissanerlutik, aamma nakkutilliinerup aallartinneqareersup nalaani, Naalakkersuisut nammineerlutik toqqaasinnaasut, Transparency International Greenlandip tamatuma saniatigut tikkuarpaa. Tamatuma peqatigisaanik allagaatinik takunnissinnaatitaanermi killiliinerit aalajangerneqartillugit, tamanna nalorninartoqartoq, Transparency International Greenland isumaqarpoq.

Oqaaseqaatit Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup maluginiarpai, aamma tusarniaaneq pillugu allakkiami immikkoortunut 2.5-imut aamma 2.7-imut innersuussilluni. Inatsisissatut siunnersuut Nunat tamat akornanni inatsiseqartitsinerup aamma Europami Inuit Pisinnaatitaaffii pillugit Eqqartuussiviup naleqqiunnerannut tunngatillugu apeqqutinik saqqummersitsinngitsoq, naalakkersuisoqarfiup nalilerpaa.

1.5 Aningaasaqarnikkut allaffissornikkullu kingunerisassat

Pisortanut aningaasaqarnikkut allaffissornikkullu kingunerisassat nalilernerqarneranni **PAN** isumaqataavoq. Misissuinissanut- aamma tusarniaanissanut suliassat allaffissornikkut

aningaasaqarnikkullu annertuumik PAN-imut kinguneqarsinnaapput, taakkulu naalakkersuisoqarfimmut massakut killiliussat aamma ilisimasassarsiornermut suliassa qarfiup isumagineqarnissaanut sulisut amerlassusilerneqarnerisa iluannit matussuserneqarsinnaanngillat. Tamanna suliassat agguataarneqarneranni aamma atortuulersitsinissap naliliiffigineqarnerani isiginiarneqartariaqarpoq.

Allaffissornerup nutaap (inuup ataatsip ukiumut suliarisinnaasaasa naatsorsorneqarnerannik, it pillugu, sulianut akiliutit il.il. pillugit) pilersinneqarnissaa ingerlanneqarnissaalu pillugit, aningaasaliinissamut kajumissutsimut inatsisip malitsigisaanik sunniutissat naatsorsuutigineqartut, ingammik aatsitassanut suliassa qarfimmi, aamma ingerlatsinerit piuminarsakkat (fast-track, stop-ur, ilitersuut erseqqissoq) qanoq ilillutik piffissamik aamma isumalluutini sipaarfiussanersut pillugit, nalinginnaasumik oqaaseqaatini nassuiaammik erseqqinnerusumik imaqartinneqassasoq, **Aningaasaqarnermut Akileraartarnermullu Naalakkersuisoqarfiup** innersuussutigaa.

Oqaaseqaatit nassiunneqartut Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup maluginiarpai, aamma atuuffissaa aamma nunanit allanit aningaasaliinissamut qinnuteqaatinut ingerlatseriaatsit kiisalu nunanit allanit aningaasaliinerit nalunaarutigineqartarnerat tulliusumik nalunaarusiornikkut aalajangersarneqassammata, naalakkersuisoqarfiup maluginiarpaa.

2. Inatsimmi immikkoortunut ataasiakkaanut

2.1 Atuuffissaa aamma nassuiaanerit

Nakkutilliinerup allanngorneranut nalunaartussaataitanerup/akuersissuteqartussaataitanerup, nassiussuinerit malittariaat aamma teknologiit, piviusumik nunap isumannaatsuuneranik sunniisinnaasut, killilerneqarnissaat isumaliutigineqassasoq, **Aningaasaqarnermut Akileraartarnermullu Naalakkersuisoqarfiup** siunnersuutigaa. Isumaqatigiissutinut piginnittunik allanngortitsinngitsunut (qanoq aningaasaliinissat pillugu ilitersuut pingaaruteqartoq pillugu piumasaqaat), “gate” (matu) pillugu piumasaqaat ilanngunneqassasoq siunnersuutigineqarpoq, taamaalilluni sullissinissamik isumaqatigiissutit nalinginnaasut siunertarineqanngitsumik eqqorneqannginniassammata.

Suliassa qarfiit suliniutillu imm. 2-mi ilaatinneqartut killilerneqarnissaannut malittarisassanik erseqqinnerusunik Naalakkersuisut aalajangersaasinnaanerat, § 4, imm. 3-tut siunnersuutigineqartup malitsigimmagu, Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup maluginiarpaa.

Suliassaqarfiit suliniutillu immikkut ittumik malussarissusillit, imm. 2-mi takuneqarsinnaasut pillugit erseqqinnerusumik erseqqissaasunik aamma killiliisunik, imm. 3-mi piginnaatitsinerup malittarisassialiarineqarnerannut atorineqarnissaa naatsorsuutigineqarpoq. Taamaalilluni piginnaatitsineq malittarisassanik suliassaqarfinnik suliniutinillu, imm. 2-mi allattorneqartunik, annertusiinermut atorineqartussaasussaannngilaq.

Siunnersuut Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup allappaa aamma nalunaarummi erseqqinnerusumik killiliinerit aalajangerneqarnerini taakku ilanngukkumaarlugit.

2.1.1 Tamat toqqissisimatinneqarnissaat (§ 3, nr. 3)

*Inatsit ajornanngippat suli ukkatarinninnerusariaqartoq, matumani tassani aningaasaliinerit, piviusumik nunap isumannaatsuunissaanut tamallu toqqissisimatinneqarnissaannut sunniisinnaasut taamaallaat ilaatinneqarnissat ilanngullugu, **Aningaasaqarnermut Akileraartarnermullu Naalakkersuisoqarfik isumaqarpoq.** “Tamat toqqissisimatinneqarnissaat” pillugit oqaatsit imarisaat, inatsisip oqaaseqaatitaani nassuiarneqarsimasutut takuneqarsinnaanngilaq, tamannalu naqqinneqartariaqarpoq.*

Aningaasaliinerit taamaattut misissornerisigut aamma akuliuttoqassappat akuliunnikkut, nunanit allanit aningaasaliinerit Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaanerisa pitsaaliorneqarnissaat, Inatsisartut inatsisaata massuma siunertarigaa, inatsimmi § 1-ip malitsigigaa, Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup maluginiarpaa. Nunanit allanit aningaasaliinernut, Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsisinnaasutut nalilerneqartunut, oqartussaasut akuliussinnaanernut periarfissaliissut pilersinneqarumaartoq, § 1-mut oqaaseqaatit malitsigaat. Inatsisip ukkatarinninnera erseqqissumik takuneqarsinnaasooq, Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfik isumaqarpoq.

§ 3, nr. 3-mi nassuiaatit pillugit aalajangersakkap “tamat toqqissisimatinneqarnissaat” ima nassuiaaraa: “pissutsit, matumuuna Kalaallit Nunaata isumannaatsuunissaanut sunnuteqartinnagit, Kalaallit Nunaata, inuinnaat naalakkersueqataanernut aamma inuiaqatigiit isumannaatsuunissaasa attassinissaanut tunngassuteqartut”, naalakkersuisoqarfiup aammattaaq maluginiarpaa. Aalajangersakkamut oqaaseqaatit naalakkersuisoqarfiup aammattaaq

innersuussutigisinnaavai, tassani “tamam toqqissisimatinneqarnissaat” pillugu nassiaaneq annertunerusumik allaaserineqarmat. Pinerluttuliornerit ilungersunartut allat, pinerluttulerinermi inatsimmi kapitali 7-mi aamma 8-mi ilaatinneqartut, kisianni aamma Kalaallit Nunaata isumannaatsuutinneqarnissaanut navianartorsiortitsinngikkaluarlutik, tamam toqqissisimatinneqarnissaannik annertuumik navianartorsiortitsisinnaasussat pineqarsinnaammata, tassani takuneqarsinnaavoq.

Tamatuma saniatigut tamam toqqissisimatinneqarnissaannut eqqarsaatiginninneq pitsaaliuinermut, qulaajaanermut aamma isumannaatsuunissamut navianartorsiortitsinerup akiornissaanut, aamma tunngaviusumik malittarisassanik tunngaveqarnermut inuiaqatigiinnilu demogratiskiusuni naleqartitanut naapertuuttumik isumannaallisaanermut suliniutit naammassineqarnissaannut piginnaasaqarnermut tunngassuseqarsinnaapput.

Ilaatigut iliuutsit, ima suussuseqanngitsut, taakku nr. 2 malillugu Kalaallit Nunaata isumannaatsuunissaanik kalluillutik, kisianni inuiaqatigiit ingerlasinnaanerannut nalinginnaasumik taamaattoq sunniisinnaasut, assersuutigalugu attaveqaasertuutit pisariaqartinneqartut, inuiaqatigiit ingerlaannarnissamut piginnaasaanut aamma inuiaqatigiinni toqqissisimanerup isumannaatsuunerullu attannissaannut pingaaruteqartut, assersuutigalugu nukkissiornerup-imaluunniit imermik pilersuinerup navianartorsiortinneqarnerisigut, imaluunniit peqqinnissaqarfimmi systemip, imaluunniit tusagassiuutit arlaannaannaannulluunniit attuumassuteqanngitsunut paasissutissat tusagassiorfiillu pilersinneqartarnerannut navianartorsiortitsinikkut taamaattoq sunniisartut tamam toqqissisimatinneqarnissaannut navianartorsiortitsinermi pineqarput.

Assersuutit tamakkiisuunngimmata maluginiarneqassaaq, tassami tamam toqqissisimatinneqarnissaannut eqqarsaatiginninneq aamma suliasaqarfinnut allanut, pissutsit piviusut malillugit, inuiaqatigiinnut tunngasumik aamma isumannaatsuunissamut tunngasumik annertuumik pingaaruteqartunut tunngassuteqarsinnaammat, maluginiarneqassaaq.

2.1.2 Nunamit allamit aningaasaliineq (§ 3, nr. 4)

Kalaallit Nunaata isumannaatsuunissaanut imaluunniit tamam toqqissisimatinneqarnissaannut navianartorsiortitsisumik Kalaallit Nunaanni “suliniummik allamik” tigusineq imaluunniit aallartitsineq inatsisissatut siunnersuummi § 3, nr. 4, litra d-mi ilaatinneqarmat, **PAN-ip** maluginiarpaa. ilisimatusarnermut stationit, ilisimasassarsiorlut aamma nunanit allanit aningaasalersorneqarlutik ilisimasassarsiornermik suliniuteqarnerit piviusumik inatsisip ataani qanoq ilillutik nalilerneqarsinnaanerit – matumani taakku aningaasaliinertut pilersaarusionermut

tunngasumik pingaaruteqartutut isigineqassanersut, aamma misissuisussaanermik pisussaaffimmi § 4-imiittumi ilaatinneqartariaqarnersut ilanngullugit, erseqqissaavigineqartariaqarpoq.

Oqaasertaliornermi suliniutinut piviusunut inaarutaasumik isummertoqannginnissaa siunertarineqartoq, Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup maluginiarpaa. atuuffiup aamma suliaasaqarfiit erseqqinnerusumik killilerneqarnerat nalunaarusiornikkut aalajangerneqarumaarpoq.

Kalaallit Nunaanni suliffeqarfinnut nunani allani aningaaseriviit aningaasaliisartullu aningaasaatinik taarsigassarsititsinissamut neqerooruteqarsinnaanerisa pisariaqanngitsumik killilerneqarnissaat **Nalik Ventures A/S-ip** kissaatiginngilaa. Nunanit allanit aningaasaliinermut piginneqataanermut procentip 49 %-i qaangissanngikkaa Nalik Ventures A/S-ip naleqquttuusoraa. Killiffik siunnersuutigineqartutoq 25 %-imiittoq inuussutissarsiutinut, nunap aningaasaqarneranut assigiinngisitaartitsisussanut arlalinnut aningaasaliinermut kigaalaqusersuisinnaavoq.

49 %-imit nunanit allanit piginneqataanermut alloriusaq 33 %-imiittoq annikinnerusumik orniginartutut Nalik Ventures A/S-ip isigaa, kisianni niuerfimmi atorneqarsinnaasutut aamma takutitsisinnaavoq.

Piginneqataassutsip annertussusaannut imaluunniit taasisinnaatitaanerit amerlassusaannut alloriusassatut nalip siunnersuutigineqartoq 25 %-imiittoq, § 4-imi aalajangersagaq immikkut ittumik suliaasaqarfinnut suliniutinullu malussarissunut tunngassuteqarneranut, taakkunani pingaarutilimmik isumannaatsuunissamut navianaat annertusisimalluni, naleqqiullugu isiginiarneqassasoq, Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup maluginiarpaa. aaqqissuussineq isumannaallisaaneq eqqarsaatigalugu qajannaatsoq anguniarlugu, Kalaallit Nunaanni suliffeqarfinni nunanit allanit aningaasaliinerit misissorneqarnissaat pisariaqartinneqartoq, aamma naak taamaallaat piginneqataassutsip annertussusai annikitsut pissarsiarineqarnerat pineqaraluartoq. Suliaasaqarfiit suliniutillu immikkut ittumik malussarissut iluanni alloriusap nalingata 25 %-miittussatut siunnersuutigineqartukkut, assersuutigalugu Danmarkimut, Tysklandimut aamma Finlandimut naleqqiullugu, taakkunani alloriusap nalinga 10 %-iulluni, Kalaallit Nunaat aaqqissuussinermik qajassuussinerusumik peqalissaaq.

Immikkoortortaqrarfiup Kalaallit Nunaanni *angerlarsimaffeqartup* qanoq ililluni killilerneqarnissaa pillugu inatsimmi oqaasertaliussani aamma minnerpaatut inatsimmut oqaaseqaatini erseqqissaasoqarnissaa, **Nuna Law-p** siunnersuutigaa.

“Nuna angerlarsimaffik”-ittut suliffeqarfiup nunami pineqartumi nalunaarsorneqarsimaneramik imaluunniit aalajangersakkanut naalakkersugaanermut tunngasunut tunngatillugu nunami pineqartumi angerlarsimaffeqarnera, § 3, nr. 5-imut oqaaseqaatit malitsigigaat, Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup maluginiarpaa. Taakkua ingerlatseqatigiiffiit pillugit inatsimmi, Kalaallit Nunaannut atuutilersinneqarsimasumi, taaguusersuutit assigivaat.

“Allakkut aalajangiisuusumik pissaaneqarneq” pillugu § 3, nr. 4, litra c-mi oqaasertaliussaq, Kalaallit Nunaanni suliffeqarfinnut aamma taakku suleqatigisaannut, annertuumik nalorninermik pilersitsinissaa aarlerinartoqartoq, **Sulisitsisut** maluginiarpaat. Oqaasertaliornep inatsisip oqaasertaani imaluunniit ilitersuineq aqqutigalugu erseqqissarneqarnissaa, kiisalu siuningaani erseqqissaasoqarnissaa periarfissamik (præ-screening-imik) erseqqissumik pilersitsisoqarnissaa, Sulisitsisut innersuussutigaa, taamaalilluni suliffeqarfiit aningaasaliineq pilersaarutaasoq ilaatinneqarneris pillugu akisummik pituttuisumik pisinnaaniassammata.

Killiliineq aamma atuuffissaata killilersorneqarnera pillugit, aamma nunanit allanit aningaasaliinernut qinnuteqaatinut ingerlatseriaatsit kiisalu nunanit allanit aningaasaliinerit nalunaarutigineqartarnissaannut malittarisassat erseqqinnerusut tulluuttumik nalunaarusiornikkut aalajangersarneqarumaartut, Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup maluginiarpaa. tamanna aamma præ-screening-imut periarfissamut atuuppoq.

2.1.3 Aningaasaliisartoq nunamit allameersoq (§ 3, nr. 5)

Isumalluutitut tunngasut- aamma isumannaallisaanermut tunngasumik isiginniffiit aallaavigalugit, Kalaallit Nunaani savalimmiormiut imaluunniit qallunaat naalagaaffiannit/oqartussaasuinit aningaasaliinerit tamarmik navianassutsimik naliliinermik suliaqarnissaq pisariaqarneris, isumaliutigineqassasoq, **IAIN-ip** innersuussutigaa.

Inunnut killeqarfimmi tassaniittunut aalajangersakkap kingunissai pillugit sulii erseqqissaaqqittoqarnissaa IAIN-ip pisariaqartutut isigaa.

Nunanit allanit aningaasaliinerit, misissuinerit aqqutigalugit aamma aningaasaliinernut taamaattunut akuliuttoqassappat akuliunnikkut, Kalaallit Nunaata isumannaatsuunissaanut imaluunniit tamat eqqissisimatinneqarnissaannut navianartorsiortitsisinnaanerisa akornuserneqarnissaat, inatsimmi siunertarineqarmat, Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup maluginiarpaa. Taamaammat inatsisip aningaasaliisartunut nunanit allaneersunut, qallunaatut innuttaassuseqanngitsunut, imaluunniit qallunaatut innuttaassuseqartunut, kisianni ukiut siuliini 5-ni taakkunani aalajangersimasumik Kalaallit Nunaanni najugaqarsimanngitsunut aamma tamakkiisumik Kalaallit Nunaannut akilerartussaasimanngitsunut aamma ukiut ilivitsut 5 siuliini Kalaallit Nunaanni tamakkiisumik akileraartussaasimanngitsunut, imaluunniit inatsisitigut pisinnaatitaasunut pisussaataitaasunullu, Kalaallit Nunaanni nunaqanngitsunut, kiisalu nunami oqartussaasunut aamma nunani allani naalagaaffiit sullissiviinut tamanut atuunnissaa, taamaammat naalakkersuisoqarfiup isumaa malillugu pingaartuuvoq. Uani aamma nunap oqartussaasuisut naalagaaffiillu sullissiviisut Danmarkimeersutut aamma Savalimmiuneersutut paasineqassapput.

2.2 Suliassa qarfiit immikkut ittumik malussarissuseqartut (§ 4)

§ 4, imm. 2-mi, soorlu illersornissamut, it-kkut isumannaatsuunissamut, aatsitassanut aamma attaveqaasersuutitut pingaarutilinnut suliassa qarfiit taaneqartut, **PAN-ip** maluginiarpaa. Sumiiffinni avinngarusimasumiittuni ilisimasassarsiornermik suliniuteqarnerit erseqqissumik eqqarsaatigineqanngillat. Nunanit allanit ilisimatusarnermik suliniuteqarnerit ilaasa suussusaannut erseqqinnerusumik naliliinermik suliaqartoqassasoq, PAN-ip innersuussutigaa – ingammik taakku nutaaliaalluinnartunik teknologimik atuisut, sivisuumik sumiiffimmiittut imaluunniit pinngortitami ataqatigiinnernut malussarissuseqartunut tikitsisinnaasut – aamma pilersarusiornermut tunngasumik pingaaruteqarsinnaasut aamma taamaammat misissuinissaq pillugu inatsisiliornermi ilaatittariaqaraluartut. Inuussutissarsiornermut tunngasumik aningaasaliinerit, ingammik suliassa qarfinni immikkut ittumik malussarissuseqartuni, § 4-imi nassuiarneqartuni, inatsisissatut siunnersuummi pingaarnertut ukkatarineqarput. Ilisimatusarnermik- aamma sunngiffimmi peqqissarniarluni suliniuteqarnerit pilersarusiornermut pingaaruteqartut misissuisarnissamut killiliussani ilaatinneqartariaqartut PAN-ip innersuussutigaa – ingammik taakku qanoq issusaat, § 3-mi aningaasaliinerup nassuiarneqarnerata iluaniippata, kisiannili imaanngitsoq taakku § 4-mi suliassa qarfiit killilerneqarneranni ilaatinneqartut.

Nalinginut tunngasunik aamma suliniutinut tunngasunik alloriusanik aalajangersaasoqassasoq, **Sulisitsisut** innersuussutigaa, taamaalilluni suliniutit pilersarusiornermut tunngasumik imaluunniit nunamut pingaaruteqartut akuersissummik piumasaqaateqarfigineqassallutik.

Atuuffissaata killilerneqarnissaanut malittarisassat erseqqinnerusut aamma nunanit allanit aningaasaliinissanut qinnuteqaatinut kiisalu nunanit allanit aningaasaliinerit nalunaarutigineqartarnissaannut ingerlatseriaatsit tulliusumik nalunaarusiornikkut aalajangersarneqassammata, naalakkersuisoqarfiup maluginiarpaa. suliassaqarfiit erseqqinnerusumik killilerneqarnerannut aamma tamanna atuutissaaq. Aningaasaliinerit inatsisissatut siunnersuummi § 4-imi suliassaqarfinni/suliniutini allattorneqartuni ilaatinneqartut pineqartillugit, nunanit allanit ilisimatusarnermik suliaqarnerit inatsisip atuuffissaani ilaatinneqarsinnaassapput.

2.2.1 Attaveqaasersuutit pingaarutillit (§ 4, imm. 2, nr. 5)

“Attaveqaasersuutit pingaaruteqartut” pillugit oqaatsit imarisai aalajangersakkamut oqaaseqaatini allaaserineqanngitsut, **IAIN-ip** maluginiarpaa, taamaammallu aalajangersakkamut oqaaseqaatit iluaqutaasumik itisilersorneqarsinnaapput.

Attaveqaasersuutit pingaarutillit pineqartillugit, “attaveqaasersuutit” pillugit oqaatsip atituumik paasineqarnissaata naatsorsuutigineqarnera, aalajangersakkamut oqaaseqaatit malitsigigaat, Inuussutissarsiornermut, Aatsitassanut, Nukissiutinit, Inatsisit Atuutsinneqarnerannut Naligiissitaanermullu Naalakkersuisoqarfiup maluginiarpaa, taamaalilluni tassani atortorissaarutit, systemit, ingerlatseriaatsit, attaviit, teknologiit, suliniutit aamma kiffartuussiissutit ilaatinneqarput. Inuiaqatigiinni atuuffiit pingaaruteqartut attanneqarnissaannut imaluunniit atulerseqqinneqarnissaannut taanna pisariaqartinneqarpat, attaveqaasersuut “pingaarutilittut” nalilerneqassaaq. Suliassaqarfinni inuiaqatigiinnut pingaaruteqartuni atuuffiit pingaaruteqartut attanneqarnissaannut imaluunniit atulerseqqinneqarnissaannut, suliffeqarfiit immikkoortortaqarfiillu pisariaqartinneqartut, attaveqaasersuutini pingaarutilinni ilaatinneqarput. Suliassaqarfiit/sammisat tulliuttut pinngitsooratik inuiaqatigiinnut pingaarutilittut isigineqassapput: nukissiuutit (gassi, innaallagiasaq, uulia, imeq), paasissutissiinermut- aamma attaveqaqatigiinnermut teknologi, assartuineq, upalungaarsimaneq aamma inuit sakkutuujunngitsut illersorneqarnerat, peqqinnissaaq, inooqatigiinni pissutsit, nioqqutissiat pingaaruteqartut, imeq imigassaaq aamma nerisassat, imeq minguttoq aamma eqqagassanik eqqaaneq, aningaasaqarneq aamma aningaasanik aqutsineq, ilinniartitaaneq aamma ilisimatusarneq, silasiorneq, illersornissamut suliffissuaqarneq kiisalu immikkut paasiniaasartut- aamma nunap iluani isumannaatsuunissamut sullissivik, nalinginnaasumik pisortatigoortumik pissaanermik atuineq kiisalu ajornartoornermi oqartussaasoqarfiit assigiinngitsut akornanni aqutseqatigiinneq.

Suliassaqarfinnut suliniutinullu immikkut ittumik malussarissulinnut allanut (nr. 1-imiit 7 ilanngullugu) akerliusumik, attaveqaasersuutit pingaarutillit taamaallaat suliffeqarfinnik ilaatitsinani, kisiannili attaveqaasersuutitut pingaarutilinnit atasumik suliniutit tamarmik ilaatinneqarput. Taamaalilluni assersuutigalugu attaveqaasersuutit pingaarutillit Kalaallit Nunaanni oqartussaasunit pigineqartut, siunnersuummi § 3, nr. 4, litra c malillugu aningaasaliisartoq nunami allamioq ingerlatsinermut pingaaruteqartuni allakut toqqaannartumik imaluunniit toqqaannanngitsumik aqutsinermut tunngassuteqartunut, aningaasaqarnermut tunngassuteqartunut, ineriartortitsinermut tunngassuteqartunut imaluunniit ingerlatsinermut tunngassuteqartunut, aalajangiisumik pissaaneqarnermik angusisimalluni, tassani ilaatinneqarput.

Aalajangersakkamut oqaaseqaatit malitsigisaasa saniatigut, “attaveqaasersuutit pingaarutillit” pillugit oqaatsit imarisaasa imaat aamma killilerneqarnerat, nalunaarusiornikkut aalajangersarneqartussaammat, naalakkersuisoqarfiup maluginiarpaa.

2.2.2 Aatsitassanut suliassaqarfik (§ 4, imm. 2, nr. 6)

Aatsitassat pillugit suliassaqarfik, § 4, imm. 2, nr. 6 malillugu immikkut ittumik malissarissuseqartutut inuussutissarsiutaasoq **Grønlandsbankip** maluginiarpaa. Kalaallit Nunaata aatsitassanut suliassaqarfik tamaat immikkut ittumik malussarissuseqartunut ilaatinniarmagu, nunat allat malittarisassiunerannut naleqqiullugu tamanna sukaterineruvoq. Tamatuma saniatigut oqaasertai eqqorluangillat. Kalaallit Nunaanni aatsitassarsiorlutik ingerlatseqatigiiffiit amerlanersaasa nunanit allanit børsimi nalunaarsorneqarsimasunit tamakkiisumik pigineqarnerat pillugit ajornartorsiutip qanoq issusia inatsisissatut siunnersuummi suliarineqannginnera Grønlandsbankip aammattaaq maluginiarpaa, aamma Kalaallit Nunaata qanoq ililluni nunami allami fondbørsimit pissarsiarineqartumik sunniuteqarluartumik nakkutilliineq malinneqartissaneraa apeqqutigalugu. Aalajangersakkap taassuma Kalaallit Nunaata aatsitassanut suliassaqarfimmik annertuumik ineriartortitsinissamut piumassuseqarneranut ersernerlunnerulerneranik pilersitsinissaa, Grønlandsbankip ernummatigaa. Tamatuma saniatigut Namminersorlutik Oqartussat aatsitassanut suliassaqarfimmi one-door pillugu periusissiaannut inatsisissatut siunnersuut akerliusutut pissuseqarpoq. Taamaammat aalajangersagaq taanna erseqqinngippallaartutut aamma annertuallaartutut pissuseqarpoq, naak siunertarineqartoq naleqquttuusinnaagaluartoq.

§ 3-mut oqaaseqaatinut assersuullugu, misissueqqaarnernut-, misissueqqissaarinernut-, imaluunniit piiaanissamut akuersissutit, assersuutigalugu Kalaallit Nunaanni ingerlatseqatigiiffinnit suliarineqartut (ApS-init imaluunniit A/S-init) aamma nunanit allanit ingerlatseqatigiiffiunngitsunit, Kalaallit Nunaanni aalajangersimasumik ingerlatsivimmik nalunaarsortissimasunit aamma

taamaammat kalaallisut CVR-normoqartutut nalunaarsorneqarsimasunit ingerlanneqarnerat, **Nuna Law-p** ilimagaa. Taassuma inatsimmi imaluunniit inatsimmut oqaaseqaatini erseqqissarneqarnissaa, kissaatigineqartinneqarpoq.

Aatsitassanut suliasaqarfimmi suliffeqarfiit, Aatsitassat pillugit ingerlatallu tamatumunnga pingaarutillit pillugit inatsisartut inatsisaat (aatsitassanut ikummatissanullu inatsit) nr. 7, 7. december 2009-imeersoq aamma Najukkani aatsitassanut tunngasunik suliaqarnerit pillugit Inatsisartut inatsisaat nr. 34, 4. juni 2024-imeersoq malillugit akuersissummik peqartut imaluunniit peqarnissamik piumasaqaateqarfigineqartut ilaatinneqarnerat, aalajangersakkamut oqaaseqaatit malitsigaat. Aalajangersakkamut oqaaseqaatit malitsigisaasa saniatigut, “aatsitassanut suliasaqarfik” pillugit oqaatsit imarisaasa imaat aamma killilernerqarnerat, nalunaarusiornikkut aalajangersarneqartussaammat, naalakkersuisoqarfiup maluginiarpaa. Taamaammat inatsisissatut siunnersuummi erseqqinnerusumik itisiliisoqarnissaa naalakkersuisoqarfiup pissutissaqartinngilaa.

2.2.3 Ingerlatseqatigiiffiit Namminersorlutik Oqartussanit pigineqartut (§ 4, imm. 2, nr. 7)

Inatsisiliornermik Namminersorlutik Oqartussat ingerlatseqatigiiffiutiminik tunisinissaanut inerteqquteqartitsisumik pisariaqartitsineq takussallugu ajornakusoortoq, **Grønlandsbankip** maluginiarpaa. Kisianni, suna siunertaanersoq pillugu aalajangersakkamut oqaaseqaatit erseqqinnerusumik allaaserineqarsinnaanerata saniatigut, aningaaserivik akerliussutissaqanngilaq. Ingerlatseqatigiiffiit Namminersorlutik Oqartussanit pigineqartut ingerlaannartumik misissuinnermi ilatinneqartussaammata, aamma aningaasaliinerit, Naalakkersuisut kissaateqarnerat aamma politikikkut akuersissuteqarneq tunngavigalugit, aningaasaliinerup misissorneqarneranik qanoq sivisutiginissaanik ilisimaneqanngitsumik misissuiffigineqartussaappata, taamaammat siunnersuut pisariaqanngitsutut ajornanngitsumik isigineqarsinnaasoq, taamatuttaaq **IAIN-ip** maluginiarpaa.

“Ingerlatseqatigiiffiit namminersorlutik oqartussanit pigineqartut” nassuiarneqarnerat erseqqissarneqassasoq, taamaalilluni joint venturesini ikinnerussuteqarlutik piginneqataasut ingerlaannartunik ilaatinneqassanngimmata, **Sulisitsisut** innersuussutigivaat.

Ingerlatseqatigiiffiit suugaluartulluunniit, tassani Namminersorlutik Oqartussat toqqaannartumik imaluunniit toqqaannanngitsumik 50 %-it sinnerlugit piginneqataassutininik imaluunniit taasisinnaatitaanernik pigisaqarluni, ingerlatseqatigiiffittut namminersorlutik oqartussanit pigineqartutut paasineqassasoq, aalajangersakkamut oqaaseqaatit malitsigigaat, Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup maluginiarpaa.

Ingerlatseqatigiiffiit namminersorlutik oqartussanit pigineqartut Kalaallit Nunaanni Namminersorlutik Oqartussanit 100 %-imik pigineqarnerat pissutigalugu, ingerlatseqatigiiffinniit taakkuninnga aningaasaliissutit suliarineqartut, aallaaviatigut Naalakkersuisunit akuerineqartussaassapput. Taamaattoq, tassani ingerlateqatigiiffiup namminersorlutik oqartussanit pigineqartup, imaangitsoq taanna Naalakkersuisunut saqqummiusseqqaarluni, aqutsinermik tunisinermik ilusilittut nunami allami immikkoortortaqaarfimmut tunniussinera pisinnaavoq. Pisuni, taakkunani assersuutigalugu avitsilluni piginnittuussuseqarnermi pigisat nalillit tuniniarneqarneranni pisortorfinnut isumaqatigiissutit aamma aningaasalersuinissamut isumaqatigiissutit isumaqatigiissutigineqarsinnaapput, imaluunniit siulersuisunut ilaasortanik toqqaasoqarsinnaalluni. Ingerlatseqatigiiffiit namminersorlutik oqartussanit pigineqartut inatsimmi ilaatinneqarnerannut tamanna tunngavigineqarpoq.

Taamatuttaaq pisut, taakkunani nunamit allamit sullissisoq, immikkoortortaqaarfimmut, pigisamut nalilimmut pissutsinulluunniit assigisaannut, aqutsinermik tunisinermik ilusilimmik pisinissamik imaluunniit pissarsinissamik piumasaqaateqarsinnaatitaasoq imaluunniit piffissap aalajangersimasup iluani allanut neqeroorutigineqannginnerani pisisinnaatitaasoq, pisinnaapput. Pisuni taamaattuni misissuisinnaanissaq naleqquttuussaaq aamma tamatuma kingorna ajortumik sunniutaasinnaasut millisinniarneqarsinnaapput imaluunniit aningaasaliineq pissarsinissarlunniit itigartitsissutigineqarsinnaapput.

Tamatuma saniatigut, tamanna pisariaqartinneqarpat, oqaatsip imarisaata imaa aamma killiliinera, nalunaarusiornikkut itisilersorneqassasoq, naalakkersuisoqarfiup maluginiarpaa.

2.2.4 Imermit nukissiorfiit (§ 4, imm. 2, nr. 8)

Imermit nukissiorfiit attaveqaasersuutit pingaaruteqartut pillugit nr. 5-imi ilaatinneqartut, **Grønlandsbanki** isumaqarpoq. Annikinnerusumik killiliisoqarsinnaanera imaluunniit imermit nukissiorfiit siamasissumi inissinnikkut isumaliutersuutigineqarsinnaasut, tamatuma saniatigut Grønlandsbankip maluginiarpaa. Taakku akuersissummik qinnuteqarnissaat atsikkutigiittutut isigineqanngilaq. Imermik nukissiuutit sorliit ilaatinneqarnerisut pillugit, siunnersuut uani pingaangitsunut killiliussaq ilanngunneqarsinnaavoq.

Siusinnerusukkut ikummatissat uumasunit pilerfeqartut atornissaannut taarsiullugu, aatsitassarsiortitseqatigiiffiulersinnaasut imminnut pilersorniarlutik imermit nukissiorfinnik pilersitsisinnaanerat pillugu politikikkut kissaateqarneq oqaatigineqarsimasoq, Grønlandsbankip naggataagut maluginiarpaa. atortut taamaattut pilersinneqarnissaannut ingerlateqqillugillu

tunineqarnissaannut akuersissuteqarnissamik piumasaqaatip imermik nukissiorfiit amerlanerusut (privatinit pigineqartut) pilersinneqarnissaannut kajumiginninneq annikillissisagaa, aningaaserivik isumaqarpoq. Taamaammat aamma aalajangersagaq taanna iluaqutaasumik erseqqissarneqarsinnaavoq.

Tusarniaanermut akissuteqaatit tiguneqarsimasut tunngavigalugit, Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfik nalilersuivoq, tamatumalu kingorna, imermik nukissiorfiit immikkoortut suliaasaqarfinni immikkut ittumik malussarissuseqartunit, inatsisissatut siunnersuummi § 4, imm. 2, nr. 8 peerneqassasoq. nalilerlugu. Imermit nukissiorfiit tassunga taarsiullugu “attaveqaasersuutini pingaaruteqartuni” ilaatinneqassasut, naalakkersuisut maluginiarpaat. Tamanna erseqqinnersumik nalunaarusiami, inatsisissatut siunnersuummi § 4, imm. 3 malillugu suliaasaqarfiit suliniutillu immikkut ittumik malussarissusillit pillugit erseqqissaasussami killiliisussamilu, erseqqinnerusumik takuneqarsinnaassapput.

2.2.5 Piginnaatitsineq pillugu aalajangersagaq (§ 4, imm. 3)

“Teknologi pingaaruteqartoq” imaluunniit “imermit nukissiorfiit” pillugit assersuutigalugu qanoq paasineqarnissaat pillugit erseqqissaasoqarsinnaasoq, oqaasertaliorneq **PAN-ip** paasivaa, kisianni nalunaarutit imaluunniit allaffissornikkut sulisaatsit aqqutigalugit suliaasaqarfiit suliniutilluunniit nutaat misissuisarnissaq pillugu aaqqissuussinermit ilanngunneqarnissaannut Naalakkersuisut piginnaatitaanngillat. Ilassusiineq inatsisip allanngortinneqarnissaanik piumasaqaateqarfiummat, taamaammat pingaaruteqarpoq maluginiassallugu. Suliniutit taakku ilaat isumannaatsuunissamut imaluunniit nunanut allanut politikkimut attuumassuteqaratarsinnaasut avataannut pippata, misissuinissamut killiliussat taamaallaat suliaasaqarfinnut allattorneqartunut killilerneqarnerat taamaalilluni aaqqissuussinermit siunertarineqartoq qajannarsisissinnaavaa. Inatsimmi killiliussat aamma killiliinerit erseqqissarneqarnissat taamaammat pingaaruteqarpoq, taamaalilluni Naalakkersuisut malittarisassiinernut sorlernut piginnaatitaanersut, aamma qaqugukkut politikkikkut aamma misissuinissamik aaqqissuussinerup annertusineqarnissaanut inatsisiliornermut tunngasumik ingerlatsineq pisariaqartinneqarnerisooq, oqartussaasunut sullissisunullu erseqqississaaq.

Nammineq kajumissuseq malillugu periarfissaliissumminngaanniit aalajangersagaq pisussaaffittut aalajangersaganngortillugu allanngortinneqarnissaa **IAIN-ip** innersuussutigaa. Taamaalilluni suliaasaqarfiit suliniutillu, § 4, imm. 2-mi ilaatinneqartut pillugit nassuiaanerit killiliinerillu pillugit Naalakkersuisut malittarisassanik aalajangersaassapput, aamma aalajangersakkamut oqaaseqaatinut oqaasertaliussaq naleqqatigiilissaaq. Oqaasertaliorneq immaq ima allanngortinneqarsinnaavoq “Naalakkersuisut malittarisassanik aalajangersaassapput...”.

Suliassaqarfiit suliniutillu imm. 2-mi ilaatinneqartut killilersorneqarnissaat pillugit Naalakkersuisut malittarisassanik erseqqinnerusunik aalajangersaasinnaasut, imm. 3-mi siunnersuutigineqarmat, Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup maluginiarpaa. Suliassaqarfiit suliniutillu immikkut ittumik malussarissuseqartut pillugit erseqqissaanissamut aamma killiliinissamut malittarisassanik aalajangersaanissamut imm. 3-mi piginnaatitsinerup atorineqarnissaa naatsorsuutigineqarpoq. Taamaalilluni suliassaqarfiit suliniutillu, imm. 2-mi allattorneqartut ilaneqarnissaannut malittarisassanik aalajangersaanissamut, piginnaatitsissut atorineqarsinnaasussaangilaq. Suliassaqarfiit allattorneqartut suliassaqarfiusut suliniutaasullu immikkut ittumik malussarissusillit, aningaasaliisartumit nunamit allameersumit nunamit allamit aningaasaliinerup eqqarsaatigineqartup naammassineqarnissaanut akuersissummik qinnuteqarnissaq pillugu pisussaaffimmut ilaasariaqartut, naalakkersuisoqarfiup nalilerpaa.

Atuuffissaata killilerneqarnissaanut malittarisassat erseqqinnerusut aamma nunanit allanit aningaasaliinissanut qinnuteqaatinut kiisalu nunanit allanit aningaasaliinerit nalunaarutigineqartarnissaannut ingerlatseriaatsit tulliusumik nalunaarusiornikkut aalajangersarneqassammata, naalakkersuisoqarfiup maluginiarpaa.

Tamatuma saniatigut aalajangersakkap oqaasertaata “-sinnaavoq”-mit “ssaaq”-mut allanngortinneqarnissaanik aalajangersaganngortinneqarnissaa pillugu oqaaseqaat, Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup allappaa. Inatsisip erniinnaartumik atuutilersinneqarnissaa, naalakkersuisoqarfiup kissaatigimmagu, naalakkersuisoqarfiup tamanna pillugu maluginiarpaa. Taanna sulisaatsimi pingaaruteqarnavianngitsoq, aammattaaq naalakkersuisoqarfiup nalilerpaa. Tamanna tunngavigalugu massakkut oqaasertaliunneqartut naalakkersuisoqarfiup aalajangiusimavai.

2.3 Nunanit allanit aningaasaliinerit § 4-imi ilaatinneqanngitsut

Aningaasaliinernut, siunnersuummi § 4-imi ilaatinneqanngitsunut – imaappoq ‘suliassaqarfinni suliniutinilu immikkut ittumik malussarissuseqartuni’ nunanit allanit aningaasaliinerit, aningaasaliinerit naammassineqarsimasut misissuiffigineqarnissaannut aallartitsinissamut piffissaliussaq allanut naleqqiullugu sivisoorujussuuartut isumaqarfiginarteq, **IAIN-ip** maluginiarpaa. Nunanit allanit aningaasaliinerit “Kalaallit Nunaata isumannaatsuunissaanut imaluunniit tamat toqqissisimatinneqarnissaannut navianartorsiortitsineranik” tunngavissalimmik pasilliuteqarani misissorneqarnissaasa aallartinneqarnissaannut periarfissaliissutip

suliarineqarniarnera, IAIN-ip nangaanartoqartippaa. Allaatigisap immikkoortuata peerneqarnissaa isumaliutigineqartariaqarpoq, taassuma tamanna pillugu pasitsaassisoqarneranik allaqqinneqartariaqarluni, imaluunniit misissuinerup aallartinneqarnissaa sioqqullugu, aalajangiinermut tunngaviit sorliit naammassineqassanersut pillugit itisilersuisoqartariaqarluni. Aalajangersakkap siunnersuummi ilusilersorneqarneratut, Naalakkersuisut misissuinerup aallartinneqarnissaanut periarfissaliissutaat nalinginnaq pisussatut aamma annertuutut saqqummiunneqarpoq.

§ 6-ip Naalakkersuisunit isumaliutigeqqinneqarnissaa, **Inu:IT-p** sakkortuumik kajumissaatigaa, taamaalilluni aningaasaliinernut naammassineqareersunut akuliunneq pissutsit inatsimmik unioqqutitsisut uppersarneqarneranni imaluunniit piviusut, massakkullu pingaarnertut isumannaallisaanermut navianartorsiortitsinerit uppersarneqarsinnaasut, allatut iliornikkut annikillisinneqarsinnaasut, pitillugit taamaallaat pisinnaalissalluni. Tamatuma peqatigisaanik suliffeqarfiup aalajangiinermut tunngavimmik takunnissinnaatitaanermik periarfissinneqarnissaa pingaaruteqarpoq. Minnerpaatut sulisaatsimi suliffeqarfiup aningaasaliinermi timitalerneqarnerata kingorna ukiut arlallit qaangiunneranni aningaasaliineq atorunnaarsissaneraa, matumani aningaasaliineq utertillugu akilerneqassanersaq ilanngullugu, nassuiaateqaqqullugit Naalakkersuisut kajumissarneqarput.

Nammineq kajumissuseq malillugu nalunaaruteqartarnerup aamma ukiuni tallimani nammineq aallartitsinikkut sulianik Naalakkersuisut ammaanissaminnut periarfissaasa ataqatigiissinneqarnissaannik siunnersuut, Sulisitsisut isumaat malillugu annertoorujussuusoq, **Sulisitsisut** maluginiarpaat. Piffissaq sivisunerpaamik ukiunut pingasunut imaluunniit, aningaasaliinernut, naammassineqareersunut aamma nalunaarsorneqarsimasunut ukiut pingasut qaangiunneranni pisoqalisoortitsisarnissaq eqqunneqassasoq, taamaammat Sulisitsisut innersuussutigaat.

Periarfissaliisut pineqartoq nalinginnaannaq pisuunngitsoq imaluunniit annertoorujussuunngitsoq, Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfik isumaqarpoq. Ingerlatseqatigiiffiit pillugit inatsimmi § 23 h, Kalaallit Nunaannut atuutilersinneqartoq malillugu, taassuma ingerlatseqatigiiffiit pillugit inatsiseqartitsinermi malittarisassat malillugit inatsisit malillugit suliarineqarsimanersaq misissorneqarnissaa siunertaralugu, pissarsiarineqartup nalunaarsorneqarnerata suliarineqarnerata kingorna, ukiut tallimanik uternissaq periarfissaavoq, aalajangersakkallu taanna assigaa.

Ilisimasassarsiornermik suliaasaqarfinni – matumani ilisimatusarnermut- aamma ilisimasassarsiornermut tunngaveqartuni – inatsimmi § 4-imi piviusumik ilaatinneqartussani suliniutit suussusaat suut, aamma ilisimasassarsiornerit massakkut ingerlanneqartut imaluunniit naammassineqareersut ukiut kingulliit tallimat iluanni inatsisip atuutilernissaata tungaanut aamma misissuinissamik periarfissamut ilaatinneqarnersut, erseqqissaavigissallugit naleqquttuusinnaasoq, PAN-ip maluginiarpaa.

Ilaatigut atuuffissaata killilerneqarnera, suliaasaqarfiit suliniutillu pillugit malittarisassat, tulliusumik nalunaarusiornikkut aalajangersarneqassammata, Inuussutissarsiornermut, Aatsitassanut, Nukissiutitut, Inatsisip Atuutsinneqarnerannut Naligiissitaanermullu Naalakkersuisoqarfiup maluginiarpaa. Aningaasaliinerit suliaasaqarfinni/suliniutini inatsisissatut siunnersuummi § 4-imi allatorneqarsimasuni ilaasut pineqartillugit, nunanit allanit ilisimasassarsiornermik suliniutit matussuserneqarnissaat isumaqarfigineqarpoq.

Inatsit nunanit allanit aningaasaliinernut, inatsisip atuutilinnginnerani naammassineqartunut atuutinngimmat, § 21, imm. 2-p malitsigimmagu, naalakkersuisup aammattaaq maluginiarpaa. Aningaasaliinerup suussusaata, nunanit allanit aningaasaliinissamut isumaqatigiissutip qaqugukkut naammassisimaneratut isigineqarnissaa apeqqutaasoq, aalajangersakkamut oqaaseqaatit malitsigaat.

Kalaallit Nunaanni suliffeqarfinni piginneqatigiissutit annertussusaannik pissarsineq pineqarpat, Erhvervsstyrelsimi piginnittuunerup nalunaarsorneqarneranut piffissaq aallaaviatigut pingaaruteqassaaq. Naalakkersuisinnaaneq imaluunniit pissaaneqarneq isumaqatigiissummit tunngaveqartoq pineqarpat, isumaqatigiissutip pineqartup isumaqatigiissutigineqarneranut piffissaq imaluunniit suliniutip aallartinneqarnera pingaaruteqassaaq.

Inatsisartut inatsisaata atuutilernerata kingorna nunamit allamit aningaasaliineq piousoq siunnersuummi § 3, nr. 4, litra b-mi allorisusat aalajangersarneqartut qaangerlugit annertusineqarpat, annertusisitsineq nunamit allamit aningaasaliinertut Inatsisartut inatsisaat atuutissaaq. Taamaattoq Inatsisartut inatsisaata atuutilinnginnerani aningaasaliinernut taakkununga naammassineqareersunut akuliuttoqarsinnaanaviannngilaq.

2.4 Nunanit allanit aningaasaliinerit eqqarsaatigineqartut imaluunniit naammassineqarsimasut pillugit aalajangiinerit

2.4.1 § 8-tut siunnersuutigineqartoq pillugu

Aningaasaliinissamut itigartitsinerup imaluunniit inerteqquteqarnerup § 8 imm. 1-imi oqaaseqatigiit aappaaniittup, nutaatut imm. 2-tut nuunneqarnissaa isumaliutigineqarsinnaannginnersoq, **IAIN-ip** maluginiarpaa. § 8 malillugu naliliinernut tunngatillugu, aalajangiinernut tunngaviit tamakkiisuunngitsut, tassunga oqaaseqaatini takuneqarsinnaavoq. Naliliinermut aalajangiinermut tunngaviit allattorneqartut inatsisip oqaasertaani, oqaaseqaatiniunngitsoq, toqqaannartumik takuneqarsinnaassannginnerut, siullertut isumaliutigineqarsinnaavoq. Aningaasaliisartut inatsisitigut isumannaatsuunissaat eqqarsaatigalugit, aalajangiinermi tunngavigineqartussatut allattukkat tamakkiisunngorlugit takuneqarsinnaassannginnerut, aammattaaq isumaliutigineqarsinnaavoq. Aalajangiinernut tunngaviit ilitersuutaasut taamaallaat pineqarmata, pissutsit attuumassuteqartut allat aamma pingaartinneqartussaasariaqartut, aamma aalajangiinernut tunngaviit inatsimmi immi allanneqarnissaa innersuussutigigitsik, soorlu aamma qallunaat aningaasaliinernut misissuinissaq pillugu inatsisaannit taamaattoq, **Nuna Law-p** assigisaanik maluginiarpaa.

Utaqqiisaagallartumik inerteqquteqarnissaq pillugu Naalakkersuisut aalajangiippata, piaarnerpaamik inaarutaasumik Naalakkersuisut aalajangiinermik aalajangiissasut, § 8, imm. 2-mut oqaaseqaatit malitsigigaat, **IAIN-ip** maluginiarpaa. Piffissaliussat pillugit ataani oqaaseqaatit innersuussutigineqarput. Naliliinermut aalajangiinernut tunngaviit inatsimmut nalunaarummi takuneqarsinnaanissaa qinigassatut allatut isumaliutigineqarsinnaavoq. Tassani Naalakkersuisut piaartumik, qaqugukkulluunniillu allannngortitsinernik suliaqarsinnaanerannut pisariaqartitsisoqassappat pisariaqartitsinermut atatillugu tamanna ingammik isiginiarneqassaaq.

Aalajangiinernut tunngaviit allattorneqartut, siullertut tamakkiisumik allattorneqarsinnaannginnerat, tassami aalajangiinernut tunngavit attuumassuteqartut eqqarsaatigineqarsinnaasut tamaasa eqqarsaatigineqarsinnaassanngimmata, aamma suliami pissutsit allat apeqqutaasussaammata, Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup maluginiarpaa. Aappaattut aalajangiinermut tunngaviit piumasaqaatitut § 8, imm. 1-imi oqaaseqaatini allattorneqarput. Taamaammat massakkut iluseritinneqartup attatiinnarneqarnissaa naalakkersuisoqarfiup toqqarpaa. Aalajangersagassatut siunnersuutigineqartoq malillugu utaqqiisaagallartumik atorunnaarsitsineq pillugu aalajangersagassatut siunnersuutigineqartoq malillugu aalajangiissappata, tamatuma kingorna nunamit allamit aningaasaliinerup inatsisinut naapertuuttuunera pillugu piaarnerpaamik Naalakkersuisut inaarutaasumik aalajangiissasut, § 8, imm. 2-mut oqaaseqaatini takuneqarsinnaasoq, tamatuma saniatigut naalakkersuisoqarfiup maluginiarpaa. Piffissaliussat najoqqutassatut aalajangersarneqarsinnaasut, aamma tamanna toqqaannartumik inatsimmi malittarisassiussallugu pisariaqanngitsoq, naalakkersuisoqarfiup maluginiarpaa.

2.4.2 § 9-tut siunnersuutigineqartoq pillugu

Ingerlatsinissamut- aamma pisiortorfinnut isumaqatigiissuteqartoqartillugu, suliffeqarfiup allanik suleqataanut/atortussanik pisiortorfiinut tunngassuteqartut pillugit piumasaqaatinik aalajangersaasoqarsinnaassasoq, § 9 imm. 1-imut aamma 2-mut oqaaseqaatsit malitsigigaat, **IAIN-ip** maluginiarpaa.

Suliffeqarfiup allanik suleqataanut/atortussanik pisiortorfiinut piumasaqaatit erseqqissaavigineqarnissaat IAIN-ip kissaatiginartippaa.

Ingerlatsinissamut- aamma pisiortorfinnut isumaqatigiissutinut atatillugu taamatuttaaq, taamaattoqassappat suliffeqarfiup allanik suleqataanut/atortussanik pisiortorfiinut, piumasaqaatinik aalajangersaasoqarsinnaasoq, Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup maluginiarpaa. Suliffeqarfiup allanik suleqataanut/atortussanik pisiortorfiinut atatillugu piumasaqaatit suliffeqarfiup allanik suleqataanut/atortussanik pisiortorfiinut atuutissanngillat, kisianni pisiortorfimmut atuutissallutik, taassumalu tamanna suliffeqarfiup allanik suleqataanut/atortussanik pisiortorfiinut atatillugu qulakkiissavaa.

2.4.3 § 10-tut siunnersuutigineqartoq pillugu

Aningaasaliisut isumannaatsuunissaat eqqarsaatigalugu, pisuni, tamatuma kingorna Naalakkersuisut aalajangiinermik tamakkiisutut ilusilimmik allanngortitsisinnaallutik imaluunniit utertitsisinnaallutik, allattuiffiup aalajangersarnissaa isumaliutigineqartariaqartoq, **IAIN-ip** maluginiarpaa. Tamatuma saniatigut § 10, imm. 1, nr. 4-mi oqaasertaliussat isumaliutigeqqinneqarsinnaapput.

Nr. 1-imiit 5 ilanngullugu allattuineq tamakkiisuunngitsoq, aalajangersakkamut oqaaseqaatit malitsigigaat, Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup maluginiarpaa. Taamaalluni aalajangersakkap tamakkiisuunnginnissaa aalajangersakkami siunertarineqarpoq. Ilusissatut siunnersuutigineqartoq naalakkersuisoqarfiup aalajangiusimavaa.

2.4.4 § 11-tut siunnersuutigineqartoq pillugu

Oqaaseqaatit oqaatsit pillugit misissorneqarnissaat **IAIN-ip** kaammattuutigaa.

Oqaaseqaat Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup allappaa, tamannalu naalakkersuisoqarfiup inatsisissatut sinnersuummik misissuinerani ilaatinneqassaaq.

2.5 Nakkutilliineq tamanullu saqqummiussineq

Nakkutilliineq tamanullu saqqummiussineq pisariaqartinneqartumik ilimasaarutigineqareersumillu tamatigut pisartooq, tamannalu iluaqutaasumik erseqqissarneqarsinnaasoq, **Aningaasaqarnermut Akileraartarnermullu Naalakkersuisoqarfiup** maluginiarpaa.

§ 13, imm. 2-mi aalajangersagaq, aamma eqqartuussivimmit aalajangiinermik peqarani ininut assartuutinullu tikitsisinnaanermik pisariaqartitsineq **IAIN-ip** paasiuminaatsippaa. Sooq taamatut nakkutilliiartorluni pulaarnissaq sioqqullugu eqqartuussivimmit aalajangiinerup pissarsiarineqarnissaannginnera pillugu pissutaasut minnerpaamik allaaserineqarnissaat innersuussutigineqarpoq. Naalakkersuisut, aamma oqartussaasut allat nassuiarneqanngitsut, § 13, imm. 2-mut oqaaseqaatit malillugit, siunnersuummi § 6 malillugu misissuineranut atatillugu, ininut inuussutissarsiornermut atorineqartunut assartuutinullu isersinnaanerut, taamatuttaaq IAIN-ip paasiuminaatsippaa. Sulisaaseq tamanna Kalaallit Nunaata avannaarsuani kangianilu nunami allanngutsaaliugassatut immikkoortitami aamma sumiiffinni avinngarusimasuni, taakkunani suliniutit amerlanertigut ilisimatusarnermik-/ilisimasassarsiornermillu tunngaveqartarlutik, qanoq ililluni tikitsisinnaaneq taanna atorineqarsinnaanersoq pillugu erseqqissaasoqartariaqartoq, **PAN** isumaqarpoq.

Kalaallit Nunaanni suliffeqarfimmut, nunamit allamit aningaasaliinermut sammitinneqartumut, nakkutilliinermi atorineqarnissaa eqqarsaatigineqartoq, aalajangersakkamut oqaaseqaatini takuneqarsinnaasoq, Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup maluginiarpaa. Pisuni, Kalaallit Nunaata isumannaatsuunissaanut aamma tamat toqqissisimatinneqarnissaanut ilungersunartumik navianartorsiortitsisoqartillugu aamma paasissutissat pisariaqartinneqartut allatut pissarsiarineqarsinnaatinnagit, aalajangersagaq taamaallaat atorineqarumaartoq, oqaaseqaatini aammattaaq takuneqarsinnaavoq. Pisuni taamaattuni isumannaallisaanermut navianartorsiortitsisinnaasut akiorniarlugit, sumiiffimmi nakkutilliinerup eqqartuussivimmit aalajangiinermik peqqarani naammassineqarsinnaanera annertuumik pingaaruteqartoq nalilerneqarpoq, tassami taamaattoq pulaarneq aallaaviatigut siuningaani ilimasaarutigineqareersimasussaammat.

Tamanut saqqummiussinissamut, nakkutilliinerup aallartinnissaanut/aallartinneqarneranut inatsimmi § 14-imi periarfissaliissutip taaneqarnissaanik pisariaqartitsineq **IAIN-ip** aammattaaq paasiuminaatsippaa.

“Aningaasaliisartup nunamit allameersup paasissutissanik piumasaqaatigineqartunik tunniunniussinissaanut imaluunniit isumaqatigiissutigineqartut imaluunniit piumasaqaatit aalajangersarneqartut pillugit Naalakkersuisut naalakkiutaasa malinneqarnissannut, tamanut saqqummiussinermi aarlerinaat aammattaaq ilapittuutaasinnaavoq” § 14-imut oqaaseqaatini takuneqarsinnaasoq, IAIN-ip aammattaaq maluginiarpaa. Patsisaasoq IAIN-ip paasivaa, kisianni allaatigisap immikkoortuata inatsimmut nassuiaatitut atuunna paasiuminaatsillugu, taamaammat allaatigisap immikkoortuata peerneqarnissaa isumaliutigineqarsinnaavoq.

Atsikkutigiissaarinnermut tunngaviup erseqqilluinnartup inatsimmi ilanngunneqarnissaa, taamaalilluni uppersaatinut, nakkutilliinnermut aamma nalunaaruteqartarnissamut piumasaqaatit, aningaasaliinerup annertussusaannut aarlerinassusaanullu naleqqiullugu naleqquttuussallutik, aamma nakkutilliinnermik suliat taamaallaat inaarutaasumik aalajangiinerup kingorna tamanut saqqummiunneqartarnissaat pisassasoq, **Sulisitsisut** innersuussutigaat.

Aalajangiinissap aalajangiiffigineqannginnerani, nakkutilliineq aallartinneqarsimasooq pillugu Naalakkersuisut tamanut ilisimatitsisinnaanerannut erseqqissumik periarfissaliisoqarnissaa, Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup isumaa malillugu pingaaruteqarpoq.

Aalajangersagassatut siunnersuutigineqartoq malillugu Naalakkersuisut nalunaarutaat aningaasaliisartup nunamit allamiup aqqanik aamma taamaattoqaruni CVR-normuanik kiisalu taamaattoqarpat inatsimmik unioqqutitsinerup suussusaa pillugit paasissutissanik imaqarsinnaavoq. Systematiskiusumik tamanut saqqummiisarneq pineqanngilaq, kisianni aaqqissuussineq, tassani nammineq imaluunniit tamat soqutigisaat tassunga, paasissutissanut tunngassuteqartumut eqqarsaatiginninnerit suliniani ataasiakkaani tamani eqqarsaatigilluarneqartassallutik. Aaqqissuussinissatut siunnersuutigineqartoq inatsisip eqqortinneqarneranik aamma pitsaaliuinnermik sunniuteqarsinnaavoq. Taamatut isigalugu, allaatigisap immikkoortua IAIN-ip erseqqissaatigisaa paasineqassaaq.

Tamanna naleqquttutut isigineqartillugu, aalajangersagassatut siunnersuutigineqartoq malillugu tamanut saqqummiussineq pisinnaasoq, § 14-imut oqaaseqaatit malitsigigaat, naalakkersuisoqarfiup aammattaaq maluginiarpaa. Tamanut saqqummiussineq pinerluttoqarsimaneranik paasiniaanermut imaluunniit misissuinnermut ingerlasumut navianartorsiortitsisutut nalilerneqarpat, imaluunniit aningaasaliisartumut nunamit allameersumut imaluunniit Kalaallit Nunaanni immikkoortortaqaqfimmut, naleqqutinnngitsumik tamanut

saqqummiussineq annertuumik ajoqusiissappat, tamanut saqqummiussineq pisinnaanngitsoq, ilaatigut tamatuma kinguneraa. Naalakkersuisoqarfiup naliliinera malillugu atsikkutigiissarinissamik naliliineq tamatuma kingunerissavaa. Atsikkutigiissaarinissamik tunngavik inatsisitigut isumaavoq tunngaviusoq, inatsisissatut siunnersuummi tamanna erseqqissumik taaneqarsimanera apeqqutaatinnagu atuuttusaaq.

2.6 Attaveqaaqatigiinneq aamma oqaatsit pillugit piumasaqaatit il.il.

Kalaallisut aamma tuluttut oqaatsit saniatigut qallunaatut oqaatsit aamma sulianik suliarinninnermi atorneqarsinnaanissaat **Aningaasaqarnermut Akileraartarnermullu Naalakkersuisoqarfiup** siunnersuutigaa. Taakku allaffissornikkut ingerlanneqarnera oqilisaaffigisinnaavaa aamma nutserinnermut aningaasartuutit ikilisissinnaallugit.

Qinnuteqaatit, oqaatsit atorneqanngitsut atorlugit imaqarniliorluni, kalaallisut imaluunniit tuluttut nassiunneqarsinnaasut, aamma oqaatsit taakku marluk atorlugit ilitersuut aamma immersugassaq tamanut atugassiaq Naalakkersuisut atugassanngortissagaat, **Sulisitsisut** innersuussutigaat.

Oqaatsit pillugit piumasaqaatissatut siunnersuutigineqartut naleqqutinngitsut aamma naapertuutinngitsut, aamma suliassat suliarineqartarnerat pillugit inatsimmi § 7 a-mut pitsaasumillu ingerlatsinnermi ileqqoqarnissamut akerliusut, taamatuttaaq **Transparency International Greenland** isumaqarpoq.

Tusarniaanermut akissutit tiguneqarsimasut Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup allappai aamma siunnersuut naleqqussarsimallugu, taamaalilluni qinnuteqaatit qallunaatut tunniunneqarsinnaanerat periarfissalersillugu.

Sulisaatsimi atortuulersitsinnermi tikinneqarsinnaaneq, paasinnissinnaaneq aamma allaffissornikkut systemi piuminartoq eqqarsaatigalugit, atortussat attuumassuteqartut suliarineqarumaarnerat, Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup naatsorsuutigaa. Atortussat taakku imarisassaat – matumani oqaatsit atorneqartut ilanngullugit – allaffissornikkut aalajangiiffigineqarumaarput. Taamaattoq minnerpaamik kalaallisut tuluttullu oqaatsit atorneqarumaarput.

2.7 Allagaatinik takunnissinnaatitaaneq

Inatsisissatut siunnersuutip sooq allagaatinik takunnissinnaatitaanermi mininneqarnissaa, matumani inuup imminut tunngasumik paasissutissat pillugit takunnissinnaatitaanera ilanngullugu, tunngavilersorneqanngitsoq, **IAIN-ip** maluginiarpaa. Tamat imaluunniit innuttaasut paasissutissanik takunnissinnaatitaanerat annikillisinneqaraangat, innuttaasunut/aningaasaliisunut eqqarsaatiginninnermit eqqarsaatiginninnerit suut oqimaannerunersut, nassuiaatigineqartariaqaraluarpoq. Isertuaatsuunissap, inatsisitigut isumannaatsuunissap aamma tatiginninnissap qulakkeerneqarnissanut erseqqissumik tunngavilersuineq pisariaqartinneqarpoq. Innuttaasut imminnut pillutik paasissutissanik takunnissinnaatitaanerisa killilerneqarneranni tamanna immikkut ittumik atuuppoq.

Aalajangersakkamut tassunga eqqarsaatigisassat suut tunngaviunersut, imaluunniit aalajangersakkap atulersinneqarnissaannut sunniutissaq suna kissaatigineqarneris, inatsisissatut siunnersuummut oqaaseqaatini takuneqarsinnaanngitsoq, **PAN-ip** taamatuttaaq maluginiarpaa. Paragraffissatut siunnersuutigineqartumut suut patsisaanersut nassuiarneqarnissaat PAN-ip kaammattuutigaa, tassami tunngaviulluinnartumik tunngaviit ilaannut pissutissaqanngitsumik, tunngavilersugaanngitsumik aamma annertuumik annikillinertut sunniunniuteqarpoq. Suliap misikkarissutut pissuseqarneranut eqqarsaatigisassat pissutigalugit suliani taamaattuni aggettussani isiginniffiit ilaannik takunnissinnaatitaanerp annikillilerneqarnissaa pisariaqartinneqassappat, allagaatinik takunnissinnaatitaanermi ilaatinneqannginnerit pillugit, pisortat ingerlatsinerat pillugu paasitinneqarsinnaatitaaneq pillugu inatsimmi aalajangersakkat atorneqarsinnaapput.

Suliffeqarfiit aningaasaliisullu, aalajangiinermi kallarnerqartut, piviusumik suliap tunngaviinik takunninnissaminut, nammineq isummanik saqqummiunnissaannut imaluunniit aalajangiinerup qularutiginissaanut periarfissaqanngitsut, tamannalu malunnaatilimmik ingerlatsinermut inatsiseqartitsinermi tunngaviusunut nalinginnaasunut unioqqutitsinerusoq aamma Kalaallit Nunaanni suliffeqarfinnut aningaasaliisartunullu nunanit allaneersunut inatsisitigut isumannaatsuunerup qajannarsisinneqarneranik kinguneqartoq, **Inu:IT-p** maluginiarpaa

Sulianut misissuinerinnullu inatsisartut inatsisaanni matumani ilaatinneqartunut, allagaatinik takunnissinnaatitaanermut Pisortat ingerlatsinerat pillugu paasitinneqarsinnaatitaaneq pillugu inatsit atuutinngitsoq, allagaatinik takunnissinnaatitaanermi ilaatinneqannginnissamut siunnersuutip kingunerigaa, Inuussutissarsiornermut, Aatsitassanut, Nukissiutinut, Inatsisit Atuutinneqarnerannut Naligiissitaanermullu Naalakkersuisoqarfiup maluginiarpaa. Pisortat ingerlatsineranni suliassat suliarineqartarnerat pillugu inatsimmi ilaatinneqannginnissamut aalajangersakkat atuutissanngippata, tamanna pillugu malittarisassat malillugit suli akuusut allagaatinik takunnissinnaatitaanermik periarfissaqassapput. Inatsisissatut siunnersuummi tamanna pillugu nassuiaaneq malillugu, Kalaallit Nunaata isumannaatsuunissaanut imaluunniit

tamat toqqissisimatinneqarnissaannut paasissutissat tunngassuteqartut pisariaqartinneqartumik isertuunneqarnissaasa qulakkeerneqarnissaat, aalajangersagassatut siunnersuutigineqartup siunertarivaa.

2.8 Iliusereriikkanut kinguneqartitsinerit

Iliusereriikkanut kinguneqartitsinerit ilaat – matumani taasisinnaatitaanerup atorunnaarsinneqarnera ilanngullugu – naalagaaffimmi inatsit immikkut ittoq malillugu naammassineqassasoq, inatsisissatut siunnersuummi piumasarineqarmat, inatsisit atortinneqarfiannut tunngasunik erseqqinngitsoqalernera pilersinnaasoq, **Sulisitsisut** maluginiarpaat. Inatsisip atuutilinnginnerani sunniivigeqatigiinneq tamanna erseqqissaavigineqassasoq, taamaalilluni suliffeqarfiit eqqortitsinnginnerminni inatsisitigut sunniutit eqqorluartut ilisimaniassammatigit, Sulisitsisut innersuussutigaa.

Ingerlatsinerimut naammattumik inatsisilerinerimut tunngasunik killeqarnani isertuaatsumik ingerlatsinnginnissamut aamma annertuumik kinguneqarnissaannut aarlerinaateqassasoq, **Transparency International Greenland-p** maluginiarpaa.

§ 8 malillugu itigartitsissut imaluunniit inerteqquteqarneq imaluunniit § 11 malillugu atorunnaarsitsinissamik naalakkiuteqarneq malinneqanngippat, akuersissut Kalaallit Nunaanni oqartussanit atulersinneqartoq suugaluartorluunniit atorunnaarsissallugu Naalakkersuisuit aalajangersagaq malillugu piginnaatinneqartut, **IAIN-ip** maluginiarpa. “Akuusut attuumassuteqartut allat” kikkunersut assersuusiorneqarnissaat assigisaanillunniit taasisoqarnissaa, IAIN-ip naleqquttut isigaa.

Oqaaseqaat Inuussutissarsiornermut, Aatsitassanut, Nukissiutitut, Inatsisit Atuutsinneqarnerannut Naligiissitaanermullu Naalakkersuisoqarfiup allappaa, kisianni inatsisissatut siunnersuummi sulii assersuusiortoqarnissaa pisariaqanngitsutut isigalugu, tassami aalajangersakkap oqaasertaliorneqarnerani aamma pisunut ilimaginngisanut atorneqarnissaa siunertarineqarpiarmat.

2.9 Naammagittaalliuteqarsinnaaneq

Siunnersuutip naammagittaalliorsinnaanermik imaqqannginnera **Inu:IT** maluginiarpaa, tamanna inatsisigut isumannaatsuunissamut unioqqutitsivoq.

Allaffissornikkut naammagittaalliorfissamik siunnersuuteqartoqannginneranut pissutaasoq tassaasoq, Kalaallit Nunaata isumannaatsuunissaanut aamma tamat toqqissisimatinneqarnissaanut paasissutissat misikkarissut isertuunneqarnissaannut immikkut ittumik eqqarsaatigisassat, sulianut, inatsit malillugu suliarineqartunut, aalajangiinernut tunngavinnut ilaasussaanagerat, tamanna pillugu Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup maluginiarpaa. Suliat eqqartuussivinni misilinneqarneranni allanut oqaatiginneqqusaanngitsumik ingerlatsineq aaqqissuunneqarsinnaavoq, tassanilu paasissutissat isertuussaasut isertuunneqarnissaannik aamma akuusup pineqartup eqqartuussissuserisut immikkut itummik toqqakkat ikiorsiullugit suliaminik ingerlatsinissaa periarfissiissutigineqassaaq.

2.10 Atuutilersitsineq

Aalajangersakkami oqaasertaliussat isiginiarneqaqqissasut, tassami inatsisiliornermi taassuma qaangiutereersumut atuutilinnginnissaa aallaaviusussaammat, **IAIN-ip** innersuussutigaa. Toqqaannanngitsumik aningaasaliinernut inatsisip atuutilinnginnerani suliarineqartunut inatsisissatut siunnersuutip atuutinnginnissaa, taamatuttaaq IAIN-p paasivaa.

Oqaasertaliussat Inuussutissarsiornermut, Aatsitassanut, Nukissiutinut, Inatsisit Atuutsinneqarnerannut Naligiissitaanermullu Naalakkersuisoqarfiup aalajangiusimavai. Isumaqatigiissutit, ukiuni arlalinni ingerlasinnaasut pineqartillugit, inatsisip atuuffissaata erseqqissumik killilerneqarnissaata naleqquttuunera, tassunga pissutaavoq.